

漢口小志



民國四年

杜士夔署



上海图书馆藏书



A541 212 0014 4634B

漢口小志

聽竹廬叢書之一


交通志

漢 口 小 志

上海漢口間航路二千二百七十六里冬季減水之期可通航噸數二三千吃水八尺之汽船至夏季更可航行吃水二十七八尺之大船巨艦漢口宜昌間航路一千二百里終年可泛吃水六尺千五百噸之汽船至若由宜昌上游通四川所謂三峽之險者由蒸汽力僅得以最淺吃水之礮艦上下而已然民船之往來如織四川之貨物得輸出於漢口外來之洋貨亦得輸入於四川西北陝西省及湖北之西北部鄖陽襄陽等處有通漢水之舟楫以寬二百米突深副之之大形民船尙易溯航至於鄖陽而湖南航路由岳州經洞庭湖以通沅江湘江冬季洞庭湖上僅吃淺水之民船得往來而已至夏季卽吃水七八尺以上之大船猶得航行湘江之於長沙湘潭及沅江之於常德

京漢鐵路使漢口與河南密接從來天津商圈之內奄有河南北部者鐵道完成後忽自入於漢口之商圈且與北京之交通益趨便利不僅政治上高漢口及武昌之地位卽北京漢口經濟的關係亦加緊密之度也粵漢鐵道完成之日可縮短湖南與廣東之距離川漢鐵道民船搭載之貨物可省下三峽凶灘之危險與其勞力且上海漢口間之鐵道將來亦必敷設則漢口者洵可當東洋芝加哥之實也以上新譯漢口

交通志



漢

口

小

志

揚子江航路久爲中英兩國人所經營後忽加以日本大阪商船公司三公司互相爭競協定貨客運費以圖營業之敏捷合爲一團於上海漢口線立每日兩地各有一隻出航之制甚至三公司船之一有擱沙遭難者合三公司船必互有救援之義務未幾德法兩國合租界之經費亦銳意於航業相繼加入上海漢口間之定期航路遂有五國八公司之發展而爲長江航運業之一大團結其水程則漢口至青山三十六里青山至陽邏一百五十里陽邏至葉家洲一百九十里葉家洲至黃州一百九十里黃州至黃石港六十里黃石港至道士袱六十里道士袱至蘄州六十里蘄州至田家鎮九十里田家鎮至武穴九十里武穴至龍坪五十里龍坪至九江四十里九江至湖口九十里湖口至彭澤九十里彭澤至小姑山九十里小姑山至馬當九十里馬當至東流九十里東流至安慶六十里安慶至中陽二十里中陽至大通四十里大通至荻港九十里荻港至蕪湖六十里蕪湖至梁山九十里梁山至采石磯三十里采石磯至南京二十里南京至揚子縣四十里揚子縣至鎮江六十里鎮江至三江營三十里三江營至西山九十里西山至江陰九十里江陰至狼山三十里狼山至吳淞三十里吳淞至上海三十里計共水程中國道里二于二百七十六里下水計行五十二點鐘上水計行六十七點鐘

揚子江汽航船路以宜昌爲終點由宜昌而至上流之重慶有所謂三峽之險者水勢激

甚且暗礁險石到處橫亘此間汽船航運業之計劃迄未成功至漢口宜昌間之航路雖無暗礁險灘然冬期水涸航路甚爲狹窄並有二隻舫屬困難達於其地者往往賴推進器之力以排開淺灘始得通過故該處船舶之構造漢口上海間絕不相同茲將漢口宜昌間之水程說明於左

漢口至新堤二百六十里新堤至城陵磯一百二十里城陵磯至監利一百二十里監利至沙市二百四十里沙市至宜昌三百六十里計共水程中國道里一千一百里

洞庭湖之水以揚子江爲接續其水勢常伴長江而爲增減卽夏時江水增漲之時湖水亦從而增加得自由航駛於長沙湘潭冬時江水減落湖水亦因而涸竭水深殆不滿二英尺故目下該航路使用之船舶皆一千噸內外之汽船吃水甚淺然適於此種汽船之航行一年中亦祇陰歷五六月七八九十一之七個月而已其他江水減落湖水亦因而涸竭此等汽船岳州以上則不能繼續航行於岳州則須民船接續方可維持以至湘潭茲將漢口湘潭間之水程說明如左

漢口至寶塔州三百里寶塔州至新堤六十里新堤至城陵磯一百二十里城陵磯至岳州十五里岳州至蘆林潭一百八十里蘆林潭至湘陰三十里湘陰至靖港二十里靖港至長沙六十里長沙至湘潭九十里計共水程中國道里八百七十五里

漢口與武昌爲揚子江所隔離因之兩市交通諸多不便且漢水會流於揚子江多呈渦狀強風增水之節民船航渡頗受危險雖常時亦橫約英二里之航程不得不費二小時間現以民力營二渡船公司（厚記利記）各有小蒸汽船二隻然以民船渡江者猶難勝數

漢水河面之寬雖不及揚子江而河底則較江水爲深故五六百噸之汽船無論何時均得往來於襄陽附近特其兩岸富饒冠於湖北全省產黃豆豆餅芝麻油類棉花漆牛皮木耳煙草等爲多不僅此類統由漢口搬運亦爲來自山西陝西之多額農產品輸出於漢口之惟一道路又綿紗綿布砂糖雜貨由此水路輸送於上流各地亦爲不少近來上下貨物專以民船搬運其民船往來日數雖因水澆之緩急與風位之如何而各不同然普通航行上水一日五六十里至百四五十里下水則二三百里由漢口至老河口須費十四五日至二十四五日故該航路早見有可設立汽船公司之理往時從事於該航路者爲泰安及春和二公司泰安公司爲漢川商民吳心九所設立資本三千兩以安泰安濟二小蒸汽船於漢口仙桃鎮間開業爲乘客之運送次則漢口之商民姚冠卿等所設之春和公司以資本二千金與紫雲飛雲之二小蒸汽船亦從事於該航路但漢口及仙桃鎮間冬季減水之期以蔡甸上流多沙洲之故每年由十一月至翼年三月蔡甸以上

不能航行現時行駛者惟萬安巷之義和公司

汽船以外之航運業則為民船甚繁盛民船停泊所計共二十餘處茲錄其重要者如左

小橋口 楊家河 至公巷 泉隆巷 邱家墻 新碼頭 小新碼頭

武聖廟 老官廟 五彩碼頭 沈家廟 寶慶碼頭 流通巷 集稼嘴

大碼頭 中碼頭 打扣巷 龍王廟 四官殿 米廠 馬王廟

是等民船停泊所皆繞江邊由漢水兩岸至橋口間凡百十五里由湖南湖北江西三省所來之民船咸集於此只來自四川之民船集於南岸漢陽其總數當不下二萬四五千帆船林立之套語尚不足以盡之

民船航行分兩種有有部帖而營船行業者有無一定之部帖而營業者有部帖者多在武聖廟附近專營襄河以西之航運業無一定之部帖者多在沈家廟與龍王廟之間以湖南人最多蓋各民船中以湖南船占最多數

漢水航路近來行駛之汽船單為乘客運送之營業萬安巷義和公司設有保隆保太君山沅江楚靖廣大興太之小蒸汽船七隻往復仙桃鎮府河等處其寄港地如左

一由漢口至仙桃鎮者

蔡甸 新溝 漢川 繫馬口 城隍港 蚌灣口 分水嘴

交通志

交通志

脈旺嘴 劉咀 仙桃鎮

一由漢口至長江埠者

蔡甸 新溝 縣河口 辛家渡 神靈口 劉家隔

府河口 道人橋 長江埠

頃有商民組織武黃輪船公司備有同樂保生保清河安德安同安席生等之小蒸汽船七隻專駛武黃間其水程則漢口至陽邏六十里陽邏至葛店三十里葛店至趙家磯三十里趙家磯至團風四十里團風至黃州二十里黃州至鄂城十五里計共水程一百九十五里

京漢鐵路為現有各路最長之幹線延亘三省二千四百餘里溝通南北恢復利權在交通歷史上最有研究之價值矧京師為人文薈萃武漢居天下上游商旅賈閭貨產駢集他日各省鐵路一律告成其必以京漢路為樞機者可斷言也此路發端於南皮張文襄公時前清光緒十五年張任兩廣總督頗以開通風氣為宗旨提倡最力然時機未熟當事者每阻其議遂不果行洎乎甲午戰後築路之說復興商辦官辦二說紛紜毫無把握二十二年津海關道盛宣懷以直鄂兩督保荐入京覲見之始即陳說辦法請先設立總公司於上海二十三年盛過鄂與比利時公司議借英金四百五十萬磅訂立合同所有

全路工程應用材料均由比公司主持由是測量建設分段並舉路工之成始基於此後因獲利既豐借款息金過重直接間接均受牽累故籌款贖路之論漸已騰播人口三十四年值借款合同期滿當局者遂畫策收回自辦自是全路悉隸於交通部管轄之下而主權始統歸我有（京漢旅行指南）

漢口火車站自玉帶門起至劉家廟止計共車站四處

玉帶門車站 距北京前門站二千四百二十六里屬夏口縣轄北爲桑麻湖南距漢江極近隔江遙望即可見梅子山黑山間之龍燈堤乃此路南端之第一站也

循禮門車站 距北京前門站二千四百二十里北爲後湖湖舊長五六里闊半里東近大智門西近居仁門爲蓄水溉田處今兩端已漸淤塌西南爲漢鎮之中起義焚燬不少刻正在建築中

大智門車站 距北京前門站二千四百十六里爲舊有堡垣之第二門今城垣與門俱廢城外之河亦已淤塞此站距大智門舊址約半里漢鎮爲通商巨埠精華所聚悉在上游附站一帶在鐵路未通以前空闊殊甚今則塵閤撲地車馬如雲已非昔日之比站東一帶爲各國租界車站即鄰法界自站東行至江干爲一碼頭江內停泊之輪船帆檣相屬另有岔道一條由站西轉北入德租界至江干則專爲起卸貨物而設

江岸車站 距北京前門站二千四百零八里地居漢鎮北端俗名劉家廟所有該站存車廠材料廠機廠工廠皆在此站東即大江有本路自築碼頭專爲與水路輪船直接上下附近地極宏闊一望無垠現已有多數商家預擬在此經營建築並有美孚亞細亞各煤油公司建設油池將來漢鎮商業發達則漢口市街必推廣至此武漢起義地變戰場沈沙折戟至今尙存遺跡焉（以上京漢旅行指南）

漢口中華郵政局設一碼頭河街直接交通部聘英人李齊爲郵務長時加整頓設法安速遞寄以期利便官商漢口總局所定截收信件時刻與發售郵票每日自早七點鐘起至晚九點鐘止至漢口各支局截收信件時刻各有不同非向附近支局查詢不可茲將漢口各支局地址列左

華景街

大智門

黃陂街

白布街

大王廟

橋口

除支局外凡屬繁要街道均設有信筒或信櫃以便就近投信武漢三鎮由晨至晚每日派信八次京漢鐵路運來之信件在漢口常陸由差派送回信可交原差帶轉若當日晚間九點鐘趕不及投寄可於次早八點鐘以前在總局投寄或送大智門支局火車未開行十分鐘以前該支局尙仍收信每逢星期五晚大智門支局收信至十點鐘止電報局直隸於交通部自軍興以來南北都督以及各屬軍政分府發電均列一等概免

收費在當時原為便於軍務起見後遂相沿成習此項免費電報日多一日動輒長篇累牘一電字數或逾數千遂至線路壅塞應接不暇既影響於報務更關係於財政經交通部核定官電限制已於元年六月一日與電報新價同時實行（國民快覽）

電話公司創辦於前清光緒三十年冬成立於三十一年秋是為官辦至三十四年改為商辦民國元年又改為官辦其法凡設電話之處均有逐電機器一架以鐵絲二根達至該公司之總機器房如甲擬詢問於乙先須搖電遂動總機器之鈴嚙接乙處然後再搖電機待乙回鈴手執聽筒然後娓娓而談如同覲面

新修馬路自款生路起至六渡橋止舊有馬路自六渡橋起至玉帶門外鐵路邊止均有人力車馬車行駛茲將沿路停車場十六處列左

怡園 張美之巷 杏初里 六渡橋 鳳舞臺 滿春茶園 自新堂 循禮門

蘇湖公所 玉皇閣 觀音閣 操場角 居仁門 勸工院 玉帶門 鐵路邊

後城馬人路力車共計皮輪鐵輪一千輛均由警察廳編定號牌按月納捐自二年十月因修四六抽停計發行五百零七輛現添至五百八十餘輛每輛皮輪每月繳捐錢二串四百文鐵輪每輛每月納捐錢一串八百文貿易馬車華洋兩界經英國巡捕房規定額數一百號每月驗號扣停者不下十餘實行者僅八十餘輛每輛每月納捐洋二元至包

馬車（亦名行車）共計三百餘輛。納捐者或數輛至十餘輛不等。每季每輛納捐洋二元。人力包車通鎮共計一千餘輛。領照納捐者僅四百七十餘輛。每輛每季納捐洋二元。未修馬路之各街巷雖統鋪以花崗石之石板。然年久失修。缺損及磨滅者。顯生凸凹。其窪處及道路之邊。偶凡塵芥污泥等腐敗性之物質。堆積狼藉。不獨滋蓄病菌。品爲外來病菌之最好培養地也。污水除去之設備。有暗渠式之下水溝。其構造約深五尺。壘以磚石。塗以泥灰。被以花崗石之石蓋。污水悉皆排出於長江。然不加修繕。處處破壞。壅塞不堪爲用。且一入夏期。則污水瀦滯。臭氣衝鼻。行旅難堪。小街僻巷。無論已卽正街。亦頗狹隘。無所謂外街裏街之區別。無論馬車通行爲難。卽人力車上。概行禁止。兩旁商店招牌林立。過街招牌。幾成爲渡橋之奇觀。沿街淨攤。雖經各警一再取締。然相習已久。一時殊難禁止。（參新譯漢口）

街巷交通之具。以轎爲最流行。其狹者黑色。長方形。以兩木橫貫而抬之。曰小轎。行頗捷。而式不雅。故各旅館暨各碼頭。輒備大轎。以備不時之需。近有改籐椅爲轎者。曰籐轎。水陸各碼頭均有轎夫。在街高呼招攬。乘客其價目亦尙無確切之規定。

客棧旅館計一千餘家。行人稱便。其開業時各具有五家連環保結。不准留宿來歷不明人。並由各該管警署領有住客循環簿冊。逐日填注往來客商姓名。年齡籍貫。送署查閱。

漢口小志

聽竹廬叢書之一

寺觀志

普照寺

在漢口大智坊曹大臣等建

明戴金普照寺詩漢原發秀巖洲沙此地曾開錫杖花老衲不知何處去鐘磬遺韻在山家

漢陽府志

棲賢寺

在漢口南岸崇信坊萬歷末年建

府志

白衣菴

在漢口南岸

府志

華嚴菴

在漢口大智坊明萬歷四十二年建

府志

元帝殿

在漢口循禮坊萬歷十一年建後燬順治五年徽商齊修康熙三年水圯

楮嶠等重修

府志

東嶽廟

在漢口鎮曾廷芝偕衆修

府志

天符廟

在漢口大智坊明萬歷四十年建清順治五年重修

府志

宗三廟

在外五甲今廢

縣志

西來菴

在漢口居仁坊清順治五年總督佟鼎創修黃澍有碑記今廢

府志

太平菴

在居仁坊康熙時生員勞撫夏建今廢

圖書集成職方典

五顯廟

在居仁坊大街咸豐五年燬於兵八年重建未得舊規

縣志

漢 口 小 志

甘露寺 舊在下關茶菴同治二年移建居仁坊堤內府志

大觀音閣 在居仁坊堤外舊有九齡童子曾珮大書覺悟羣生匾額書法秀勁今併

燬咸豐六年復建縣志

老官廟 在由義坊明嘉靖六年建天啟元年修今燬同治二年重建縣志

沈家廟 在循禮坊大街為供奉關帝之所咸豐年間兵燹後重建縣志

楚善菴 即東嶽行宮在循禮坊後街縣志

禹王閣 在循禮坊接駕嘴渡口城市往來通衢也歲久傾圮重建數次縣志

十方菴 在漢口循禮坊順治三年建為賑饑之所縣志

千佛菴 在循禮坊十方菴後街圖書集成職方典

棲隱寺 舊在下關今移循禮坊福建會館之西府志

四官殿 在漢口大智坊順治中邑人瞿恒岳建熊學士伯龍記之詳藝文府志

迴龍寺 在大智坊明永樂二年建初名塞口寺世宗臨幸勅賜迴龍縣志

指南禪林 即八角亭在大智坊雍正七年守道徐率紳民建縣志

木蘭第一宮 在萬壽橋後縣志

漢口自兵燹後全鎮蕩為瓦礫而寺觀亦多遭焚燬然旋滅旋興而恢復者亦多易地茲

就三年八月警察調查述後

忠義節烈祠

節烈祠巷

紫雲殿

居仁門橫街

雷祖殿

尙義巷河邊

古海蓮寺

節烈祠巷

軒轅殿

胭脂巷堤街

寶樹菴

三善巷河邊

東嶽廟

靜室菴巷

四神殿

安定巷

福壽觀

勸工院堤街

武當第一宮

宗三廟巷口

金臺觀

安定巷

朝貞觀

唐家巷堤街

宗三廟

宗三廟正街

雷祖殿

大通巷

清華觀

謝家大巷

自修觀

太清宮中路

佛壽菴

大通巷堤街

清靜觀

謝家大巷

曇雲寺

太清宮中路

大觀音閣

痘姆祠巷

寶慧菴

崇仁巷

老君殿

太清宮中路

痘姆祠

痘姆祠巷

白雲寺

居仁門堤街

忠義殿

天寶巷正街

接福菴

板子巷口

寶華菴

春生巷

上四官殿

天寶巷正街

雷祖殿

楊家河

圓照寺

仁里巷

天符廟

關聖祠正街

土皇宮

楊家河

大東岳廟

利濟正街

藥王醫聖宮

利濟巷上堤

羅祖殿

小火路

雷祖殿

下開口

文廟

觀音閣

準提菴

花園巷

準桿菴

六水分源

玉皇閣

利濟巷堤後

關帝廟

夾街

新安三元殿六水分源

漢 口 小 志

觀音閣

三府街中路

藥王廟

夾街

老漢義殿

雙龍街

法印菴

體仁巷中路

鳳林菴

夾街

十方菴

大夾街

忠勇殿

體仁巷中路

三皇殿

九如橋

三皇殿

宵波會館下

水星祠

小新碼頭

雷祖殿

燕山橋

仁壽宮

小夾街

福田菴

仁里巷

大清宮

堤街

佛林菴

萬壽宮街

地藏菴

仁里巷中路

太山廟

保壽橋

佛慧林

萬壽宮街

法印菴

中路

神農殿

夾街

祝聖宮

萬壽宮街

自修菴

蘇湖公所

觀音菴

中路

東嶽行宮

戴家菴

雷祖殿

下開口

玉樞宮

堤街

財神廟

黃陂街

天符廟

剪子街口

娘娘殿

大房二房三房

苗家碼頭

財神殿

張美之巷

志

小

口

漢

雷祖殿

萬壽宮街

觀音殿

苗家碼頭

松筠菴

洪益巷

麒麟菴

董家巷

老君殿

熊家巷

孫祖閣

洪益巷

雷祖殿

武聖宮街

佛隆菴

熊家巷

應元宮

洪益巷

魯班閣

郭家巷

葛仙殿

張美之巷

清虛道院

沙家巷

漢

口

小

志

百子菴 百子里 土皇宮 張美之巷 斗姥閣 大郭家巷

漢義殿 前花樓正街 天一閣 馬路邊 老君殿 廣益橋

貞元觀 百子堂堤街 百子堂 百子堂堤街 皇經堂 皇經堂街

國瑞菴 豆油皮子街 古跡茶菴 福星街

以上總計寺觀九十五所僧一百三十八名道四十九名尼一百零一名除圓照寺僧五

十四名十方菴僧三十六名外其餘寺觀住持僧尼自一名至四五名不等

附公所會館 公所會館為各幫聚議之所大半設有神座春秋演古致祭故附於志後

四明公所 安定巷堤街 烘糕公所 三番巷 廣貨公所 多寶林堤街

營造公所 節烈祠中路 湖南會館 至公巷正街 應元公所 玉皇閣堤街

雙紅公所 居仁門堤街 河南公所 至公巷河邊 金箔公所 仁里巷堤街

木紅公所 安定巷堤街 凌霄別墅 書院巷 蘇湖公所 多寶林

警星公所 安定巷堤街 孝感船幫公所書院巷 煙幫公所 寶善堂

安苓公所 永甯巷 文昌公所 牛路口堤街 興漢郎公所天寶巷河邊

印花公所 小火路 韓江別墅 太清宮中路 陂邑公所 楊家河

鞋業公所 小火路 銀爐坊會館 太清宮中路 鈞許公所 春生巷

磁業公所

花園巷

晴明公所

大通巷

紹興會館

石碼頭正街

京貨公所

新火路

泥水公所

大通巷

磚瓦公所

利濟巷上堤街

元甯會館

九如橋

慶義公所

九如橋

皮貨零剪公所

大通巷堤街

汾幫公所

利濟巷中路

宵波會館

九如橋

天平公所

大通巷堤街

太陽宮

痘姆祠巷

旌德會館

新火路

油幫公所

中路

萍醴公所

新碼頭

洪都公所

萬壽宮街

辰幫公所

新河

灰幫公所

流通巷

米市公所

米廠河街

琴溪書院

九如橋

應元公所

新碼頭河街

蘇貨帽業公所

江浙公所

三元殿側

寶慶會館

寶慶碼頭

疋頭公所

花布街

鐘臺書院

咸甯街

徽州會館

大新街口

錢業公所

鳳麟街

福建會館

得勝街口

太平會館

花布街

武聖宮

武聖宮街

鞋業公所

古三皇堤街

齊安公所

郭家巷

長春公所

苗家碼頭

葛梅公所

美人街

清真寺

大夾街

混元公所

熊家巷

肉幫公所

雙龍街

帝主宮

帝主宮街

磚瓦公所

熊家巷

南城公所

戲子街

長郡會館

董家巷

后稷公所

熊家巷

齊魯公所

戲子街

萬壽宮

萬壽宮街

山貨公所

洪益巷

江蘇公所

戲子街

昭武書院

萬壽宮街

股皮公會

嚴家灣

甯業公所

沙家巷

覃懷會館

大郭家巷

香山會館

大郭家巷

茶業公所

熊家巷河街

清真寺

廣益橋

皮業公所

後花樓街

石膏公所

石膏幫

文明公所

牛路口堤街

嶺南會館

夾街

皮業公所

後花樓

以上會館公所計共八十四處均有一定地點者其餘無一定地點而由各商團組織成立者則有業主會夏口工業分會棉業會大布公會花布公會紗業公會花業會絲油會洋貨雜貨公會等名目



漢口小志

義舉志

聽竹廬叢書之一

漢口義舉甚夥無論大小均由紳商集貲籌辦成效卓著其常年經費由公家開支者僅官育嬰敬節局一處然款項支絀已不及商辦育嬰敬節局之完備焉

勸工院創自南皮張文襄公今改為貧民工廠已於本年八月由夏口知事撥禁煙罰款三萬串委汪君志安為經理招工開辦

漢鎮沙包舊有崇善堂義塚自英法美各國來漢通商沙包民地多為所購義塚頗被侵凌清同治四年郡守鍾謙鈞捐置梅子山五里墩義地始將沙包義塚遷葬於此（漢陽縣志）

大智坊義塚一段為前清邑貢生崔文元接次修築今不知遷於何處（同上）

起義烈士墳一在商業學堂地址後一在大智門鐵路外為民軍起義南北爭戰時死事者之遺骸彙葬於此

各種慈善事業均由善堂籌辦除原有被焚燬者不計外茲將現時善堂名稱地點列表於左

- 保善堂
- 興隆巷正街
- 善實善堂
- 張美之巷
- 道生堂
- 董家巷

漢

口

小

志

寶善堂 蘇湖公所 化善堂 尚義巷 普化堂 文書巷

樂善善堂 中路苗家碼頭 願善堂 美人街口 衛生堂 仁里巷

仁善堂 大通巷中路 培心善堂 洪益巷 惠滋善堂 水龍巷

敦寔善堂 存仁巷中路 普安善堂 至公巷 濟生堂 後湖

永安善堂 大夾街 依善堂 金甯會館堤街 自新堂 寶林菴後

滋善堂 大通巷堤街 敦仁善堂 中路苗家碼頭 醫心堂 美人街

安善堂 汪玉霞上 永修善堂 玉皇閣後 普善堂 一蕭家埕

慈濟堂 花布街 依善堂 雷祖殿堤街 復善堂 觀音閣堤街

友仁義社 李家墩 從仁堂 武聖宮街 從善堂 楊千總巷

以上共計善堂三十處其常年經費均由各堂紳董經理官吏不得過問所辦慈善事業或則施棺送診或則撫卹孤嫠或則收埋白骨或則設船救生或則惜字宣講或則興學種痘凡一切濟眾福民之事範圍大小均視財政之盈絀而各不同

慈善會在由義門外該會係仿上海各善堂聯合設立慈善公所之意組織等團以主持人道奉行慈善事業為宗旨尤期聯絡感情萃合能力凡漢口一切善舉分緩急兩端次第籌辦以彌缺憾並附設惜字公會慈幼小學校殘廢棧流所

漢口地方殷富人煙稠密偶一失慎即成燬原各保安會均設置水龍是奔撲救以熾災捍患惟建置者不一時經理者不一人僅將現設各保安會臚列之

仁義上段保安會 關聖祠正街 仁義中段保安會 至公巷

仁義下段保安會 大水巷 同益上段保安會 體仁巷堤街

同益下段保安會 堤街 同益會 中開口

公益救患會 徽州會館下巷 永安社 長勝街口

公善保安會 古三皇堤街 四段商團保安會 沈家廟

同益保安會 雷祖殿 商團保安會 迴龍寺

甯平保安會 天符廟 黃陂街上段保安會 財神廟

永濟消防會 鮑家巷 義成社 太平會館

萬全保安會 紫竹巷 商防永安社 萬年街

敦樂保鄰會 苗家碼頭 永平公益會 熊家巷

清和保安會 張美之巷 下段保安會 堤口

清真自治公益會 廣益橋 公立保安會 歡生路

普濟保安會 土壩街 外五甲保安會 百子堂

義舉志

義舉志

智門保安會

大智門

冬間聯合會為各保安會之總機關現設小關帝廟內

市口寺塔路燈由警察廳設置者二百七十一盞後城馬路五十六盞其餘均由各善堂

會社設置

購置義塚收埋露棺常年經費約在四千元上下大概由警察廳撥給一半由慈善會籌

措半

痘症鼠疫向來不甚講求經官廳一再佈告設法預防人民始知兩種流疫為害劇烈現
在種痘收鼠經費由公家支出者常年已達七百元之譜

醫院中外國人設置者均在租界其在中國地段者僅彭家巷之普愛醫院米廠河街之
日本醫院後花樓之仁濟醫院等三處中國人設置之醫院固屬寥寥庸醫自由懸牌
營業誤人生命不淺官廳正在設法取締

漢口小志

聽竹廬叢書之一

兵事志

周昭王征荆蠻旋涉漢王及祭公隕于漢竹書紀年

周昭王十六年伐楚涉漢遇大咒竹書紀年

十九年天大隲雉兔皆震喪六師于漢竹書紀年

桓公八年楚子伐隨軍于漢淮之間左傳

莊公四年楚武王荆尸授師子焉以伐隨隨人懼行成莫敖以王命入盟隨侯且請為會

于漢納而還左傳

昭四年吳伐楚沈尹射奔命于夏汭五年蘧射以繁陽之師會于夏汭蔡侯吳子唐侯伐

楚舍舟于淮汭自豫章與楚夾漢左司馬成謂子常曰子沼漢而與之上下我悉方城外

以毀其舟還塞大隧直轅冥阬子濟漢而伐之我自後擊之必大敗之既謀而行武帝黑

謂子常曰吳用木也我用草也不可久也不如速戰史皇謂子常楚人惡子而好司馬若

司馬毀吾舟子淮塞城口而入是獨克吳也子必速戰不然不免乃濟漢而陳春秋傳

吳師伐郢楚子常濟漢而陳自小別至于大別春秋傳

孫策前進夏口攻黃祖時劉表遣從子虎南陽韓晞將長矛五千來為黃祖前鋒策與戰

大敗之

江表傳

建安十三年孫權西擊黃祖祖橫兩蒙衝挾守沔口以楫闔大紮繫石爲砥上有千人以弩交射飛矢兩下軍不得前襲與凌統各將敢死百人被兩鎧乘大舸船突入蒙衝裏襲身以刀斷兩紮蒙衝乃橫流大兵遂進祖便開門走兵追斬之

江表傳

文帝踐祚使天聘別屯沔口止石梵孫權以五萬衆自圍聘于石陽甚急聘堅守不動權住二十餘日乃解走聘進擊破之

魏志

天基表城上昶徙江夏治之以偪夏口由是賊不敢輕越江

魏志

魏明帝青龍二年吳遣師十萬又遣陸遜諸葛瑾將萬餘人入江夏沔口襄陽擊江夏新市安陸石陽斬獲千餘人而還

魏志

太平二年朱廩自虎林率衆襲夏口夏口督孫壹奔魏

魏志

晉武帝咸甯五年冬大舉伐吳遣平南將軍胡奮出夏口王濬下巴

蜀書

晉惠帝永興二年陳敏謀據揚州時劉宏鎮荊州遣陶侃屯于夏口敏遣其弟恢寇武昌侃敗却之永嘉四年南征將軍山簡爲羣盜嚴疑所迫自襄陽徙屯夏口建興末杜曾等

作亂敗荊州兵乘勝逕造沔口威振江沔豫太守周訪擊却之建元元年庾翼督荊江諸州圖略中原自武昌移鎮襄陽尋還治夏口太元二年桓冲移鎮上明上表言江州刺史

漢 口 小 志

漢

口

小

志

王嗣宜進屯夏口據上下之中于事為便晉書

晉懷帝永嘉四年九月雍州人王如舉兵反于宛殺害令長自害大將軍司雍二州牧大

掠漢晉書

晉懷帝永嘉五年石勒謀保據江漢參軍都尉張賓以為不可會軍中饑疫死者大半乃

渡河寇江夏癸酉拔之太守楊岷棄城走流人杜弼等反寇荆襄晉書

六年荊州刺史王澄出軍攻弼尋又犇杏中別駕郭舒諫曰使君臨州雖無異政然一州

人心所繫今西收華容之兵足以擒此小醜奈何自棄遽為奔亡乎澄不從欲將舒東下

舒曰舒為萬里紀綱不能匡正今使君犇亡誠不忍渡江乃留屯沌口往討都督王敦遣

武昌太守陶侃潯陽太守庾訪歷陽內史甘卓共擊弼愍帝建興元年周顛屯潯水城為

杜弼所困陶侃使明威將軍朱伺救之弼退保冷口侃曰弼必步向武昌乃自徑道還郡

以待之弼果來攻侃使朱伺逆擊大破之弼遽歸長沙周顛出潯水投王敦于豫章敦留

之陶侃使參軍王貢告捷于敦敦曰若無陶侯便失荊州矣乃表侃為荊州刺史屯沔江

晉書

元帝建武元年鄭攀等相與拒王廙衆心不一散還橫桑口欲入杜曾王敦遣武昌太守

趙誘襄陽太守朱軌擊之攀等懼請降杜曾亦請擊第五猗于襄陽以自贖廙將赴荊州

兵事志

漢

口

小

志

留長史劉浚鎮楊口壘竟陵內史朱伺謂麋日曾猶也外示屈服欲引官軍使西然後兼道襲楊口爾宜大部分未可便西麋性矜厲自用以伺爲老怯遂西行曾等果還趨楊口麋乃遣伺歸裁至壘卽爲曾所圍劉浚自守北門使伺守南門馬雋從曾來攻壘雋妻子先在壘中或欲反其面以示之伺曰殺其妻子未能解圍但益其怒爾乃止曾攻北門伺被傷退入船開船底以出沈行五十步乃得免曾遣人說伺曰馬雋德卿全其妻子今盡以卿家內外百口付雋雋已盡心收視卿可來也伺報曰吾年六十餘不能復與卿作賊吾死亦當南歸妻子付汝裁之乃就王麋于甌山病創而卒戊寅趙誘朱軌及陵江將軍黃峻與曾戰于女觀湖誘等皆敗死曾乘勝進造沔口威振江沔王使豫章太守周訪擊之訪有衆八千進至沌陽曾銳氣甚盛訪使將軍李恒督左甄許朝督右甄訪自領中軍曾先攻左右甄訪於陣後射雉以安衆心令其衆曰一甄敗鳴三鼓兩甄敗鳴六鼓趙誘子引將父餘兵屬左甄力戰敗而復合馳馬告訪訪怒叱令更進引號哭還戰自旦至申兩甄皆敗訪選精銳八百人自行酒飲之勅不得妄動聞鼓音乃進曾兵未至三十步訪親鳴鼓將士皆踴躍犇赴曾遂大敗殺千餘人訪夜追之諸將請待明日訪曰曾驍勇能戰向者彼勞我逸故克之宜及其衰乘之可滅也乃鼓行而進遂定漢沔

晉書

安帝元興三年劉毅何無忌劉道規自潯陽西上至夏口以討桓振遣鎮東將軍馮該

漢

口

小

志

守東岸楊武將軍孟山圖據魯山城輔國將軍桓仙客守偃月壘衆合萬人水陸相援毅

攻魯山城道規攻偃月壘無忌遏中流自辰自午二城俱潰生擒山圖仙客該走石城晉書

宋順帝昇明元年十二月荊州刺史沈攸之起兵攻蕭道成遣中兵參軍孫同等五將以

三萬人爲前驅司馬劉攘兵等五將以二萬人次之又遣中兵參軍王靈秀等四將分兵

出夏口據魯山癸巳攸之至夏口自恃兵強有驕色以郢城弱小不足攻欲問訊安西暫

泊黃金浦五代宋史

齊東昏侯永元二年雍州刺史蕭衍起兵蕭穎胄應之西中郎參軍南郡鄧元起向夏口

帝遣薛元嗣等將兵送郢州刺史張冲拒西師元嗣等疑冲不敢進停夏口浦聞西師將

至乃相帥入郢城前竟陵太守房僧寄將還建康至郢帝勅僧寄留守魯山除驍騎將軍

張冲與之結盟遣軍主將張樂祖將數千人勅僧寄守魯山註漢陽志大別山在沔陽縣

東一名魯山五代齊史

和帝中興元年蕭衍至竟陵命王茂曹景宗爲前軍以中兵參軍張法安守竟陵城茂等

至漢口諸將議欲併兵圍郢分兵襲西陽武昌衍曰漢口不闊一里箭道交至房僧寄以

重兵固守與郢城爲犄角若悉衆前進僧寄必絕我軍後悔無所及不若遣王曹諸軍濟

江與荊州軍合以逼郢城吾自圍魯山以通沔漢使郢城竟陵之粟方舟而下江陵湘中

之兵相繼而至兵多食足何憂兩城之不拔天下之事可以臥取之爾乃使茂等帥衆濟江屯九里張冲遣中兵參軍陳光靜開門迎戰茂等擊破之光靜使冲嬰城自守景宗據石橋浦連軍相續下至加湖荊州遣冠軍將軍鄧元起軍主王世興田安之將數千人會雍州兵於夏首衍築漢口城以守魯山命水師主義陽張惠昭等遊遏江中絕郢魯二城信使楊公則舉湘洲之衆會於夏口蕭穎胄命荊州諸軍皆受公則節度雖蕭穎達亦隸焉夏四月蕭衍出河命王茂蕭穎達等進兵逼郢城薛元嗣不敢出諸將欲攻之衍不許六月西臺遣衛尉席肅文勞蕭衍軍蕭穎胄等議謂衍曰今頓兵兩岸不併兵圍郢定西陽武昌取江州此機已矣若請救於魏與北連和猶爲上策衍曰漢口路通荆雍控引秦梁糧運資儲仰此氣息所以兵歷漢口連結數州今若併兵圍郢又分兵前進魯山必阻沔路搃吾眎睽若糧運不通自然離散何謂持久鄧元起近欲以三千兵往取潯陽彼若懼然知機一說士足矣脫拒王師固非三千兵所能下也進退無據未見其可西陽武昌取之卽得然既得之卽應鎮守欲守兩城不減萬人糧儲稱是卒無所出脫東軍有上者以萬人攻兩城兩城不得相救若我分軍應援則首尾俱弱如其不遣孤城必陷一城既沒諸城相次土崩天下大事去矣若郢州既拔席卷沿流西陽武昌自然風靡何遽分兵散衆自貽憂患乎况擁數州之兵以誅羣小懸河注火奚有不滅豈容北面請救戎狄

漢

口

小

志

以示弱于天下彼未必能信徒起醜聲此乃下計何為上策卿為我輩白鎮軍前途攻取
 但以見付事在目中無患不捷但借鎮軍靖鎮之術吳子陽等進軍武口衍命軍主楊天
 惠等屯漁湖城唐修期等屯白陽壘夾岸待之子陽進軍加湖去郢三十里傍山帶水築
 壘自固子陽舉烽城內亦舉火應之而內外各自保不能相救會房僧寄病卒眾復推助
 防張樂祖代守魯山蕭衍使征虜將軍王茂軍主曹仲宗等乘水漲以舟師襲加湖鼓譟
 攻之丁酉加湖潰吳子陽等走免將士殺溺死者萬計俘其餘眾而還於是郢魯二域相
 視奪氣魯山乏糧軍人于磯頭捕細供食密治輕船將奔夏口蕭衍遣偏將斷其走路丁
 巳孫樂祖窘迫以城降已未東昏侯以程茂為郢州刺史薛元嗣為雍州刺史是日茂元
 嗣以郢城降汝南民胡文起兵於攝陽以應蕭衍取義陽安陸等郡以自效衍又遣軍主
 唐修期攻郡皆克之五代齊史

梁武帝太清二年侯景反攻圍臺城江湘雍諸王入援湘東王繹遣竟陵太守王僧辯將
 舟師萬人出自漢川載糧東下岳陽王察遣府司馬劉方貴將兵出漢口二年台城陷景
 矯詔解援軍僧辯仍歸竟陵五代齊史

簡文帝大寶二年湘東王繹討侯景景取郢州使丁和守夏首進攻王僧辯於巴陵宋子
 仙等眾號二萬戍郢城別將支化仁鎮魯山庚申王僧辯至漢口先攻魯山擒支化仁送

江陵五代梁史

元帝承聖元年魏師陷江陵郢州刺史陸法和降於北齊與齊清河王岳會漢口王僧辯

遣江州刺史侯瑱攻郢州任約徐世譜宜豐侯循皆引兵會之梁史

世祖天嘉元年周人聞王琳東下乃圍郢州孫瑒固守未幾琳軍大敗奔齊周不能克郢

州乃解圍去瑒遂來降齊軍先守魯山戊午棄城走詔南豫刺史程靈洗守之梁史

臨海王光大元年湘州刺史華皎謀反安成王瑱遣吳明徹趨郢州于淳于量楊文通黃

法慧程靈洗章昭達徐度等共襲討皎使潛引周兵又自歸于後梁周權景宣將水軍元

定將陸軍衛公直總之與皎俱下淳于量軍夏口直軍魯山梁史

梁太祖開平二年荆南節度使高季昌遣兵屯漢口絕楚朝貢之路楚王殷遣其將許德

勳將水軍擊之至沙頭季昌懼而請和五代梁史

宣帝大建十四年隋主堅受周禪遣軍南伐元景山出漢口遣上開府儀同三司鄧孝儒

將卒四千攻甌山鎮將軍陸綸以舟師救之為孝儒所敗涓口甌山沌陽守將皆棄城走

梁史

後主禎明二年隋主大舉伐陳秦王俊督諸軍屯漢口為上流節度以散騎常侍周羅暉

都督巴峽緣江諸軍事以拒之五代陳史

漢

口

小

志

隋文帝開皇九年春滅陳陳叔寶降水軍都督周羅睺與郢州刺史苟法尚守江夏秦王
俊督三十總管水陸十餘萬屯漢口不得進相持踰月陳荊州刺史陳慧紀遣南康內史
呂忠肅屯岐亭據巫峽于北岸鑿巖綴鐵鎖三條橫截上流以遏隋船忠肅竭其私財以
充軍用楊素劉仁恩奮兵擊之四十餘戰忠肅守險力爭隋兵死者五千餘人陳人盡取
其鼻以求功賞既而隋師屢捷獲陳之士卒三縱之忠肅棄柵而遁素徐去其鎖忠肅復
據荊門之延洲素遣艇巴千人乘五牙四艘以拍竿碎其十餘艦遂大破之俘甲士二千
餘人忠肅僅以身免陳信州刺史顧覺屯安蜀城棄城走帥慧紀屯公安悉燒其儲蓄引
兵東下於是巴陵以東無復城守者陳慧紀帥將士三萬人樓船千餘艘沿江而下欲入
援建康爲秦王俊所拒不得前是時陳晉熙王叔文罷湘州還至巴州慧紀推叔文爲盟
主而叔文已帥巴州刺史畢寶等致書請降于俊俊遣使迎勞之會建康晉王廣命陳叔
寶手書招上江諸將使樊毅詣周羅睺陳慧紀子正業詣慧紀諭指時諸將皆解甲羅睺
乃與諸將大臨三日放兵散然後詣俊降陳慧紀亦降上江皆平楊素下至漢口與俊會

隋志

權景宣曉兵權有智略從隋文帝拔宏農破沙苑皆先登陷陣轉外兵郎中從開府于謹
征江陵景宣別破梁司空陸法和司馬羊亮於澗水又遣別將攻拔魯山多造舟艦益張

旗幟臨江又渡以懼梁人梁將王琳在湘州景宣遺書喻以禍福琳遂遣長史席整因景宣請舉舟欵附隋文帝傳

漢 唐高祖武德四年平蕭銑命黃州總管周法明分道出夏口六年復命法明出夏口討輔公祐于丹陽興元初淮西李希烈叛稱帝以夏口上流要地使其將董傳襲鄭州刺史李兼敗却之元和初以淮西多事夏口當漢江之衝特置軍府以為藩衛乾符中黃巢之難

攻夏口城上陷其外部唐書

宋欽宗靖康二年金人寇奸民祝進等為盜犯復攝德安守劉規戰破之是時漢陽軍屬復州宋史

宋高宗紹興元年盜曹成陷漢陽二年二月庚午以李綱為湖廣宣撫使仍命岳飛等共討曹成諸盜宋史

曹彥約字簡甫淳熙八年進士嘗從朱熹講學漢陽闕守檄攝軍事時金人大入郡兵素寡弱彥約搜訪土豪得許嵩俾總戎兵趙觀俾訪水道黨仲昇將宣撫司軍屯郡城金重

兵圍安陸遊騎闖漢川彥約觀授方略結漁戶拒守南河觀逆擊斬其先鋒且遣死士焚其戰艦晝夜殊死戰追擊金人大敗去彥約以守禦功進秩二等就知漢陽宋史

理宗景定元年三月蒙古兵至漢陽鄂州統制張勝力戰死之宋史

漢

口

小

志

度宗咸淳十年元大舉南伐十二月癸丑元伯顏至蔡店大會諸將刻期渡江遣人觀漢口形勢時夏貴以漢鄂舟師分據要害彌互三十餘里王達守陽邏堡朱禎孫以遊擊軍扼中流兵不得進軍將馬福有淪河穿湖中可從陽邏堡西沙蕪口入江伯顏使覘沙蕪口夏貴亦以精兵守之伯顏乃進圍漢陽聲言取漢口渡江貴果移兵援漢陽伯顏乘間遣阿納罕將奇兵倍道襲沙蕪口奪之因自漢口開堤引船入淪河轉沙蕪口以達江

宋史

忙兀台從伯顏阿朮南征由漢口入江至蔡甸聞宋兵屯漢口乃率舟師經門龍口至沙蕪以入次武磯堡

元史

順帝至正十二年十二月丙辰徐壽輝兵陷漢陽威順王寬徹普化等棄城走十三年七月壬申湖廣行省參政阿魯輝復漢陽十五年正月丁丑徐壽輝遣其將倪文俊復破沔陽威順王寬徹普化令其子報恩奴等同元帥呵思藍水陸並進討文俊至漢陽水淺文俊用火筏燒船報恩奴遇難十六年正月文俊建都于漢陽迎徐壽輝據之十九年天完將陳友諒徙其主徐壽輝都江州初壽輝問友諒破隆興欲徙都之因友諒忌其來不利於已不從至是徐壽輝因引兵發漢陽南下江州友諒陽出迎而伏兵于城西俟壽輝入門閉門伏發盡殺其部屬惟存壽輝輝以江州為都居之遂自稱漢王

漢陽縣志

元末徐壽輝反自稱皇帝國號天完改元治平十二年正月遣其將丁普郎徐明達陷漢

陽等州縣十三年詔平章卜顏帖木兒等合兵付壽輝於斬春大破之復武昌漢陽諸路壽輝遁走十五年五月壽輝將倪文俊陷沔陽中興路七月復陷武昌漢遂陷岳州明年正月倪文俊建都漢陽迎壽輝居之八月文俊謀弑壽輝于漢陽不果奔郢州元史並見王葆心天完國

漢

志

明太祖元年陳友諒既敗死鄱陽乃進圍其子理於武昌二月太祖身至漢陽城之使徐達將兵三千屯沌口以遏沔陽舟師理降明史

口

武宗正德六年夏五月流盜劉六劉七往來江上自漢口犯漢陽東門通判徐弼築木爲架登城哨守適當路遣土舍張貴率兵來救戰于沙岸盜大敗劉六死江中尋獲其屍明史

小

崇禎八年正月河北賊滿天星張大受等自麻城抵漢口殺掠殊甚明史

崇禎十五年冬總兵左良玉爲流賊李自成所敗潰而南下自成遣賊將白旺等追之旺方破景陵漢川竟陷漢陽武昌守將列兵金沙洲上旺不敢渡江乃耀兵大別山而還明史

悉

壬午冬闖賊決黃河水淹開封府河南全省陷沒乘勝南下總兵左良玉棄地遠遁爲賊先驅襄樊鄢郢一帶破擄之慘較賊尤甚十二月十六日左兵突至漢口人不及逃而郡城已聞風空國矣清太祖本紀

壬午十二月十六日昧爽張獻忠兵突至漢口鎮鎮人不及逃而郡城人壽樞懦已聞風

漢

口

小

志

空遁矣士甚驍馬甚壯戟門甚尊嚴鐘鼓幃帳雖稍見奪于賊猶甚麗也而仇于鎮人亦甚勇于是居其居因薪之食其食因糞之財其財婦其婦而男則築以刀環而逐之越二日監軍道皖城王楊基與大將軍舊迎之駐于武昌城外金沙洲人受其荼毒與漢口鎮同二鎮故並饒貨財甲于全楚不數日蕩然矣

魏賞延
竹中記

道光三十年六月廣西逆民洪秀全倡亂于桂平縣之金田鄆咸豐二年十一月初九日賊猝至巡撲漢陽十二月郡城失守調防之陝西副將朱瀚陣亡知府董振鐸巷戰死漢鎮為數省通衢百貨山積遷避不及被焚掠五晝夜殆盡

咸豐四年五月漢口賊舟四百餘隻五月初十日竄赴下游礮窩砌築土城欲占要隘青巡撫麟派都司楊昌泗往勦副將書紳副都統魁玉等接應踏毀土城焚賊舟一百餘隻奪獲二十餘隻斃賊千餘人同日賊由漢口分撲塘角又由鸚鵡洲分撲鮎魚套

是年十二月二十五日湖廣總督楊霨失利於廣濟逆黨回竄漢口楊總督親隨將官李士林護之出重圍乘別騎馳至漢口鎮派豫勇一千五百守蔡店楚勇三千駐楊店自率各標兵勇六千餘趨德安

咸豐五年楚軍水陸回接武漢先是楊總督於廣濟敗退曾國藩即派通判俞晟領守備洪定升等水師戰船湖北臬司胡林翼領陸軍回援武漢賊至漢口即渡襄河距漢陽府

于漢陽南岸設砲台以阻下游之師俞晟督師船至楚正月十一日開仗毀其南岸之砲台

是年三月匪距漢陽漢口爲犄角懼水師上下攻擊不敢渡以武昌省城兵力雖單尙能自保後由興國通山取道青山進攻武昌破之胡林翼上方略有荆襄據東南形勝江漢又荆襄咽喉漢陽既陷北岸已形梗塞武昌失守南岸又被蔓延惟急攻武漢一城獲而兩城必復乃可內固荆襄而外遏上竄之路疏入奉旨嘉納

是年七月賊距蔡店初九日被胡林翼彭玉麟分途進剿大獲勝仗十二日克蔡店遂水陸並進用火船將襄河口鐵索浮橋上下游賊焚燬殆盡漢口鎮襄河兩岸賊營全行踏毀並將省城下游塘角賊船大別山賊壘一律焚破

十二月楚軍分攻武昌漢陽水陸獲勝先是八月胡巡撫敗退大軍山賊遂占領武漢三鎮及十二月初一日官大臣文親赴三眼橋督隊李孟羣率各營直撲漢陽西門立毀賊卡進攻大別山月湖之賊殺數百名賊勢潰退逼入襄河死者極多水師炮船攻至五顯廟破水卡二座武昌之賊胡林翼與羅澤南分紮急攻同時三鎮俱下

六年六月初六日石達開大憤樊口之敗大集逆黨萬餘即日由廣濟蘄水黃岡至漢鎮合逆衆堅守官文攻之不下

以上平定粵匪紀略及胡文忠傳

民軍起義南北戰爭互有勝負漢口一隅焚燬過半幸南京成立臨時政府停戰議和建設一共和民國而公私損失不可以數計矣好事者撮有漢口大激戰影片以留紀念茲就中國革命日記暨南北春秋所載辛亥八月十九日後關於漢口戰事抄錄於左

二十一日漢口官錢局被土匪抄搶各錢莊等亦被劫清關道齊耀珊夏口廳王國鐸已逃無蹤跡匪徒四處縱火商團救不勝救乃舉代表至武昌請民軍赴漢保護當由民軍派兵二百名赴漢先拿獲搶物土匪三人就地正法示衆嗣又斬捕土匪數十人勢稍平定

二十二日武漢居民聞滿政府有派旗兵一萬二千名由火車至鄂歸蔭昌節制之消息異常惶恐漢口商會擬謁見蔭昌確守中立經軍政府聞耗示諭始無驚擾

西國旅漢巨商聞蔭昌南下特往謁黎督詢問一切并約以離漢口三十里在青山地方作爲戰爭之地

二十五日薩鎮冰坐江貞兵艦抵漢口泊英界江中向武昌轟擊嗣爲英領事阻止

二十六日北軍總統蔭昌行抵信陽州軍隊陸續到漢海軍提督薩鎮冰所統之建安湖隼湖鷹湖鸚及辰宿各雷艇咸開駛漢口江心下碇

是日下午民軍發步兵一標布列於車站附近革職之第八鎮統制張彪擁殘兵兩營佔

據劉家廟民軍先放一排槍張軍卽退死傷數十人民軍並不追擊互相收隊此最初之開戰也

是日晨民軍與官軍相遇於劉家廟當卽佈開戰線民軍先放空鎗警告官軍卽以實彈還擊戰乃起民軍皆以一當十蛇行而前愈薄愈近炮兵亦同時擊射官兵引退民軍盡力追之官軍乃避入火車飛駛時車頭俱爲官軍所有民軍追之不及子彈且盡遂陸續退還僅留百餘人伏於稻田遠望時有鐵廠工人多名譁而起折路十餘丈有傾忽又飛駛而來轟然一聲車已翻倒民軍乘勢力擊一時死者如墻倒

下午四時又開戰薩軍兵艦六艘開礮以助官軍礮發百餘響未一中民軍發五六礮一砲中艦上兵艦轉向下游而去時官軍駐紮平地民軍屯於山上互相攻擊至二句鐘北軍乃大敗退三十餘里

志

小

口

渡

二十八日晨黎督率民軍渡江抵劉家廟至十一鐘時鎗礮齊施官軍尙未備戰及至二道鐵橋官軍卸甲退礮死亡大半所有軍械槍彈火藥及軍用器具盡爲民軍所有二十九日下午四點鐘時民軍至諶家磯造紙廠見官軍斥侯出現於前相距九百米突率兵猛撲卽將官軍擊退直至三道橋官軍散竄遺下機關砲一尊及軍械無算三十日民軍與官軍在三道橋左近交戰官軍不支而退民軍越三道橋入嚙口復與官

軍大戰降官軍三千餘人

九月初一日漢口官軍與民軍未交戰

初二日漢口官軍與民軍仍未交戰

初三日早八句鐘民軍與官軍互相開炮各有微傷

初四日民軍與官軍交戰於七里河互有損傷傍晚兩軍各收隊

初五日官軍進攻江岸車站前哨已抵一道橋爲民軍擊退是地爲民軍重要之地有守兵千餘列炮數門盡力防禦官軍以大隊未至故不敢進擊

初六日午前六點鐘駐屯礮口之官軍向前進發抵二道橋與民軍守兵相遇小戰片刻民軍卽退官軍進至一道橋與民軍開戰官軍發礮術頗精彈多命中民軍不利而退官軍卽進占江岸及戴家山一帶之五陵布礮多門向車站之民軍開擊是時停泊於陽邏之軍艦亦駛至向車站開炮以助官軍其勢甚猛民軍因退至日租界後官軍又進逼民軍力不能支遂沿鐵路線退往大智門官軍佔有江岸車站並獲大炮鎗械若干是役也午前七時開戰約戰三小時官軍約五千人人民軍約二千人死傷各百餘人午後一時許民軍得武昌援軍六百人炮數門遂再向江岸車站進攻官軍布隊迎擊並用野砲向大智門開發民軍冒彈猛進一軍出跑馬場一軍沿鐵路線出日租界後併力進攻官軍於

漢

鐵路線上排列機關炮專擊沿線來攻之民軍民軍遂退伏跑馬場兩旁以俟官軍之至官軍又分兩路進逼互相奮鬥民軍不利退至大智門官軍乘勝前進民軍又舍大智門而退時已晚遂露幕附近以守是役也民軍之死傷者六百餘官軍之死傷者七八百爲近日罕有之大戰也

初七日午前官軍由大智門進攻民軍據歆生街附近爲根據地排列機關炮於要地以阻之午後仍進攻大智門以期恢復勢力而官軍不爲所動且多發開花彈機關炮民軍仍退守根據地至五點鐘民軍敢死隊自他路進攻大智門仍不利

初八日黎督以新招之軍出戰未利因改撥湖南新軍三千人由老將李克果統帶又派武昌精兵二千人由健將金長統帶又設炮二十尊以備與官軍劇戰上午民軍渡江向大智門與官軍劇戰官軍敗退死傷頗多適援兵至遂復前勢併力擊退民軍民軍伏民房中開鎗攻擊多命中官軍不得進多死傷者乃退守原地是時官軍已得大智門劉家廟一帶遂有鐵路全線馮國璋本駐灑口以北至此始進駐劉家廟當晚官軍又以野戰砲轟毀大智門一帶民房因民軍伏民房中擊射大有不利故也民軍遂退至街市中堅守要地跑馬場至街市前部盡爲官軍所有

初九日之戰兩軍互有勝負是日上午官軍佔據漢口設砲數尊意欲轟奪漢陽兵工廠

漢 口 小 志

不意先爲民軍偵悉卽屯兵大智抄襲其後一時槍砲兼施官軍不支而退

初十日官軍之散布於鐵路旁者爲第一軍第三協之步兵在玉帶門後置有砲隊在大智門兩旁亦均設砲隊民軍亦嚴整以待蓋恐漢口一失漢陽卽危故抗擊之時奮勇尤倍兩軍戰至最近時民軍之敢死隊伏而不動迨官軍進至一百米突乃蹶起衝鋒北軍死三千五百餘人全軍幾爲所覆

十一日漢口官軍與民軍休戰惟官軍仍在漢口華界縱火居民紛紛逃避路上往來祇有赤十字會員外國人及官軍民軍則盡退入武昌漢陽

十二日漢口官軍與民軍仍休戰兩軍各開數砲而已官軍在漢口自初九日晚縱火至今日尙未息外國人所設普愛醫院育才學堂等亦被焚外人嘖有煩言華界成爲一片焦土

十三日漢口官軍與民軍仍休戰惟大智門以下之官軍嘗開砲擊武昌漢陽武昌塘角砲台亦回擊之

十四日午後三點鐘漢口官軍與民軍交戰薩艦亦在武昌下游開砲助攻民軍乃發青山上之大砲數下官軍不支民軍復派軍襲官軍之後獲火藥十三箱銅元十四萬晚間民軍奮勇前進勝負未決而官軍卽退出火車站民軍傷兵亦運回醫治

十五日漢口官軍與民軍又交戰兩軍互發鎗砲皆不甚得利民軍乃由武昌鳳凰山發礮攻大智門官軍死傷甚衆降者約四百餘人分七船渡江安置官軍復設大砲四尊於漢口跑馬場爲攻擊漢陽之用

漢 十六日黃興統率湖南精兵自武昌渡江至漢口與官軍交戰官軍不能敵棄械投降者數百人逃亡益多

口 十七日民軍與漢口官軍休戰

口 十八日漢口民軍與官軍交戰終日未息漢陽武昌漢口三處均用大砲彼此轟擊勢甚猛烈官軍漸退將砲車移至租界後面乃舍大智門車站而去兵士四百餘名傷者不計其數

小 是日之夜半官軍用駁船數隻意欲渡江攻武昌爲民軍擊退

志 十九日漢口官軍千餘人携大砲數尊由馬路至橋口爲漢陽民軍所知遂將龜山之砲連放數次擊散官軍之步隊官軍亦燃砲回擊漢陽民軍幸未損傷而官軍死者約百數十人其後漢陽武昌兩處時以礮擊漢口之官軍旋有民軍游擊隊數十人由漢陽上流

渡河至橋口遇官軍遂鎗擊之斃多人午時官軍之駐劉家廟者以礮擊青山之民軍民軍亦發礮回擊遂將官軍所據之礮台悉數毀壞卽軍械亦大半受損

漢

二十日漢口官軍圍攻漢陽礮聲大作民軍礮台回擊傍晚始止官軍又在招商局碼頭
蘆船上專擊乘船渡江之人斃者不少各國領事以其違背人道公議致書清軍統領不
得有此野蠻之舉動

二十一日漢口招商局碼頭蘆船內載有官軍數百人遇船隻經過輒開槍亂擊受傷者
甚多路人亦多被鎗傷者各國領事照會馮國璋請爲禁止旋爲民軍由武漢開砲攻擊
船中兵死傷甚衆晚八句鐘民軍游擊隊乘夜擊官軍官軍死傷一百餘人退駐孝感蕭
家港一帶留三四人紮橋口

口

二十二日有官軍醫官四人從漢口渡江至都督府投降

小

晚間漢口官軍開砲擊武昌民軍拾得砲子二枚呈軍務部查驗知爲薩鎮冰所率兵輪
之砲子

志

二十三日漢口續到新軍二十四車均服灰色布衣駐大智門外時出游行至花樓街擄
取殷實舖戶甚至破扉入內飽掠以去

是日漢口之官軍屯聚於招商局內晚間置四砲於屋間向漢陽攻擊龍王廟並武昌鳳
凰山之砲台亦均互相發砲十一句鐘始止民軍由漢陽砲台還擊之燬其招商屋面之
一砲餘遂不敢復擊

是日官軍在橋口一帶築炮台兩座并設行軍鐵路一條又在王家墩罐子湖地方設有九寸口徑大砲三尊卽以漢之自來水塔爲瞭望台

二十四日漢口民軍偵知租界後面有官軍駐守乃在武昌大堤口以砲擊之誤損租界房屋英領事卽與黎督交涉允囑各軍自後格外謹慎

漢
是日午前風雨大作寒氣逼人官軍衣薄苦寒加之居民逃散食物無從購覓飢寒交迫各有變志民軍偵悉先在鳳凰山龜山開炮將官軍所儲招商局臺船上之糧食擊沉官軍大亂革軍乘勢分三路進攻時值大雨昏黑官軍敗走死傷五千餘人退駐歆生路劉家花園以下

小
二十六日武昌民軍於四點餘鐘渡江與官軍交戰時值大雨進行甚艱戰至夜三點鐘時民軍勝佔橋口

志
二十七日黃興派兵兩隊攻漢口一由黑山上面潛渡漢水一由孝感包圍官軍之在招商局碼頭臺船者被鳳凰砲台擊沉退駐大智門午時民軍復佔跑馬場六時官軍在劉家廟之大營聞警出大隊抵抗民軍退回漢陽獲砲三尊子彈無數

二十八日漢陽民軍於黎明分三路進攻會合於橋口午刻與官軍接戰無甚勝負民軍復以繩繫空船三四艘由漢陽沿江直放下游官軍見之恐其乘夜暗襲將橋口之兵沿

漢

口

小

志

河列陣各砲齊發向空船亂擊天明方知中計當夜龜山炮台乃以大炮猛擊漢口沿岸之官軍死傷甚多駐於歆生路官軍炮隊亦發巨炮還攻至次晨四句鐘民軍始將空渡船收回而官軍已擾攘終宵矣

二十九日漢口民軍與官軍交戰適已降於民軍之海容砲艦及江貞江泰魚雷艇兩艘由九江駛漢行近劉家廟官軍遂開炮轟擊該艦加力駛過官軍乃擊最後之魚雷艇亦未中海容見之回擊官軍死三四百人

是日渡上流乘虛襲得距漢口六十里地之蔡甸鎮

三十日漢口民軍官軍交戰兩軍皆用開花彈相擊互有勝負死傷尙少武昌砲台又開礮轟擊招商局碼頭傷躉船一隻

是日又克復羅家墩漢豐灰麪廠

十月初一日午前七時官軍以大砲攻漢陽兵工廠被民軍還砲擊退官軍土壘之糧台又爲民軍大別山之砲擊燬

初三日漢口官軍三千人衣民軍服持白旗由新溝設布橋私與蔡甸來之官軍相合佔雨淋山美娘山等處曾與民軍迎戰於美娘山互有死傷

初四日漢口官軍一鎮出全力以爭蔡甸下之雨淋山午後民軍復奪雨淋山獲機關砲

二逐官軍於十里堡

十三日武漢兩軍相約停戰三日

十六日武漢兩軍接續停戰三日

二十七日清代表全權議和大臣唐紹儀自漢口至上海寓戈登路英人李德立君家午後往謁民國議和代表伍廷芳君（二十八晨）伍君答謁遂面訂二十八日在英租界南京路之市政廳會議

十一月初一日南北兩方復訂定自初五日起接續停戰七天

是日漢口官軍炮擊鸚鵡洲黎督以其違犯條約照會英領事轉詰之

漢口小志

聽竹廬叢書之一

藝文志上 駢散文

漢

漢津賦

漢 蔡邕

夫何大川之浩也兮洪流蘇以元清配名位乎天漢披厚土而載形發源自乎嶓冢引漾
 澧而東征納暘谷之所吐兮兼漢沔之殊名總吠澮之羣液兮演西土之陰精遇曼山以
 左廻兮旋襄陽而南縈切大別之東山兮與江湖乎通靈嘉清源之體勢兮澹澹潏以安
 流鱗甲育其萬類兮蛟龍集以四遊明珠胎於靈蚌兮夜光潛乎元洲雜神寶其充盈兮
 豈魚龜之足收於是遊目聘觀南援三州北集京都上控隴坻下接江湖導財運貨貿遷
 有無既仍風颺蕭瑟勃焉並興陽侯沛以奔驚洪濤湧而沸騰願乘流以上下穹滄浪乎
 三篋觀朝宗之形兆看洞庭之交會

志

小

口

漢川贈言賦

梁 蕭綸

張雲麾聞望之美作牧南蕃維舟江漢留連飲餞發邁有期會面無日依也別袂恨恨江
 干古人贈別以言聊爲贈言賦曰

昔人有感於知已深情投分於斯已矣相知勢利之朋實君子之所鄙靜言神交之際亦

難得而且美豈直鮮其令終曾自聞其善始日踰久而益敬蓋惟一人者爾語同志而好合諒今古之皆然苟託御而自悅徐因芻而請前况英聲與茂實乃絕後而光先似臨潭而對鏡若披霧而覩天欽愛顧之罔已良佩服之在旃資淑美之上才超羣雄而獨峻法既深於萬頃牆有高乎數仞思若神而泉涌文如華而玉振伊薄軀之固陋謬攝官於夏洵知美錦之難裁處勞絲而易結幸中途而遽止仰旌旂之踟躕似德星之東邁類祥雲之西徂亟留連於河渚或終宴於城隅賞既延于賓友懽亦洽于僕夫嗟灰琯之易逝慨離袂之云促惜日車之不駐恨流影之難續觀善誘而不倦餐好音而未足佇浮雲之可寄願無比乎金玉

江漢懷音賦

張纘

西平邵陵王以親賢近能作蕃夏首下走叨竊時命驅傳湘羅久託夏風素蒙淑顧及途經鄢郢淹泊累旬君王彈碁珠於千仞乃貽之以麗則詩曰懷我好音敢爲懷音賦云爾伊宗周之令望巡召南而述職襟帶鄖夏之鄉宣歙江漢之域服詩書於懷神抱仁義於胸臆總九德以棲身橫四濱而撫翼循微躬之末迹謬馳傳於衡嶽由洞庭而左轉指鄱澧而爲期仰芳塵於頁汭路將近而彌滋棹陵波以過鷺舟望浦而轉遲自清光之未覩逾一紀以歷茲敢憑情於往昔逢君恩之未遺陪桂苑之良遊接蘭台之高會既醉酒以

飽德亦傾羞而緩帶感平原之愛客傷歧路之難留戀西園之餘賞泣南浦之徂舟結煩言於將贈情有重乎琳球願龍門其不見過夏首而西浮申服義之未沫長寄函於還郵

漢水論一

宋程大昌

漢水之名稱迹道隨勢變易固不可主一據以爲定至於漢之源必爲漾發流之山必名蟠冢入江之地必近大別經營明書以詔後世使無此山此水則已如其有之決不可掇而知他也今桑氏水經曰漢之源爲沔也出武都沮縣不出蟠冢也已又別出一條始名爲漾也至隴西氏道有山焉始名蟠冢蟠冢之派又東至武都沮縣始爲漢水而此之漾漢乃絡蜀爲派經葭萌劍閣至巴之江洲入江名與經同而所謂漢非經之漢也此其說之分於經也遠矣經之叙漢曰蟠冢導漾東流爲漢又東爲滄浪之水過三篋至於大別南入於江東匯澤爲彭蠡夫蟠冢滄浪三篋今爲世傳所亂未易以筆舌折衷然天地東西之位亘古今無易也經叙漢漾其初流東已乃轉南旣已入江則又東下其位置可考甚明也以今漢派言之自漢中至武當則皆東也自襄郢而入於江則南也自合江而入於海則又復爲東攷定其方則夫水道之與經文古今悉無二致而又大別小別春秋時吳楚嘗陳戰於其地則此水之爲禹貢漢派古今知之更何他疑哉至於水經別出漾水以爲西漢者使其眞爲經之漢派則自此便皆流東乃與經應而乃有大不然者自沮

縣以至葭萌五六百里水皆西南以流其偶有一折屈東者百不一二也經謂滄浪之水縱無定著而西南流之不可指以爲東也必矣然則經以流東書之而此水乃自西南其鄉其可認以爲經之漢水也乎况下流之謂大別者今漢陽誠有此山而西漢之合岷江雖後世傳曾差譌之久亦無一山嘗有節名以爲大別者則水之所向山之所麗悉與經背其尙可指以爲漾出之漢乎經雖嘗因梁州貢道有逾沔入渭一語自此以外所謂沔者絕無旁證今不據漾漢之源委者信其同爲一水而別摭逾沔一字創立水派乃至分漾漢而二之庶無問大禹桑扈之孰可信也第以世數先後斷之孰爲處世傳未訛之初乎而直以爲味味亦已左矣

漢水論二

前人

古來第有漢中襄漢之漢何嘗有興利閭黎之漢哉周官以荊州爲江漢詩以江漢爲南紀春秋之漢東漢陽江漢沮漳齊威公登熊耳望江漢皆荊州也雖漢之發在梁州正北故有岷嶓旣藝著之於梁然此之嶓冢卽漢水發源之山當在今興元水派東流之地而非西都以後謂爲西漢水者之地也况博稽前載今世之謂興利劍漢等卽其州名水道凡因事而見之先秦古書者未嘗有一語而及漢水是敢斷言其誤也然則其誤何起曰是有始也漢高帝之南鄭也卽漢中郡名命國爲漢而漢中之所以命郡者亦正以禹貢

漢

漢水立名而禹貢漢水乃今興元洋金以下東注而合於經者是也此時未有興利間號爲西漢者之派之名也帝嘗資巴渝兵力以定三秦既得天下乃置郡乘鄉而名曰廣漢以寵光其地其曰廣漢云者則以拓大始封國境爲義如武帝徇楊僕展關之請而使其家得在關內之意察其立名非漢用沔起義甚明也自廣漢之名跨劍利以南而西都之世不究其本遂有誤認嘉陵一水以爲漢水者班固仍襲其誤因又明載之志曰水武都受源於氐道而過江夏入江者是爲東漢出西縣而南入廣漢者是爲西漢東西漢既已對爲之名矣則又因其水之所原而名山以爲蟠冢因其流之相近者而命之以爲潛水傳習既久至於桑欽許叔重輩皆祖本其說以爲誠然於是禹貢之漢不得爲漢而遂爲沔漢水發源之山不得爲蟠冢而西縣之山實得名之其誤已著至於今之雅年並西漢水名之誤而秦州又與武都相去不遠則皆有山名爲蟠冢則與古漢全不相關於此類且言之沿流而失本真固有不勝其辨者也且漢嘉漢壽漢源漢初漢州皆嘗卽漢以爲之名世儒因其有是名也而反舉未證本曰古而無有此水則安得有此名也抑不知是名者其在未名廣漢之前邪抑循沿其後也若因廣漢名郡而移其誤於水因水名之誤而移其誤於郡縣則其創襲先後之間一言可判而何用屑議其末邪

志

小

口

漢濱賦并序

藝文志上

明李夢陽

五

余過解佩灘憶交甫遇女之事於心感焉作漢濱賦

夫何二女之頎麗兮遵蘭皋而並翔順微風以鸞顧兮曳文桂而交揚躡雲鬱之華履兮
皎羅襪以雙步凌漢潭之愍波兮掇瑤草於芳露態婉變以窈窕兮情同嬉而中乖超灼
匕以齊赴兮忽含顰而悲偕眉疑低而復伸兮唇欲啟而羞面嗟巧笑以回瞬兮目盈
而流盼翩兮驚鴻恍若裊電仰西方之織月悵避后於嘉夕足將移以躑躅魂已逝而聿
役怍多露於蔓草矩漢廣之真遊戒有粲之奔密慕娥英于湘流揮柔袂以掩涕寄朋素
於明璫效雞鳴之贈珮厲霜心于鮫光倏潛耀以莫覩撫衝飈而懷形睇征雲以西迅冥
飄芬而淚零面三星以申脈悔朝陽于首疾伊綢繆之幸諒詎穀焉而同室

同參知江公納言劉公都護余公漢江泛舟賦

童成紱

志 小 口 漢
臨襄樊兮城嵯峨俯漢沔兮江逶迤滉漾兮流汰縹渺兮巖阿集冠蓋兮枉渚泛樓船兮
盤渦張芳筵兮膾鮮鯉擊鼉鼓兮鳴鏡歌風飄揚兮烟樹渺鷗鶴兮紛鴛鵝瀨齒兮激
石岸蒙茸兮披蘿眺鹿門兮慕真隱瞻降中兮頌勛華思銷憂兮騁望悲哀郢兮懷沙嗟
世罔兮羈束淹時序兮蹉跎奉明恩兮休澣忽臨睨兮潛沓羣公枉嘉剌瓊屏兮顏配雲
靄匕兮翳日飈儻匕兮增波感茲遊兮容與撫淑景兮惠和矢永保兮修姱託勝迹兮弗
磨

漢鎮堡垣記

湖廣總督官文

漢

口

小

志

竊惟楚北漢口夙稱巨鎮控吳皖之上游扼江漢之門戶漢陽在其南武昌居其左星羅碁布犄角爲三襟江帶河雄視全楚誠古今扼要之區也慨自乙卯秋燬十兵燹瓦礫空存余任茲封圻埽蕩煙氛與民更始者九載於茲矣迺近年鄰氛時犯鄂邊未必不覬覦及此余覽漢皋之大勢籌三楚之全局慨然曰是鎮也能不圖長治久安之策哉於是率同文武官紳採輿論度地勢議以上自橋口下及沙包計長一千九百九十二丈二尺約十一里許築堡開濠建立礮台以補長江之險告之天子制曰可詢之芻蕘民曰便大役興矣而工程孔鉅經費不貲可若何爰集闔鎮紳商而謀之衆情允洽欣然解囊先得房捐銀十萬存奇繼獲衆商捐資十有五萬賴茲裘腋克濟要工維時遴員選紳鳩工庀材諏吉興工構木椿以置基採紅石以成垣開堡門八座建砲台一十有五工堅料實費不虛糜經營一載大工乃成其形勢之雄壯規模之崇宏已赫然鞏若金湯矣是役也余深幸釀資踴躍衆志成城保漢皋卽以保全楚從此樂與楚人共安磐石也且不特四方商賈畢萃於斯卽各國洋商亦咸懋遷服賈共固藩籬同資捍衛益以仰副我朝廷柔遠能邇天下一家之至意焉故特記其崖略於此籌款者爲湖北布政使厲雲官督修者爲漢黃德道鄭蘭鹽運使銜漢陽府知府鍾謙鈞漢陽營游擊施鴻恩監修者爲補用知府襄

陽同知艾浚美候補通判張東甲署漢陽同知蕭蔭恩通判玉璋署漢陽縣知縣孫福海
卽補知縣金東昫李振麟在籍湖南卽補同知胡兆春督勇開濠者爲協領喜昌總兵梁
宏勝應得併書

漢

夏口攷

楊律

口

漢口一水異名蟠冢有二源東流爲漢至大別入江爲漢口此本名也西源爲沔逕葭萌
關入漢故又爲沔口華容縣有夏水首出於江尾入於沔夏水與沔水同至大別入江故
又爲夏口此夏口之所由名也夏口沔口總是漢口已上三說俱載禹貢蔡注春秋楚伐
吳蘧射以繁陽之師夏會於夏汭行厨集謂即漢口離騷遵江夏以流亡過夏首而西浮
一統志謂即漢口又云魯口卽夏口魯肅祠墓在大別因名大別爲魯山漢口爲魯口則
夏口仍漢口也再參之楚世家靈王圍徐懼吳問郢都內叛乘舟將欲入鄢史記正義云
王自夏口從漢水上入鄢左傳王沿夏將欲入鄢杜預注鄢卽襄陽宜城縣靈王自江南
上襄陽漢口必由之路則所謂沿夏者非卽漢口乎又參之南史梁武鎮襄陽起兵平齊
出夏口駐赤嶼下金陵武帝自襄陽下建業漢口亦必由之路則所謂夏口者非卽漢口
乎再攷一統志吳王孫權在武昌城西黃鶴山築夏口城因正對漢口故取對岸名夏
口唐章懷太子注後漢亦謂夏口成故唐史皆稱鄂州爲夏口李白遊郎官湖序云尙書

志

小

漢

郎張謂出使夏口劉長卿詩自夏口至鸚鵡洲望岳陽皆謂鄂州蓋夏口本即漢口自孫權取對岸名夏口而漢口遂不復稱夏口矣如謂夏口非漢口則所謂黃鶴山正對何說也經史子集在在可據人所以紛紛聚訟者或不知夏水與漢沔同入江也本縣舊志亦謂夏口即漢口又聞此水在華容夏盈冬竭故名夏水云

漢口義塚碑文爲徐參議作

顧景星

口

月令孟冬掩骼埋胔所以息蓄沴達陽氣也漢制因之刺史守令之賢者賑卹訟獄而外視茲爲重宋富鄭公知青州大旱飢民死者爲大塚葬自爲文以祭康熙辛亥知備參議江寧徐初入楚境歲適告凶多方賑救所活不下數萬人老弱疾病不起者量給薪藁遠方飢殍或屍浮江上多年淺土或狐搯虎跑公申命地方悉行收瘞而斲則耆善某某僧某某聞聲興作募築叢塚収骨千有餘具漢口近爲沔陽流民占寓負渡爲業小舟鳧雁點點江面操楫雖多覆溺不少公因造快船於沿江險闊處專伺風泱赴救覆溺買田以贍水手買地以備掩埋舊日穹苦無力棄置風雨草莽及揭糶以待無人收葬者而今皆得黃壤七尺青蒿一叢嗚呼秦獄之虫苦酒頓消螞蟻之攻春風亂聚誰謂死者之無知哉使上之人寬賦詳刑哀矜勿喜民得養生送死無憾物無夭扎水旱不興豈非堯舜之盛治有司之奉職哉是用鐫石以彰公德垂永久其義田若干畝塚地若干丈費價若干

志

小

兩勒諸碑陰

白蘇堂集

漢南詩約題詞

雷楚材

十

漢

口

小

志

從來勝地必產偉人自古英流皆饒傑作詢鄴下之名家才儲八斗問隴西之公子錦滿一囊籍原襄水杜少陵之佳什何多家在眉山蘇長公之名篇不少况乎峰當翼際山映星文流合岷江波通地脉聳天半之芙蓉九真西峙界波間之鷗鷺三眼南橫金牛與白馬連羣玉筍對紫霞作障萋萋芳草迷離鸚鵡洲邊歷歷晴川蕩漾鳳凰山下鬱盤地氣蔚起人才騷壇競上協鳳管於宮商寶鼎齊扛紛龍文之錯落丹篆吞餘無心不錦青蓮夢後有筆皆花爭思抒寫性靈不肯侈誇香艷或分曹薇省早朝壯閭闔之篇或淹迹衡門夜月寫罨罟之句或遨遊而覽興登臨大得江山之助或顧領而悲歌慷慨何嫌塊壘之澆雙鬟唱而璧畫旗亭牛酒酣而鉢催邸社莫不逸興雲飛豪情鸞舉也然而浸淫歲月不盡流傳剝蝕鼠蟬漸歸澌滅碎壺以往陳迹無多覆瓿之餘殘縑偶賸問或購來雕本集止專家縱能搜得秘藏行多脫簡字迹模糊看去譌治帝虎聲音拗戾傳來調有妃豳此則不無人往風微之感彌切碑殘碣斷之憂矣爰乃廣以搜羅不使珠遺滄海勤爲訂攷務令玉積荆山琳瑯滿目如登委宛之峯璀璨連篇儼入波斯之市嗟乎隻腋成裘恒資裨積釀花作蜜頗費經營輯成脞錄無非芍藥之花藏入巾箱盡是珊瑚之樹擬攔

筆於黃鶴樓頭應推絕唱索解人於伯牙臺畔定有賞音

四官殿碑記

熊伯龍

五行皆生人之資獨火烈民望而畏之蓋有神焉不可度思矣苟祝融煽旤而當事者漫不經心吉凶同患之謂何何燮理之爲也楚介南服火德居望而漢鎮又適當九達之衢黔廬赭壁何時蔑有人共知其爲竹籬茅舍之所致而終莫敢有建議毀易者蓋凡民可與樂成而難於慮始自非有實心任事之監司主持其上奉行唯謹之守令勸勉於下求其能任德任怨也憂憂難之天佑南國萃此吉人方伯劉公臬司陳公監司饒公王公朱公及都閫錢公商同我守憲程公毅然下誅茅之禁檄行郡縣易以巖壁維時太守揚公邑侯侯公實左右之下逮縣尉李君鎮司王君亦駿奔恐後旬月之內向之黃茅白葦一望而百堵皆興苟非循良素著何以得此於民哉乃公等猶謂人事之已盡未必天數之常亨敬詣祝融爲民請命爰是自步江潏見有四官之舊廟在輾然喜曰有是哉江漢合抱洒沈淡炎此眞水火既濟之鄉神靈憑依之所乎各捐俸金若干並及本郡紳衿商民量刀資助革故鼎新而廟貌由是改觀矣乃或者不察徒以泛泛祈禳視之不已過與夫許不弔災君子惡之謂其不近於仁耳他若反風滅火事涉不經者皆吾儒所不道曾大君子而出此乎春秋書昭公十七年有星孛於大辰後漢晉梓慎知其將火鄭裨竈又謂

漢 口 小 志

能弭火不用吾言將復火乃國僑卒不用竈言而亦不火非修德而災不能侵之明驗耶今乃以天道杳茫之故徒乞靈于土木莊嚴之相予固知公等之必不出此也蓋公等意念深矣誅茅之禁既有以盡人事之當然廟貌之新又有以回天意之或然且以示後之接踵蒞茲士者瞻宮廟之嵯峨發晨鐘之猛省入廟思敬固即焚惑退舍之大本云

漢口叢談序

熊士鵬

癸未人日冒雪赴西城飲歸自黃鵠山麓至東坡一路瑤林瓊樹朗朗如在玉山上行甫入門呼兒煑雪烹茗見范君白舫漢口叢談列几上乘醉披讀遂至終卷而止白舫有儻才而家貧工詩尤善詞合姜史蘇辛爲一手浙東西無出其右游漢上與常芝仙交最久芝仙善畫白舫善詞得兩人一畫一詞世稱雙絕皆隱君子也嘗持茗谿漁隱圖示予見圖中題跋詩詞俱超逸有致皮置箱篋者四三年忽傳白舫自巴東來始促予題其圖云茗水冷冷雪水瀦瓜皮流入范蠡湖分明自號鴟夷子又作煙波一釣徒蓋贊其高也白舫因爲予述巴蜀山水之奇與臨洮陸秀三携酒下榻於巴山瀼水間戀戀有故人情秭歸爲屈清烈公故里舊有祠秀三於正月庚寅招白舫具酒漿果餌爲文以壽於祠下白舫以事牽未來亦謹寄桂藥一器湘月詞一闋以助祭予讀秀三文佳白舫詞亦佳靈均之後又得二妙矣白舫初在漢上與黃穀原同居其相莫逆如芝仙後穀原屢徙于鄂始

克卜築于騰山之東予亦棄官隱東坡與穀原相鄰近白舫既時時過從又嘗得芝仙作渡江游俾予周旋跌宕其中携手登城樓見郭外左江湖遠峯近巒送夕陽迎素月以抒寫其胸懷詩畫之趣楚中自有此山水來不知其幾千百年未見有嶽崎歷落如吾數人者世徒逐逐車塵馬足間且或嫌其荒遠闊而置之不必問然後知山水詩畫之奇往往見阨於熟客要人而爲嶽崎歷落之士所心賞者亦未易多覩乃至今而始有吾數人不可謂非茲地之幸抑此中或別有數焉存乎白舫既以其在漢上聞見者編爲叢談予亦以其在荆湖採錄者實爲知舊詩鈔其意豈異也自古羈人游士所過通都大邑必有山水供登臨山水之隱見異同必有詩詞備考證其錯處乎山水者古寺名利足以寄嘯傲其傳述乎詩詞者高賢逸民足以資蒐羅短裁促筆各自爲書前人如吳船入蜀其最著矣近世則有余澹心板橋雜記亦未嘗廢焉然此祇可與嶽崎歷落者道亦難爲熟客要人言也因走筆書于卷首紀其實而夜漏三下戶外已堆雪一尺餘矣東坡愚弟熊士鵬拜譔

西來庵碑記

黃 澍

大清受命方懋厥德山川鬼神亦莫不寧先是二年乙酉大司馬佟公秉節鉞拜命南征北至南條荆山南盡衡山之陽惟是振響萬里鐘鼓式靈公之化行自南國始也江漢士

漢 口 小 蘇

女當巨寇發難以詘肢體殘毛髮仳儻如落星受痛似頑石楚之氓之無樂郊也幾十年所自我公督楚入吾民重胎而更化育之鞠匕然父母也規匕繩匕然師保也溫然春也廓然萬間屋也憫匕然佛也眷容寬大適適然仙也楚民甫脫湯火出登春臺其能一日忘公哉漢之人祠公澍來楚也晚未及文以壽貞珉越明年丙戌公又受弓矢征南服之不庭南人投戈有苗來格公方歸受賑於朝弭節漢土是公三年前櫛風沐雨之所及也是公左匡文右繩武勞來教訓之所集也是公春風風人夏雨雨人之所治也漢上諸侯會於此者睇山河之疊渺俯舳舻之巍峨視駘黃之新勸溯谷岸之舊德何一非公威神德業之漬被而公猶謙讓未遑視賢若渴見善如不及一民飢曰我飢之一民寒曰我寒之一民失所曰我失所之徵之外傳凡龍興之彥天上星山中僧世外精皆非常才而爲淵岳不敢蓄所以公一出而東南底定再行而江漢激清事事不朽公而公翻託其意於一椽一舍一瓦一壁以不朽公者不朽佛西來庵之所由起乎庵址濱漢之北岸當是公曩年眺覽游玩之所今廓其基而光大之意亦如陶八州之寒溪李藥師之東武郭令公之夜光寺韓蘄王之翠微亭聖賢豪傑都有寄託以寓其悲世憫人急切婆心喚醒沈迷一切是我現佛身說法始終胎吾民而化育之之意乎是役創始者公樂與公同其事者藩王勳貴各捐重資子輿氏有言君子莫大乎與人爲善後之君子庶幾居者有魯靈光

之思游者有召伯甘棠之詠西來庵得公不朽矣

春秋樓記

劉曾

漢 夫樓何以春秋名也攷春秋係魯史東周以還王綱欲墜我孔子懼萬世君臣之道不明不得已而以宗魯者宗周託春秋以見志此春秋之所以有其書也若漢自靈獻守府無異東遷而當時漢統在蜀我關夫子欲以存蜀者存漢志春秋之志此春秋之所以有其人也漢陰之西北隅秦晉諸君子建關夫子廟後起危樓規模宏麗肖夫子讀春秋像於其上此春秋之所以有其樓也嗚呼麟經一書繫萬古綱常當其筆削獨斷非所稱游夏不能贊一辭而公穀左胡僅得其貌焉者邪我夫子以布衣起戎行踰七於金戈鐵馬之間而討賊大義如揭日月東魯心傳若合符節是豈必斤斤焉取二百四十年之史如經生家咕嗶穹年皓首一室搜遺跡於往帙討故實於殘編也耶則夫子所讀之書謂魯春秋也可卽謂漢春秋也可吾因之重有慨矣當日周德雖衰而魯有聖人漢祚雖微而蜀有夫子乃一則坐老洙泗而東周之志託諸空言一則困守彈丸而滅魏殲吳竟成遺憾豈天之所以位置聖人者獨此杏壇一片席荆襄一塊土哉亦何遭遇之窮如是耶今試登樓以望彼武昌夏口之間月明星稀橫槩而賦者猶有存焉者乎東指吳會彼樓船鐵鎖擁三世之業而據長江之險者猶有存焉者乎嗟乎銅臺消煙吳宮埋草亦知數千

百年後摩盪日月倚仗乾坤巍巍然與魯之東山相峙而有此春秋樓者乎吾願登斯樓者毋徒詠漢陽芳草與晴川黃鶴同爲嬉遊眺覽之所蓋所以作忠臣義士之氣而非以供騷人墨士之娛此春秋樓之所以有記也或曰夫子之神在天下家尸戶祝而成斯樓者皆秦晉人意者其有私祝歟余曰不然譬之日月經天薄海同照而扶桑崑崙之區炙光倍近夫子晉人也山秦與晉隣亦若扶桑崑崙之民雖不求私照而得以習睹日月者天下莫得而踰也我秦晉人之成斯樓也亦若是焉云爾

豫成園記藥王廟東廂別墅

程秉

王冕三間之屋只種梅花子山數畝之廬略栽修竹豈不延雲受露借日支風特是邱壑膠匕未免谷因愚辱池臺落落固應齊以蕭名居僅容閒樂剛宜獨至若輦山溝澗迸巖泉於闌闔之中卜築買隣澁水木於諠囂之外潘岳面城而發遐矚晏嬰近市而契淵襟

佳辰適足雅游上日每饒勝集莫不綃紈絳繡絲竹駢羅慕梓澤之華奢踵辟疆之幽邃知不徒巢中日月巢父棲遲壺內山川壺公容與者矣則有豫成園者爲覃懷同人之肇修即漢上寓公之別業也乃瞻梵宇傍達芳園築之登而削之憑豫順以動瀏如蠲而印

如積聿觀厥成十畝之間百步以外慧斐之園離垢自關哇町太素之館逍遙別有天地岡巒窮其迤邐院落寫其參差巡檐牙以相羊步廊腰而延佇玲瓏其構周匝而觀其爲

漢

樓也紺榭鏤楹朱甍碧瓦摩天百尺蹋雲一梯鈴忽語而風交簾乍鈎而月上排闥則遠山幾疊倚欄則長笛一聲聊以留仙亦堪招鶴其爲堂也循修弄以逕入趁重扉之未扃屈戌金搖罌罍綺合藥爲房而窻窳蘭作室而蕭森匡牀則焦尾橫陳松脂遞潤鄰架則押頭參錯簞粉常霑深柳讀書木蘭揮翰俄生虛白更落遙青其爲亭也長短若連方圓不定籐蘿代幃薜荔爲牆入窗而朝爽方凌半角而夕陽未斂載問奇之酒月酌成三催喜雨之詩煙尋再四墊巾客到蠟屐人登其爲沼也半畝初開三篙始漲盈七者水暢靈均澤畔之吟蒼蒼者葭溢蒙蒙叟濠梁之趣魚遊吹雪鷺點棲煙花亂落以千紅峯倒涵而一碧依稀桃渡近遮門鴨之欄彷彿柳塘遙接聽鸞之館墨香洗硯蓮動湔裳掬竟難盈流還可枕其爲石也粼七之質皓七之姿攻以他山介如終日一卷漸積靈岳之險怪爭驅數笏頻堆疊巘之嶮岼競起初平叱咤顛米摩挲狀齊女之宿瘤類丈人之痴僂蒼苔易踐綠蘿可捫環之奧窅繚以逶迤其爲樹也老幹維喬新陰可結輪困蔥蒨羃歷扶疏碧漫橫而雲濃青覆檐而霧重何處飛來烏鵲匝繞方三此中巢到鷓鴣枝棲惟一槐花撲地有徑皆黃榕葉滿庭無天不綠既上蟠而下屈亦左攬而右拿種松看作龍鱗養竹期聞鳳噉然而光陰自轉風景常殊春則東閣紅嬌夏則北窻綠淨秋則月媚山館冬則雪聚林皋晴媚晚霞雨滴空翠四時不改其樂半日又得餘閒送抱推襟倚裳聯襪借山

小

志

林以消塵務親泉石而豁性靈况復報李投瓜維桑與梓他鄉萃合庶適館而授餐此地花開可班荆而道故人多舊雨樹有新煙大山小山春社秋社酒旗戲鼓時張棚筍之筵帽影衣香偶趁敦槃之會江臯圖畫嵩洛精神不乏古歡都忘羈旅尋蔣生之三徑賓至如歸覓幼輿之一邱客來不速此固悅親戚之話成雍睦之風豈止務游歡極宴樂已哉僕也居隣漢廣生本楚狂胸有千間家無二頃陟治城而竄想盼秋水而馳神游於北園無踰我里因歌伐木用占盍簪問花而鳥使先邀看竹而主人俱在蘭當解佩叨陪北海之尊薇可浣豪遂作西園之記

白薺洲記

程秉

白薺洲者茶社名也主人王姓跡類枝棲名叨市隱環之以堵洽比其鄰地惟占以數弓齋更量夫十笏生涯本淡非黃公賣酒之墟笑語常諠豈白傅逃禪之社爰有息肩熟客聊以滌煩佇足勞人於焉療渴主人則呼童滌器命僕淪泉竈煖煙清瓶香水活雅貪七椀居然滿座虛全請試一槍不滅當年顧渚雖然家徒四壁恐類蕭齋屋僅三間幾爲陋室爾乃開池受月砌石延雲四株五株之花三竿兩竿之竹况復米家畫舫藉可臥遊周防屏風和將間倚廊以回而窻窻窗因廠而玲瓏佐晉人之清談設桓氏之寒具暖風人醉會須茗飲三巡寒夜客來認取鐙縣一點慕汀洲之寄託宛在中央挹蒼藻之芳馨何

志

小

口

漢

干衆草我非陸羽到來惟課茶經君是王濛供給勿嫌水厄

募助後湖澗水引綠豁草堂集

張宏殿

茫茫澤國野水連天渺七長隄洪濤匝地竹籬茆舍何堪任此飄搖土壁荆扉竟爾遭其
泪沒兒嗷婦泣卑濕難安浪打風摧起居未穩層波浩浩將沈屈子之魂逝水滔滔幾作
帝娥之石窮愁莫訴情景堪憐爰布片言徧申同志或贈范舟之數斛俾濟燃眉或脫孔
轡之兩驂另圖容膝遷喬出谷羣欣桑土綢繆革故從新競喜索綯緝密仰供俯蓄免嘆
蓬飄夜寐夙興均叨樾蔭覆巢之鳥不致無枝可棲漏網之魚猶幸有波能逝雖作衆心
之福實生比口之歡矣

募修漢鎮新安書院序

畢 沅

漢鎮爲楚省通衢遠方士商輻輳雲集於此一大都會也向建有新安書院奉祀 徽國
文公栗主凡我同郡之士往來過從即次如歸非獨團聚鄉井且以寓羹牆先哲之意蓋
肇自康熙甲戌鄉前輩捐資共勗闕丁酉有西廳之舉辛丑有義學講堂之設至乾隆乙
未復開康衢以通商旅並置市屋十餘椽取給租賃以足春秋二祀之需固井七有條第
歷年久遠風雨飄飄棟梁剝落且地形坎窞積水漫溢歲次戊申遭漢鎮水患水積數月
後檐牆垣又復頽塌若不及今修葺難免前功墮毀余自戊申奉 命持節來楚於今七

載幸得歲物豐成而民氣恬寧今年春鄉人漢臨衡士等集同人爲請曰此書院之議修舉久矣願築室道謀不成日以物力維艱又各因他故未暇今幸明公屏翰三楚惟此福曜所臨莫非天作之合念此工程浩大非撮土可成必賴衆擎則易舉且北構文昌閣西開謙射軒前人已立成格空餘基址有志未逮某等公議襄此鉅役願公賜一言弁首余惟江漢名區南北往還會館之設所在多有而新安之以書院名者獨以文公之鄉而重也余世家新安而通籍於吳念鄉人之爲此舉無非充其好義樂善之懷而維繫桑梓之本且其所以恪守文公之道誼家法者深矣余特述所以謀始之意如此惟冀同鄉諸老體昔賢締造之難爲後起觀型之勸交相樂助共破慳囊鳩工庀材刻期告竣俾館舍如舊規式一新往來者有於處之安而免瑣尾之歎則余於諸君有共樂焉是爲序

汪文儀傳

熊錫履

新安汪子文儀諱璿庠諱璿號默菴頑叟其晚號也生而穎異不凡四歲見塚中有金器弗取歸聞以失環詰侍婢迺指其處得之九歲通經書善屬文十三值國變暫撤制藝惟事節錄理學諸先儒書沉潛體認慨然具希賢之志昭然有黑白之分焉父惟晦公以孝友聞遂承之愈篤有弟二人早年痛弟璞不壽嘔血數升厥後復哭其季血症又作幾斃嘗嘆今人於妻子則曰分內事於父母則曰有兄弟在至於兄弟之倫則久不講爾我較

漢

口

小

志

然矣即有資助周之已耳殊不知分形一氣天合固無可比也所以古人不曰宜爾兄弟如夫如婦而反曰宴爾新婚如兄如弟璉家三百餘指待哺一身手口卒瘞而絲粟不私老死不二故能先行後從如此壯遊三吳聞東林講洛關之學遂執費高彙旃先生會講印證郵筒往復者四十年如一日其論學書有曰朕兆之說發自梁谿蓋見金谿所托於孟子先立乎其大者及求放心良知良能等語未暇推勘因謂入道各有派別若孟子之於孔子氣象迥不相同斷以吾儒學脉有二孟子微見朕兆朱陸遂成異同文清文成便分兩歧云云以調停之以爲學陸王者之敝而非陸王之自爲敝也不知金谿姚江當身陽儒陰釋欺已欺人心勞日拙已自一齊差却豈待學者而後流而大壞也哉故竊疑發此語時似未得諳清瀾之書良有以也且毋論其是調停與非調停細研此語原自有病說文曰幾微形見謂之朕兆然則朕兆者其未著未顯之異同兩歧乎異同兩歧者其已著已顯之朕兆乎微見者其遂成便分之所由始遂成便分者其微見之所由終乎蓋道豈容有二以爲氣稟則不止有二律以文章脉絡得毋等孟子於陸王乎夫岐孟子與孔子而二之與等孟子於陸王也而一之皆不可也在先儒一語之偶誤原不宜過爲推求今援爲甄別先儒之定論則恐僞以傳僞所失非淺尠也媿七千言其嚴辨如此中年學易晚而成書大抵以閑邪爲存誠之學素位爲寡過之方是誠有得於易者著有讀易質

疑語餘謾錄周易便讀平點學部通辨等書行世年七十四乙酉卒於漢寓密窩越丁亥始聞訃於其從弟珽爲位而哭以詩悼斯道之益孤也其一曰皓首窮經斥異聞扶節擔笈總論文新安家學堪千古江漢先生又見君其二曰交深契厚已多年荏苒浮沉各一天自恨虛生長面覩迨遙曳杖讓君先今春余以省墓還楚其孤匍匐舟次乞一言爲先人光往來江上倉卒未能也暑退涼生檢閱其狀述及遺書而高生大酉適十重以爲請兩姓道義之交蓋三世矣因力疾詮次其學行以答其意且以見斯人之自有可傳而亦以見余疇昔締交之不苟若夫易解之精詳文章之醇肆有目者自能知之何俟余嘵嘵爲子一曰鈞虞膳生孫三曰震亨升元師貞

小
論曰國初士大夫懲前朝之禍深晦講學之名有言東林二字輒口噤而不敢應賴梁谿二三遺老守先待後爲兢兢耳汪子生紫陽之鄉裹糧走千餘里拜道南而從高氏遊通紫陽之志使東南學脉稱會歸焉厥功懋矣然書有之曰非知之艱行之維艱觀其修身敎家無疚無惡以眎天侈口而談道學與緘口而不敢出者其相去何如也噫希賢之志吾謂惟汪子踐之時康熙歲次戊子桂月中秋日環川熊錫履拜書於清涼舊圃

御書樓題辭

漢口紫陽書院志略

潘宗洛書源

繫書院之枕漢濱兮屏木蘭而凡大別中有縹緲之飛樓兮瞰江南而踞湖北吾徽人士

漢

口

小

志

之肯構兮仰止乎紫陽夫子而景行列聖相傳之道脈余家自婺山遷於荆谿兮榮叨一第侍講於經筵之側沐君恩之浩蕩兮沅芷畹蘭命衡文於三湘七澤向寶吾皇大書子朱子之詩兮頌宸章於秘笈意臨池之染翰兮必有取乎六義之精切賜微臣之諷咏兮勉勵乎風雅比興之法則選良工鑄於貞珉兮以垂聖澤於無斃慶斯樓之齊雲兮離奎壁而咫尺乃擇吉以正位兮表風雲之遇合士庶羣瞻而胥樂兮共訝赤文綠字之奇特等神農之穗書兮類伏羲之六畫狀筆力於千鈞兮化右軍之八法儼神虬之戲海兮駕浪騰空譬彩鳳之鳴岡兮朝陽振翼瞻龍跳而虎臥兮豈人間之所易得爰額斯樓曰御書兮至大至高而不褻若夫序寂滅爲聖教摹虛無云道德匪不筆超而墨逸兮烏敢擬我天王之濬哲文明崇吾夫子之道於億萬斯年而光昭乎日月

半畝池記

汪份

池顏半畝本夫子之詩也天光雲影池中之景象若隱若現而源頭活水果能識所從來乎蓋吾人各具方塘各有活水汨汨沒沒不覺其鑑也不知其來也徘徊斯池徒爲半畝囿已可慨已茲於尊道堂後鑿斯池也要使學者塵淨天空涵煦萬有溯流窮源觸處見道夫水凝則垢活則清日日清又日清源頭在我矣故其淳蓄不洩得坎之道焉含宏光大得坤之義焉滿而不溢得謙之用焉順澈流通得巽之旨焉將見雲淨池虛天鑑鑑人

人鑑鑑心則半畝中一鑑道源洋洋乎隨在皆夫子之德水謂爲天池也可謂爲文淵學海也可爲記

願學軒記

董桂敷

漢 山不能皆泰華川不能皆河海光輝照臨不能皆日月此宇宙之精英間氣所獨聚雖造物亦未由自主者也人之有孔子也猶夫泰華河海日月也自開闢以來天地之生人不知其幾千萬億矣而不聞有二孔子天地之所窮也然而窮於勢而不窮於理理有所不可窮則人不得諉其咎於天天亦不能限其量於人此孟子所以有願學孔子之說也夫孟子之視孔子有間矣而其言曰人皆可以爲堯舜曰聖人先得我心之所同然耳雖推孔子爲生民未有而志願所在不以自外何也其同然者天命之性無不善而其皆可以爲者則存乎其人之學有聖性而益以聖學孔子之所以爲孔子由所性而學聖人之學孟子所以結願於孔子此固非孟子一人之私言而天下萬世人人之公言也然而孟子以來抱此願而無忝者幾人哉漢世人才稱盛學之醇者惟董子唐之時有韓愈其言曰孔子傳之孟軻軻之死不得其傳焉則未嘗以斯道之傳歸董子也而韓子之學其於孟子果若是班乎迨宋周程張諸大儒出始能上溯道統之源而我朱子集其大成乃爲孟子以後第一人其學則自格致誠正以及修齊治平之道無不體用具備然則朱子之學

志

小

口

漢

孟子之學也即孔子之學也其所願同於孟子故其所學至於孟子則謂孟子之言即爲朱子道也可今夫如堂如防隙者墮者歸者崧者嶠者其巉巖聳峙皆學乎秦華者也岷嶓之原桐柏鳥鼠熊耳王屋百川之流逶迤奔赴皆學乎河海者也熒惑太白歲星辰星鎮星二十八宿之燦著皆學乎日月者也自天子以下公侯卿大夫士庶人皆學乎孔子者也其所學者何也君臣父子夫婦昆弟朋友之倫視聽言動日用事物之則推而至於天地日星風雲雷雨山川草木鳥獸金石之變禮樂射御書數之文陰陽鬼神寒暑屈伸往來進退存亡之理即物以致其知本身以踐其行無間於須臾無移於異術敬修其可願如是焉終身而已矣苟能如是是即朱子是即孟子也已則謂孟子之言即爲天下後世之爲學者道也可新安書院於主敬堂之西軒署曰願學余來斯軒諸君曰願有記因述其義而著之若謂謙讓不違自託於公西氏未能願學之列則非所以名斯軒之意也

近聖居記

董桂敷

方丈之居盈尺之几可以置筆硯攤經史亦足欣然自得無求於外者矣然而境之所處有不同焉者今夫荒山深林窮谷僻壤無弦誦之聲溫文爾雅之士日與樵夫牧豎相遊處則繭室也陋矣蓬戶甕牖板牀將穿妻孥戚戚聲聒於耳米鹽之末捩擋凌雜則環堵也困矣衡門近市湫隘囂塵入營錐刀出資貨賄時或傭夫丐徒喧呶叫嘯於側則敝廬

漢

口

小

志

也俗矣夫求大木者必依於山采珍貝者必宅於水天下之至情也巖巒石罅中有珠璧則十里之內草木皆生其輝澄潭巨浸中有蠃珠則一川之流淪瀾竝寫其韻非草木淪瀾之獨異也其所附近之勢然也孟子曰遊於聖人之門者難爲言非聖門之士獨異也亦其近於學問者然也彼夫百世而聞風千里而聲應離遠近之迹以求之則凡亘宇綿宙皆得謂之爲近原不在區七咫尺之間若乃太甲之徂宅孟母之三遷則實以居止之近而移其性故諺曰近朱者赤近墨者黑言乎身之所習必將有所轉移變化觸於外而動於中此即擇不處仁焉得智之說也昔者魯恭王壞孔子宅升堂聞壁中有金石絲竹之聲乃不壞宅夫以舊宅之壁而有金石絲竹之聲足以動後世之王公貴人則知聖賢精靈之氣隨所託而呈露苟以吾儒親炙其間其所感發當有不知其然而然者矣新安書院於正室後之西北隅因隙地爲室廣不過一弓而幽靜雅潔足以讀書考道異夫前之所謂陋者困者俗者故取孟子終篇之語顏之曰近聖居近朱子也近道也即以近夫千古而上之聖人也曩余幼時讀書紫陽闕里之側其居亦曰近聖從師其中殆將十年稚弱顛蒙不能有所奮發至於今茲學不加進無以大異於常人記是居蓋不勝俯仰愧悔之情焉書之以爲居是居者勗也

漢

口

小

志

漢志漢水受氐道水一名沔過江夏謂之夏水鄭玄注尚書滄浪之水言今謂之夏水來同故世變名焉此直以滄浪爲夏水與漢志不合而鄭注爾雅云華容有夏水首出江尾入沔應劭十二州志江別入沔爲夏水說文沔水入江或曰入夏水水經注夫夏之爲名始於分江冬竭夏流故納厥稱既有中夏之目中夏見江水篇亦包大夏之名當其決水之所謂之堵口自堵口下沔水通兼夏目而會於江蓋古時夏水合沔入江其勢相敵互爲盛衰故漢志稱沔水入夏水水經稱夏水入沔其入江之處或稱夏口或稱沔口然必在堵口之下始得兼稱若堵口以上固沔自沔夏自夏也康成謂滄浪爲夏水是以堵口上皆夏水矣故酈氏駁之云今按夏水是江流沔非沔入夏假使沔注夏其勢西南非尚書又東之文矣

漢江詩會啟

張宏殿

鄂城古郡漢水名區靈峯則翼際嵯峨平湖則郎官瀲灩白雲黃鶴尙餘仙客飛輶芳草晴川遠護騷人古墓溯李邕之制作錦繡繽紛羨王質之才華珠璣錯落白鷺飛於西塞志和之嘯詠逾新月照於南樓庾亮之清狂不淺天垂翼軫古今不乏名流江號煙波來往尤多偉士茲幸龍飛初慶文運廣敷况當農谷方遷春光漸麗江邊弱柳縷縷籠煙岸畔疏梅枝枝綴雪爰約如蘭之契共聯藉卉之歡勝友高朋均期雲集詩才賦手並翼

星臨分各體以成吟競染松脂之彩賦新篇而紀盛爭勻蓉粉之牋意自飛揚恍若弩張
劍拔思無停滯還同雨濺風擽務將七澤雄觀盡被錦心吐出更令三湘勝概都從彩筆
收來既無離索之嗟各得推敲之趣玉以琢磨而更美金須鍛鍊而彌精莫負風光正好
倡予和汝高談騷雅何妨卜晝連宵詩酒流連無煩絃管襟情浹洽暫略儀文人來金谷
以綢繆客到玉山而醕酎者英聚首渾忘游子天涯碩彥論心足慰羈人旅况允繼蘭亭
盛會遙追栗里高風我輩僉有同心諸君定當屬意

新雨聯吟集序

方軫

心盒以丙寅中夏與余遇於漢皋見其所存篇什率盈篋其已梓行者則有准上題襟集
吳下朋箋小錄大梁偶成倡和詩鈔其餘篇簡繁雜類同束筍未遑檢治矣今歲上春陰
雨連旬心盒得詩十首且復徵和遂連彙成帙卽以付梓後有所作悉附益之目曰新雨
聯吟嗟乎半生羈旅萍水堪親翹首停雲思心莫慰今茲新雨安忍置諸故投分則隨地
可以追歡攄情則倚吟不勝感舊異日心盒之舊雨覩此其必有聆風而興感者矣是篇
成余爲述其命篇之意如此

李翠官小傳

虞常泰

李翠官鄂之通城人幼習時曲於岳郡居楚玉部名噪湖之南者數年去而來漢年二十

許矣隸榮慶部李貌不逾人然每妝飾登場觀者咸嘖嘖稱賞迨轉喉發聲清圓明秀高入雲表場下數千人無或譁者出則目迎之入則目送之以是李名愈重焉初榮慶部有台官者皖人容色姣好善爲跌宕跳擲之劇名擅江漢間而李以斌媚風流之技匹之一時號兩美云嘗見其演楊妃醉酒潘尼追舟不獨丰致嫵然且酒後嬌憨船中恹之態描摹畢肖而玉堂春一劇悲曠與斌媚俱生尤臻絕妙嘗謂人曰聞諸讀書者云作文須代聖賢立言戲雖小道亦代古人傳神也故必以悲歡離合之情若身歷其境者其庶乎神可傳矣噫倫所謂以文爲戲者耶在漢十餘年所獲頗豐歸里奉其父以終老曰吾少而外出不得奉甘旨者幾三十年今父老矣幸有薄產可復趨蠅末而廢侍養耶諸部競延之卒不出父歿乃教弟子爲小部出其門者亦頗有稱今榮慶部已散李亦久死而翠官名江漢間猶有道之者

漢口竹枝詞序例

葉調元

漢口東帶大江南襟漢水面臨兩郡旁達五省商賈鬻至百貨山積貿易之鉅區也夫逐末者多則泉刀易聚逸獲者衆則風俗易隳富家大賈擁巨貲享厚利不知黜浮崇儉爲天地惜物力爲地方端好尙爲子孫計久遠驕淫矜夸惟日不足中戶平民耳濡目染始而羨慕旣而則倣以質樸爲鄙陋以奢侈爲華美習與性成積重難返傳曰沃土之民不

材若漢口者土不宜稊稻不可謂沃民不知耕織不可謂材頻年水火災害並至處斯地者如春燕巢幕撒則傾如壁蝸吐涎匕枯則槁可恃乎抑不可恃乎僕自七齡游楚越九載返里已亥重游隔二十餘年風氣迥非昔比暇日即所見聞託諸嬉笑怒罵以誌丁鶴歸來城是人非之感逮今十載積而成帙嗜痂者借鈔日衆烏竿芋輾轉滋訛友人慫恿付梓爰芟十之二三錄以應命諒痴之謂知所難免然子雲有言貌言華也情言實也詞雖俚情實備焉庶有當於言者無罪聞者足戒之義乎時道光三十年正月既望姚江江葉調元鼎三甫識於漢皋孫氏枕流漱石之館

凡例四則

一 范氏叢談之刻啟秀於前石君竹枝之吟聯芳於後自維東女敢效西顰然而鶴唳九霄蟬鳴片葉聲即判夫高下趣無分於淺深畫一樣之葫蘆本非吾願享千金於敝帚猶是人情恥菑梨心甘覆醬

一 錄名聞見備詳封域山川志號虞衡下及蟲魚草木是詞臚陳土俗廣集民風既非空寫性靈何以偏多挂漏良由濟勝無具游覽夙憚其勞消閒有書坐忘久領其趣既疎咨訪自隘觀聞掌故無多有愧都三京兩膚言不免竊比白俗元輕告我同心鑒茲枵腹

一用戡稱字古人雅善擇言吹律定聲先詰尤嚴選韻是詩半由觸目無暇撚髭匪有積薪居上之心適蹈買菜求多之弊諺謠並列功乏推敲唇齒不分韻多出入稽叔夜性情素嬾未求一字之師郭功甫詩格已卑全仗七分之讀行自慚耳庶其諒之一筆端藏穎古人比於劍鋒綺語蕩情名僧警以犂獄援狐引鬼聊齋實憤世之書道賈說甄紅樓亦罵人之作是詩直書所見成竹胥無願聞其詳虛花弗錄本文章之遊戲寓懲創於歌謠半屬婆心豈徒作笑談之柄一經慧眼還可當勸戒之文

鼎三載識

漢口竹枝詞序

施 襄甫塘

竹枝詞者清平變調巴蜀新腔劉夢得在湘南舂白帝城頭之曲楊廉夫官湖石製錢塘湖畔之詞俗尚所沿無非詩料才人一到定有篇章矧漢口為直省通衢衆紛集山凌大別閣聳晴川江襟湖帶之間去曩來颿之際黃鶴與白雲俱近崔顥如存高山與流水匪遙伯牙宛在古如孟德尚橫槊而賦詩今有飛卿自題襟而成集此予友葉君茗園漢口竹枝詞之所為作也君生鍾英姿少具異慧我鄉欽其磊落吾黨慕其精明方黃琬對月之齡已遊漢上愛宋玉賦風之地重到郢中慨夫痾瘵之能殊有巧致枯槁之作大非古風得弓矢弓有樂者亦有悲者抱璞獻璞孰藏諸而孰沽諸或角短而較長不獨弄丸

之術或興來而情往豈無解佩之緣事事關心時時又手駒陰迅速日積月而月積年鴻製紛綸句成篇而篇成集誦笈童扶蘇之什不是鄭聲借美人薊草之詞亦工楚語讀是詩者須知其熏香摘艷自寫幽情鏤月裁雲仍存古體有警人之志無譏世之心旨總歸於無邪語不嫌其有累勿以雕蟲爲小技勿以獯祭爲煩詞也然僕猶有望焉以君胸羅六籍名雋一鬢摘葉鐫詞當花琢句宜乎耀正中之日揚肆好之風樂毅客燕豈終於游士陸機入洛不老以寓公鐵硯穿時蜚英秋賦金聲擲處騰譽春明由是登木天翔蓬苑人爲琪樹燭是金蓮學官樣文章作翰林詞賦則一官一集壽梨棗於千秋五言七言和鈞韶於九夏豈不美哉豈不美哉若僕者故紙空鑽強台莫上事悲蕉夢人老桐炊屨買臣富貴之年去日長而來日苦短處杜老蕭間之境舊雨少而今雨不多來玉局於黃州命逢磨蝎謫靈均於湘水經著離騷妄擬古人欣逢今日屢入雞豚之社承憐公冶無辜同遊鸚鵡之洲每歎正平未遇誦君佳什觸我狂懷思附驥以並傳恐續貂而滋愧仿三百篇之遺製誰云楚國無風撰四六句以序辭不學巴人有曲

漢皋雜咏詩序葆恩山房文集

沈開第

從來詩以言情而非景則情無由暢詩以繪景而非情則景難以融顧情無窮者也景有盡者也取有窮之景以供無盡之情而色色形形亦遂相與爲無盡是故高卑流峙詩之

漢

口

小

志

理也鳶魚飛躍詩之機也水榭煙樓詩之別趣也古刹浮屠詩之化身也達乎理涉乎趣乘其機以遊於化則視其人之才之學之識而未可強也漢皋非吾楚輿區乎古今來文人遊咏於斯者夥矣其間湖山之秀麗城郭之巍峨草樹之迷離帆牆之出沒英雄豪傑之所爭遷客騷人之所慷慨而歌咏景則靡涯也情則何極也而欲使江城畫裏盡赴毫端漢口夕陽皆歸詩藁豈不難哉吾友王君石菴其主盟詩壇久矣今年春余下榻其家見其前數歲時所刻晴園詩草才如倒峽句欲敲金已浸匕乎灘人齒頰焉旣而養疴漢上呼余携其嗣君同寓沌陽城應郡試便課讀余亦欣然樂從旅次之暇輒復題咏觸物興懷莫能控制始情寓於景而不可解者耶今夫兩間之美景皆造物設之以待詩人而爲不善作者之所負蓋十八九矣雖石菴之詩非盡寫景然其往來贈答懷古咏今無一非觸興於此則是江漢之滔匕魯山之蠶匕皆能奔走腕下也則是鸚鵡黃鶴之翱翔歌樓舞館之呀啞皆能妙入心聲也如此而有不擊節歎賞者哉更可異者石菴患日十餘年架上之書不復讀幾疑學殖荒落矣及其興往情來出風入雅未有一字無本原者每至月夕風晨酒酣耳熱二三童子執筆侍側得句疾書應接不暇手腕幾脫斯亦奇矣且其生平善鼓琴高山流水豁我心胸故雖藥餌相隨之會能使情化於景匕融於情其扣寂以求也可以得無弦之趣其游神於淡也可以領絃外之音轉瞬間厥疾有瘳則益當

凝其氣養其神淋漓其興會而古調獨彈且不知更增何景也讀漢臬雜咏而石菴之襟懷可以想見矣

漢上消閒集序

吳績凝

漢 自昔瑰傑雄俊之才必發摠於所寄出則倚挈代務矯國更俗猶反掌毅然肩天下之艱危而磐石安之聲績白著鑠乎溢人耳目其處也鑿鑿琦璋噤不得設張其傷時憫亂怨鬱激越無憊之氣蘊於中以待洩於是尙陽亭沼流連杯酒景光間感物寓意比比托於文字以自吟暢豈其才氣異於顯晦哉亦其遭遇然也吾友宦廳清誨之天然通率世禪素業善文辭游湖北有年屈跡文墨職初與予不相識丁酉冬君與日本西村子俊訪予謁舍如舊款詢所自則於報紙讀予所作云是後益親善所交類世所稱賢材大都若審客若隱吏若佳公子若宿儒達士一時英彥多樂與之游君主盟壇坵賡和無虛日久之集文友詩敵所造築成巨帙題曰漢上消閒集將付鋟屬績凝序之衆製屨屐不名一體如黼黻纈紛異色而舉悅於目也如陶匏管籥會奏於一堂鏗鎬融洽而音不同也作者之致蓋云備矣而君之激揚風雅彰示無窮則尤足多者抑吾聞聖人愛日賤尺璧而貴寸陰魏文帝有言日月逝於上體貌衰於下忽焉與萬物遷化斯志士之大痛也况當此危急存亡之際內顛外虞可憂者蕃矣譬人之病瘵也歷百藏傳百脉而眞藏之脉不見

漢 胃氣行焉氣序存一息和鵲救之亟而病去否則斃無頃矣今時艱孔棘所賴士夫抗臥
薪運甓投筆枕戈之志以奮拔於事功相與甦民瘼刷國恥雖夕惕晨矜而無敢晷漏之
自暇自逸猶懼靡以拯壘卵懸髮之危而莫知所屆又安得剗精耗力稽費時日於文雅
之場藻繪之府屑屑焉消閒云乎哉夫志紛者尠特操見小者乏遠圖世會之升降繫乎
人心所趨使才傑者相從乎湖山觴咏之會日漸染於含毫吮墨於國家罔稗絲髮毋亦
昔之人寓於琴鍛蒲酒者邪噫是孰使之然哉則必有執其咎者矣平江吳績凝繡芸

口 品曲會序

王奠中

小 宴集之有序自晉王右軍蘭亭集序始嗣後王子安宴滕王閣李太白春夜宴桃李園皆
有之蓋序也者序其時其地其人其事用誌不忘者也今上元年己酉重九後九日屏鳳
主人招消閒同人約數十藉漢上小蓬萊書樓爲品曲會是日天微風雨集者僅十二人
而已於是諸詞史奏曲上同人咸賦詩於下吟詠笑謔之聲與管絃相雜旁觀者至爲色
動曲終開筵酒酣復以詩相酬唱譚笑振雲霄信可樂也雖王維裴迪之唱於別墅元稹
韋鞏之賦於蘭陵曷以加茲先是主人以同人與其所創消閒錄有筆墨緣多未面者思
一聚譚用敦友誼且以極觴咏之樂遂於重九日約同人爲登高會宴於劉園方是時風
雨連日會者僅五人主人以爲未極聚譚觴詠樂故復招宴於此而會者又祇十餘人則

是樂猶未極也噫藉令天弗陰雨同人至者必夥而樂寧果不可極哉用是歎文人之會集甚難極樂亦弗易獲竊怪天既不使吾人致身高位以大有爲於天下不得已而以詩文相酬唱已屬非幸豈天并此區區者而亦靳之耶因重主人之囑而爲之序以見文人集會極樂之難俾後之君子亦知有斯會之勝焉

漢

漢陰課漁圖記

陳錦奎

口

漢水之陰有漁父焉蓋非滄波間沾沾焉以漁爲業之匹儔也少挾元龍湖海之氣下崑崙經滄海一竿遊釣半天下所至名公巨卿嗜鮮美者靡不以利祿餌漁父顧漁父生負奇氣傲骨嶙峋轍不苟就也年老悔風塵廢然思返聚子若孫而課之曰凡今之世海市蜃樓工淫巧者狡若兔槍林礮雨挾機械者貪若狼無厭要求爭如垂釣猶快快然也尺波寸鱗不啻與滄海六鰲勢均耳雖然老漁生長江漢世業簞笠臥榻依稀詎可容人鼾睡以視天下之大江湖也溪澗也天下之君若臣若民爲鱗爲鯁爲鯢爲鱖也無在非釣之中必欲投竿而起斷罟而逃則亦釣名而已矣奚乎不可漁家近水習以爲常爾曹亦知夫釣意乎道德釣竿也仁義釣綸也詩書釣餌也巢許以之釣唐隨光以之釣夏夷齊以之釣商季札子臧姜尚以之釣周韓信王成周黨嚴子陵以之釣漢蠹轟烈烈光彌宇宙願爾曹師之若夫垂釣有方試又角其技之優劣爲何如者廉頗大將也能釣趙卒而

志

小

漢

口

小

志

不能釣楚人曹操英雄也能釣獻帝而不能釣諸葛竊又為若輩恨之至於魚行得承大江東去率性而來兒輩當於上流結網順其性以導之恣其欲以羈縻之逆而促之則值矣豈非老漁拙能勝巧待整以暇彼狡焉思逞貪人敗類何所容於江永漢廣間耶且幸三五兩子學圃閩海歷鍊風濤歸守江河淺深可辨因命伯子作課漁圖勤修課稅以報國家知魚非魚吾樂吾樂永鑿於水養頤天年毫以不文爰批圖而為之記抑不徒為課漁記也

劉園集序

劉茂寅

滿城風雨感傷遊子之心在水兼葭望斷伊人之目誰似孟嘉落帽競說龍山我同吳聽謂

猿市吹簫難尋鳳友合用子胥吹簫及簫史跨鳳二事鳳謂莊主也昔也看花有淚今則繞樹無依身作鄂渚之羈耳

艷劉園之盛青藜閣得非天祿元都觀疑是後村主人擅五言長城仙侶孤二郎阮肇蓬萊尙遠天台之路千重園以劉名某亦劉姓故云絃管相投司馬之琴一曲鳳故求鳳鳳亦求鳳所有光分猩色謂分屏之光者

秀挺鸞姿謂與鳳為友者夙聯射雀之緣屏半入求鳳之譜聚橘皮榜中人物五老偕來聞赴會者止五人

覺菊花杯底生涯重湯共醉相與東籬浮蠹左手持螯無須酒送白衣敢不詞成黃絹萍

飄宦海歸吟招隱之詩楓落吳江老作悲秋之賦借登高為消遣咸寄慨以遙深桓景避

身之災事原不典樊川開口而笑情極無聊時則鬢邊黃插階畔梧飛雁陣驚風蛩聲咽

漢

口

小

志

露回頭方中秋之節轉盼即小陽之春山淡若措林疏欲脫荻花楓葉嘆商婦之飄零沉
芷湘蘭嗟美人之遲暮地則洞庭水闊雲夢澤深鸚呼芳草之洲鳥渡夕陽之浦赤壁江
上風月一船黃鶴樓頭梅花三弄乳虎旁通郎國神鴉遠接巫峯李太白遊郎官湖儘堪
浪跡鍾子期居集賢里應許知音人則西塞元翁南樓庾子李北海生由江夏蘇東坡謫
到齊安鄉賢彈伯牙之絲名宦運陶侃之璧纔黃鶯兮住久復白駒兮來初訪鄂州之畫
圖偶然卜寓帶長沙之遷客留此成家莫不恨抱屈平才高宋玉罰依金谷飲誇石宅之
豪春買玉壺詩重司空之品於是觥籌交錯賓主合歡品茶題夢得之饅賂韻擊竟陵之
鉢百篇易就會桃李於蓮仙三徑不荒賞菊松於柳宅地不囂而殊靜人以少而勝多羣
公比修禊蘭亭百年雅集過客欲艤舟桃洞萬里迷津蓋雲集者世外遺民山中未學溯
漢家之系向善傳經羞唐士之顏黃曾下第案有將穿之硯笥無未讀之書二十年純盜
虛聲名徒膺乎鸚荐四六體略爛文藻技實陋以蟲雕拊孤影以自憐哭窮途其誰恤惟
傲豎梁公之骨熟不因人遂愁填虞氏之胸恨無知己抱隨珠而弗售持卞璧復何之亦
有門生故吏往來無片紙之通但期流永高山契合獲千秋之遇仕路如三語椽素不屑
爲文壇得一字師義仍當合鳳莊翔千仞之表楚狂不勝其多情猿啼三峽之間指吳聽猿原序
巴客亦爲之下淚嗟乎白雪孰歌紅塵若寄三生石古一點犀靈同志即可同方相思奚

必相識江干落魄難逢解佩之妃漢上論交願附題襟之集甘效鬻於西子若耶谿只在前途擬赴宴於南昌滕王閣重留佳話

漢上消閒社主文鈔跋

王奠中

唐韓氏柳氏出而古文之名興然無所謂家派也自明臨海朱右取宋歐曾王蘇之文合韓柳爲六家歸安茅坤又釐而入之而文始有家國朝歷城周永年以桐城方氏劉氏名能古文謂天下文章在桐城由是號桐城派而文始有派厥後學者竊其一似遂各立門戶互相詆謔噫何其隘也巴陵吳敏樹非之詎爲過哉韓昌黎曰文無定體惟其是而已姚姬傳曰文無所謂古今也惟其當而已則是凡爲文者期於是與當耳奚區區家派之是爭乎屏鳳莊舊主與余交有年矣其主持漢上消閒社廣徵詩文冀存舊學一時流傳殆遍而所自爲古今詩體尤膾炙人口第古文詞不少概見今年秋將刊漢上消閒集擬總其平昔詩文刊附集後顧謬許奠中能文以文鈔命爲審定奠中誠剪陋然與屏鳳至善又誼不可以辭伏讀數過有精深者有雄邁者有高渾清腴者蓋於諸大家之文各能規撫其所長其是與當不待言又寧可以家派限之耶編次訖特誌數語於尾以見其文不囿一隅並使世之學者勿泥守家派之說用相詬厲焉宣統庚戌十月朔日黃岡王奠中敬跋

劉園夜遊記

徐煥斗

出歡生路近循禮門車站有劉園焉漢口名勝地也余訂期擬遊屢矣無與偕轍中止八月十日晚六時事稍暇約家兄叔熙同往忽公累不果去旋過劉君秋芳處適叔兄暨屠君俊凡先在坐將爲劉園遊余遂欣然偕往於時新雨初霽烏雲四合殊涼甚至則座上客如晨星移時胡君極呆熊君粹東亦聯袂來余喜極方自幸此夜之遊不落寞也列坐浮碧亭爲園中超等客座俯視荷葉田田露中蛙躍躍欲鬪數君子者感懷時事議論風生此述歐西激戰彼道亞東中立余每過耳成風唯沉心聽蟋蟀鳴以爲樂池畔楊柳垂青電燈三五隱映綠陰裏與池荷爭爛所謂江城如畫者莫是過少頃起行出板橋過綠天紆曲漫步無一處肯鬆放過經翠寒亭聆主人奏風琴一曲餘音嫋嫋又折而東入清妍亭見籠中鳥垂頭欲睡適有妓操蘇音從客來步履姍姍秋波欲轉亦似曾相識者誦二十四橋明月夜玉人何處教吹簫之句揭禁神往再折而南爲飼豹處青翠拂衣儼然山陰道上惜無燈火未得窺見一斑又北行爲花匠住宿室遂折而南向由池東返原坐處清風徐來草蟲飛繞園外火輪車下駛汽笛怒吼聞之震駭而數君子尙劇談闊論未稍息也叔兄笑曰子適焉往余曰遊劉園一週矣曰何所見余曰園中位置頗嫌繁冗幸二三楹帖雅潔可誦一二蘇妓瞞人匿笑此行爲不虛矣叔兄笑曰息肩於此小住爲佳

志

小

口

漢

漢

口

小

志

胡不憚煩若是余曰此間僻頗無塵事相擾不飽餐空氣厭挹涼颺以一滌胸中俗障偏關心時局爲歐西人作軍事參議官園靈有知母亦嘲其爲多事耶余性喜動動中尙幸有所見聞兄寂似枯禪不出茶座一步如此良夜何叔兄折服座中人亦各啞然笑彼時鐘鳴一下品茗拈花樂而忘倦亦若百畝園亭前度劉郎今又來矣噫嘻古今來賢士大夫多好遊觀晝間奔走塵世形色俱罷泰半夕入花塢暮宿僧舍搜奇探僻秉燭以往方將揖高士於山中訪美人於林下興之所至發爲歌詠李太白之夜宴桃李園蘇長公之夜遊赤壁良有以也余輩終日營營既不能厚輜糧盛輿衛遍歷天下名山大川而登之而眺之而坐臥飲食之而醉醒歌哭之差幸偃息於茲偷片刻閒即享片刻福縱片刻清談狂飲庶不背古人夜遊之義快哉此遊其可忽諸爰不計工拙泚筆爲此非敢云記也留俟再續此遊藉攬從前未盡之興云爾

吳玉屏曰記園中諸景歷歷在目雖吳道子之畫嘉陵亦不是過至其字句之老潔筆墨之奧衍眼界之拓大懷抱之清奇當於八大古文家中獨樹一幟

嚼雪齋詩存敘

徐煥斗

漢上有隱君子者李其姓瀚其名仲青其字皖人而楚產也持所著嚼雪齋詩存囑余敘余唯之而未有以應也昨晚深夜獨坐孤燈如豆大較前案牘之形勞者亦略略減茶後

漢

呼僮取架上書適檢飲冰室詩卷授余閱未竟觸類興懷忽憶有所謂嚼雪齋存者於是取置案頭展玩再三其詞巧其字奇命意諧聲別開生面將搦管構思而謀有以應之也搦筆者再嗟乎古稱詩有別腸非獨具匠心者不可與言詩卽非獨具隻眼者不能爲詩人作序序也者述作者之旨趣與其格調而昭揭以示諸人者也余雅不善詩間有所作亦勉索枯腸藉供酬應其於歷代詩學淵源暨詩家宗派雖間有所領悟不過辨其爲宋也爲唐也爲漢魏六朝而已非其學與識之所臻而眼之果能獨到也以其爲漢魏六朝爲唐爲宋曾有無數詩人雌黃菟苑評隲詞林有以導我於先路使余隨聲附和得以稍窺門戶而一涉其藩籬也仲青李氏乃近代作家譬彼閨閣麗姝含葩養蕊未經他人道破其果宗兩宋耶類三唐耶抑或仿漢魏六朝之餘韻耶吾不得而知也第觀其嬉笑怒罵涉筆成趣信手拈來老嫗都解將來之所造可以宋可以唐可以入漢魏六朝其才華情致不讓古人可斷言也或曰嚼雪去飲冰奚若曰味淡聲希庶幾近之揆厥所以名齋之意毋亦閱盡世態之炎涼看透人情之冷煖而故胚胎飲冰子以自貶歟充其量恐番番梁氏尙不足以盡之仲青與余交最密得以時相過從樂數晨夕不敢過諛亦不敢信口雌黃致失廬山眞面然以序委余而適得一冷淡相同之飲冰室主作比例觀似耶非耶聊誌之以質多藝好詩之仲青得毋有問道於盲之歎乎

志

小

口

英梅夢

徐煥斗

余雅不信夢遇癡人作囁語者無男婦無老稚無戚友路人輒嗤之以鼻月之七夕同新聞記者某觀劇新民園是夜爲續開英梅追悼會之第三日也素幃繞柱滿眼淒涼座上客爲十三日演蝴蝶夢俠妓奇緣二齣而來者踵相接該園本歌舞地名曰追悼藉廣招徠與尋常喪弔迥別賞玩甫畢余亦津津稱十三日不置方竊謂梨園子弟繼英梅而起者大有人在歸後鐘鳴一下倦而思臥甫就榻卽被睡魔纏去恍惚夜靜更闌萬籟俱寂清風習習隱約間有人拳髯而入引我於清涼世界中星光螢螢空平如鏡與常時所見聞者絕不類蓋別有天地非人間矣忽聞歌喉宛轉音韻清揚有美人兮冉冉而下則金氏月英之演廣寒宮也又見有酒帘飄繞愁態癡情令人神往則白氏玉梅之演梅龍鎮也不禁鼓掌叫絕喫驚而醒凝神想像若有若無疑非疑是夢耶醒耶戲耶真耶猜疑不置以爲英梅二伶尙在人間也并疑昨夜十三日之所演者爲夢矣非果有是戲也特取案上惜英悼梅集再三展玩始知英梅果先後死矣知英梅已死始信昨夜十三日之扮蝴蝶夢俠妓奇緣爲真戲矣知十三日真有是戲始益信金月英之演廣寒宮白玉梅之演梅龍鎮爲真夢矣噫嘻天下事無非是戲無非是夢卽戲卽夢卽夢卽戲隨吾眼孔之所認而已十三日之演蝴蝶夢與俠妓奇緣戲也何妨作夢中觀金月英之演廣寒宮白

漢 口 小 志

玉梅之演梅龍鎮夢也何妨作醒眼觀讀蘇長公夢齋序數語可以恍然悟矣夫夢境迷離大都意有所極夢即同趣夢也者多在可解不可解之間必指事以實之鑿矣古今來才人學士富貴功名曾幾何時都成泡幻足見繡虎雕龍之選金戈鐵馬之奇與夫結綺臨春之繁華靡麗何莫非夢奚必待夢而後謂之夢耶余既不能學太上忘情又安敢謂至人無夢曩者英梅之死雲集山人索余挽作余以與二伶了無關係未便辭費貽大雅羞今茲之夢抑或二伶有知故於夢寐間假我以神遊目想而欲余搜索枯腸湊成數語以附諸惜英悼梅集後耶誦是月是梅還是夢羅浮早醒趙師雄之句仍以質之雲集山人

惜英悼梅集序

鄭遠謀

嗟夫羅浮夢斷難留綠萼之魂桂府塵空竟返嫦娥之駕化彩雲而易散活絳雪以無丹金縷曲殘歌衫已杳玉鈎斜冷舞扇空存此江南逢李龜年少陵爲之感慨錢塘訪蘇小墓弔客因而悲傷者也若白伶玉梅金伶月英者矜彼姝之顏色具絕代之丰姿雲髻花冠別饒嫋娜環肥燕瘦各擅風流眉彎目以爭妍眼橫波而競媚自應鏡臺下聘金屋藏嬌而乃命薄如花泥沾似絮作梨園之子弟占菊部之芳名方其櫻唇乍啟蓮步輕移曲調翻新宛牟珠之一串歌喉協律疑絳樹之雙聲舞蠻腰而翩若驚鴻掩樊袖而倒同么

鳳以彼極端莊流麗之態令人動喜怒哀樂之情豈獨聲高白雪爭善才之長妝美翠翹起秋娘之妬哉以故譽遍津京名傳滬漢花能解語藝果超羣真堪一顧以傾成直欲千金而買笑不意曇花偶現芳草生愁當碧玉破瓜之年抱綠珠捐粉之恨江城五月正落梅花漢上中秋又悲殘月顧曲之周郎永歎聞歌之王子徒傷所由藝苑名流才華學士本難以爲情之意作無可奈何之詞玉樹庭花祇餘哀怨霓裳阿鵲莫譜宮商此悼梅惜英集之所爲作也然而珠璣萬斛足慰芳魂錦綉千篇堪傳倩影使竟幽而不顯盛而弗傳不將一代佳人水流花謝三生慧業兩散雲飛乎茲者雲集山人以漢東之名士繫花園之金鈴記曾槽板鏗鏘小紅低唱况復詩才俊逸太白多情雲想衣裳花想容清平調誰能唱出臉似芙蓉胸似玉上陽宮空歎人亡妙題黃絹之辭丁寫烏絲之字詠歌韻事標榜艷名登而集之固其宜矣爰是擷其菁華災諸梨棗又得新民園主解囊相助水以積流而大裘以集腋而成不逾月而排次成編矣謀也東山絲竹未暇陶情南嶼煙花也曾留盼覽茲篇什如省畫圖劇憐紫玉成塵未免青衫欲淚梅花葬處定知環珮魂歸月夜淒聞想是薜蘿鬼嘯抱鬱鬱深深而終古悵朝朝暮暮以爲雲他時萬卷琳琅續徐陵玉台之詠此後五雲榭閣惟傳白傅長恨之歌中華民國三年十月既望通山鄭遠謀任庵氏序於武昌植梅別館

藝文志下

古近體詩

漢川咏懷

晉阮籍

二妃遊漢濱逍遙順風翔交甫環懷佩婉孌有芬芳猗靡情懽愛千載不相忘傾城迷下蔡容好結中腸感激生憂思萱草樹蘭房膏沐爲誰施其雨怨朝陽如何金石交一更日離傷

其二

湛湛長江水上有風樹林皋蘭被晉路青驪逝駸駸遠望令人悲春風感我心三楚多秀士朝雲進荒淫朱華正芬芳高蔡相追尋一爲黃鶴哀涕下誰能禁

行出東山望漢川

襄陽集

唐孟浩然

異縣非吾土連山盡綠篁平田出郭少盤坂入雲長萬壑歸於漢千峯割彼蒼猿聲亂楚峽人語帶巴鄉石上攢椒樹籐間綴密房雪餘春未暖嵐解晝初陽征馬疲登頓歸帆愛渺茫坐欣沿溜下信宿見維桑

江漢杜詩鈔

杜甫

江漢思歸客乾坤一腐儒片雲天共遠永夜月同孤落日心猶壯秋風病欲蘇古來存老馬不必取長途

自夏口至鸚鵡洲望岳陽隨州集

唐劉長卿

汀洲無浪復無烟，楚客相思益渺然。
漢口夕陽斜度鳥，洞庭秋水遠連天。
孤城背嶺寒吹角，獨戍臨江夜泊船。
賈誼上書憂漢室，長沙謫去古今憐。

漢水

杜牧

溶七漾七白漚飛，綠盡春深好染衣。
南去北來人自老，夕陽長送釣船歸。

漢江帶碧流，長兩岸春風起。
綠楊借問膠舟，何處渡欲停蘭櫂。
祀昭王。

憶夏口

羅隱

漢陽渡口蘭爲舟，漢陽城下多酒樓。
當年不得盡一醉，別夢有時還重游。
襟帶可憐吞楚塞，風煙只好狎江漚。
月明更想曾行處，吹笛橋邊木葉秋。

漢江宴別

亦作渡漢江宴別
亦作漢口宴別

宋之問

漢廣不分天，舟移杳若仙。
清江浮暖日，黃鶴弄晴煙。
積水浮冠蓋，遙風逐管絃。
嬉遊不可極，曾憶此山川。

江上吟

李白

木蘭之枻沙棠舟，玉簫金管坐兩頭。
美酒樽中置千斛，載妓隨波任去留。
仙人有待乘黃鶴，海客無心隨白鷗。
屈平詞賦懸日月，楚王臺榭空山丘。
興酣落筆搖五嶽，詩成笑傲凌

滄洲功名富貴若長在漢水亦應西北流

江上風

釋皎然

江風西復東飄暴復何窮初生虛無際稍起蕩漾中應吹夏口檣竿折定撼溢城浪花咽
今朝莫怪沙岸明昨夜風狂捲成雪

江上偶見

杜牧

楚江寒食橘花時野渡臨風駐綵旗草色連雲人去住水雲如縠燕差池

江行

司空圖

地闊分吳塞楓高映楚天迴塘春盡雨方響夜深船行紀添新夢羈愁甚往年何時京洛
路馬上見八煙

初程風信好迴望吳津樓日帶潮聲晚煙含楚色秋戍旗當遠客島樹轉驚鷗此去非名
利孤帆任白頭

江行

柳談

繁陰乍隱舟落葉初飛浦蕭蕭楚客帆日暮寒江雨

晚泊漢江渡

劉敞

末秋雲水平蓮折晚香清雨下侵苔色雲涼出浪聲疊帆依岸盡微照夾隄明津吏已頭

白遙知客姓名

渡漢江

李百藥

東遊既瀾七南紀信沿七水激沈碑岸波駭弄珠皋含章映淺石浮蓋下奔濤溜闊霞光
盡川長曉氣高檣烏轉輕翼戲鳥落風毛客心既多緒長歌且代勞

漢中漾舟

孟浩然

漾舟逗何處神女漢皋曲雲罷水復開春潭十丈綠輕舟恣往來探玩無時足波影搖妓
釵沙光逐人日傾杯魚鳥醉聯句鶯花續良會難再逢日入須秉燭

漢水傷稼

許渾

西北樓開四望通殘霞成綺月懸弓江村夜漲浮天水澤國秋生動地風高下綠苗千頃
盡新陳紅粟萬箱空才微分薄憂何益却欲回心學釣翁

泊舟漢口

宋王十朋

稍稍風波定悠悠舟楫移身雖到漢口家尙在天涯大別思大禹古峯懷古夔山城有寥
廓歸說是吾兒

楚江秋懷

寇準

西風吹遠水蕭颯渡吟臺明月夜還滿故人秋未來寒蛩唳暗壁敗葉下蒼苔誰念空江

水年年首重回

江頭春日 山民集

真德秀

風暖旗亭煮酒香醉醒纔悟是他鄉
駕言行邁路千里豈不懷歸天一方
春事漸消鶯語老離愁偏勝柳絲長
無聊莫向城南泊淡月梨花正斷腸

渡江

李綱

桂棹蘭旌楚澤澤東碧空如秋水
水如空江湖落日浮秋橘島嶼殘霞拂斷虹
世事茫然煙霧裏客愁都在艣聲中
沙頭鳧雁相儔侶笑我年年逐轉蓬

舟中偶書 劍南詩集

陸游

老子西游萬里回江行長夏亦佳哉
晝眠初起報茶熟宿酒半醒聞雨來
漢口船開催疊鼓淮南楓落亞高桅
四方本是丈夫事白首自憐心未灰

題長江圖

元丁鶴年

長江千萬里何處是儂鄉忽見晴川樹依稀認漢陽

尋盧學士船至漢口留詩爲別

元揭傒斯

晴山淡微瀾曳雲在層巘參差連舫出散漫羣鷗遠始知適漢廣遙睇高旆倦懷賢每忘
賤臨流亦忘蹇蒼茫景將入杳渺春猶淺新知遽相違餘悵何由展

漢口

明趙弼

茫茫漢水入江流兩岸蘆花泊釣舟
梁武舊城無覓處寒煙衰柏不勝愁

漢上遇友人空同集

李夢陽

漢

長安一爲別千載但書傳我自河南至
君來自沔川偶逢知萬事重會是何年
館靜風依馬江鳴雨濯船情多看轉默
酒後惜分眠明發孤帆疾愁經大別邊

顧鄂渚贈別圖

明楊士奇

口

鸚鵡洲中紅樹鳳凰城裏青山借問來
遊幾日秋水蘭舟獨還

漢江

李夢陽

小

漢江江上鷓鴣鳴漢江遊客無限情
青山落日下帆影芳草月明開棹聲
黃鶴磯頭暮雲盡鸚鵡洲邊春草生
莫倚仲宣能作賦洞庭南接桂陽城

志

武昌城北大江流沱水夾成鸚鵡洲
楚蜀帆檣風欲趁蛟龍濤浪暮堪愁
青煙自沒漢陽郭新月故縣黃鶴樓
無限往來傷赤壁三分輕重本荊州

夜泊漢江

李夢陽

黃鶴樓前日欲低漢陽城樹亂鳥啼孤舟夜泊東
遊客恨殺長江不向西

浮漢

李夢陽

杳七向前城揚船浮漢行水聞天上轉色出雨中明已近鳴鴉月長看濃霧生陳詩歡
秣馬風浪獨含情

漢江

朱衣

漢水下長江側目古大別岷嶓雍梁道禹蹟重遺轍一經秦始皇再經忽必烈山川猷功
罪榮辱係往哲至今千萬秋猶存楚人舌前有沙邱尸後有燕京血

漢江

吳廷用

漢江雪後水初生鴨綠粼七萬頃平估客帆檣天上落漁人舟楫浪中行山光側蘸參差
樹雲影深幽散亂萍欸乃一聲飛鳥外滿汀蘭芷不勝情

漢江春日

高叔嗣

漢皋微雨點人衣江路南衝雁北歸寓目不堪愁遠涉役身方自愧高飛纜牽蘅杜多春
氣船泊雲霞變夕暉未許漁蓑同楚父來逃榮祿守漁磯

漢江

童承叙

荆山郢樹照南洲江漢滔滔天際流神女不來雲雨暮騷人一曲薰蘭秋
太白連七太光芒當船欲墮雲蒼涼祇恐塞北煙塵起誰信江南民社荒

泊漢江望黃鶴樓

張居正

漢 楓霜荻雪淨江煙錦浪遊鱗清可憐賈客帆檣雲裏見仙人樓閣鏡中縣九秋槎影橫清
漢一笛梅花落遠天無限滄浪漁父意夜深高咏獨鳴舷

舟阻漢口

吳士良

朝發武昌城信宿漢江口明月雖可親依依數株柳

漢上舟行

釋德清

湖水通巴漢孤帆自楚天片雲低遠樹晴日照斜川處世長如寄浮生莫問年縱遵歸路
去亦是渡頭船

將發夏口迪功集

徐楨卿

小 鷓鴣洲邊生暮煙旅人南望思悠然盡道巴陵湖水闊秋風莫渡漢陽川

江色

陶安

志 竹屋晨啟關江色直飛入空碧壓几案陰陰四壁濕玻璃作天地冷然手可挹萬象隨升
沉元氣動呼吸臨岸步觀漲石階沒千級岷巴與湘漢衆水大會集合流東北去海水亦
起立

江上秋懷

楊子善

水國風高木葉霜滿舟山色太荒涼小孤殘照收江左大別寒煙鎖漢陽新飯輒炊菰米

白濁醪香泛菊花黃故鄉千里空回首雲樹茫茫鬢髮蒼

江上春懷

方逢時

漠漠春陰暗不開江亭獨上思徘徊渚宮樓閣浮雲盡鄂渚煙波落日催去國王孫空有賦憂時遷客漫多才閒情欲和滄浪曲澧芷湘蘭盡可哀

秋江

姚龍之

映日含沙分外明西風斜過碧瀾生也知雲冷湘娥怨可使蘭衰楚客驚倒影樓臺春似夢憶歸鴻雁夜多聲都來不負朝宗意寒落猶然觸峽鳴

楚江秋晚

釋明秀

睡起長年報水程江花無數傍船明漢陽人語舟橫渡夏口雞鳴水近城寂寞陣圖諸葛計支離心事杜鵑行却從歲序悲黃葉一夜秋風白髮生

由草市至漢口小河舟中

袁中道

陵谷十年變川原未可分長湖百里水中有楚王墳日暮黑雲生且依龍口住小舟裾作颿笑語過湖去

馬騎城詩

趙弼

落日荒林宿鸛收馬騎城下碧波流水光山色無窮盡釀作詩人浩蕩愁

蕭公城詩

朱衣

渺七長江水崑七別山臺日月夏禹遠時運蕭梁來鞭驅十萬人版築飛塵埃遺禍起大業屠戮良可哀古城今荒蕪久立但悲哀

夏口別吳虎臣

汪道昆

布衣十日故人情長鍊翻七送客行但使陽春高楚調不妨江夏忌時名到來雲夢三秋色何處天風一雁聲他日來歌湘水曲慙慙佩結贈卿卿

涉江

清方宏鼎

高岸幾爲谷江煙抱郭浮漢陽猶古渡芳草失前洲去鳥隨輕棹殘雲戀故樓不驚磯上叟安坐看中流

離漢口石臼集

邢昉

旅舟泊漢水荏苒至寒節朝看楚雲興暮看楚雲滅此地雖破殘井術稍成列銀鱗日充市食鮮每豐潔客心復何苦遇物轉淒切茲辰忽返櫂脈脈情內熱風土漸相安山川屢回折故鄉豈不懷信美亦愴別未逢漢陰老令我憂思綴

過漢口經鎖兵憲舊樓

彭而述

春花同汝醉長干舞袖蹁躑午夜殘一自懷人憐太傅更誰把酒酬郎官道逢楚國思鴻

雁讀罷騷經憶芷蘭隆慮山深棲隱穩天涯有客獨憑欄

抵漢口

趙有成

孤征窮水驛今到漢江頭澤國舟爲市人家竹起樓烽烟消鄂渚士女習巴謳如信湖湘
美山銜萬井稠

漢口舟次

李以篤

雨意濃於酒花光減却春如何初撥櫂便已是愁人海內兵猶滿蘆中士故貧沙鷗兼野
老去去憎閒身

後湖即事

李以篤

臘氣暖如春巾衫不厭貧長堤涵積水斷瓦宿香塵苦債非關酒題詩莫寄貧
史放眼已情親

雨中渡漢江

文師汲

二月連江雨江寒色未開雲低天欲墮舟小霧將埋沙岸惟棲鷺春城不放梅有懷空擊
楫悵望濟川才

漢口後湖

彭心錦

淤後襄河二百年平蕪十里望茫然白雲有影常垂地青草無依欲上天春色任來鳩杖

志

小

口

漢

裏苦懷休到酒杯前今朝準擬開襟抱莫放斜陽墮柳邊

湖心亭題壁

范 鎔

曲七欄杆短七籬湖心亭外柳絲絲風翻芍藥徐熙畫雨釀黃梅賀鑄詞人影散隨絃鼓
寂茶香留看月燈遲笑余贏得吟詩興偏在文園病渴時

閒步後湖有作

常道性

野曠煙無際陰濃一桁楊麥苗含淺碧菜蕊散深黃春色已過半豪情殊未央與君皆老
大莫負此流光

後湖看新綠

黃承增

輓襯紅羅艷點梅能消幾日翠成堆省嬾眉黛窺深淺蹋盡斜陽未肯回

夏日題白園壁

程 秉

蹋徧芒鞵破蘚痕茶煙吹出白家園半窗疏竹斜通徑一路垂楊直到門性好登臨寧倦
足秋非離別也銷魂湖光眺盡平如掌何處青旗賣酒邨

夜汎後湖

程 秉

送盡殘陽咽斷蟬半篙新漲水清漣紅燈照市人估酒明月吹簫夜放船楊柳風飄衣上
露樓臺影落鏡中煙秋期近矣雙星渡悵望銀河萬里天

同人後湖晚步入市觀燈

周喬齡

湖田麥秀欲齊腰，湖肆茶香履舄交。傀儡登場箏聒耳，春情多上柳眉梢。

萬林火樹架新橋，蹴踢香塵市語囂。自古繁華襄漢口，清明以後試燈宵。
漢口燈事每盛於二三月間

後湖感賦

蔣炯

我來二月湖平沙，寶馬絡繹馳香車。胭脂梅謝海棠圻，水亭拉雜鳴箏琶。我歸五月水沒渚，隔林伊啞響柔撈。田廬汎汎若鳧鷖，遠帶高城雜平楚。到眼頃刻成滄桑，但愛水色如瀟湘。湖南市聲飛不到，夕陽兩兩鳴漁榔。漁翁七十頭雪白，爲言湖神能殺賊。嘉慶初元蠶螿屯，一夜驚波飛霹靂。雲車風馬圍周遭，賊心膽寒空營逃。漢口人家百萬戶，幸免赤立膏霜刀。賊退湖乾沙路出，高閣忽聞夜彈瑟。揮金不惜土木功，誰念湖神營寸室。我聽翁語重黯然，自古幽恨難問天。伍子鴟夷亞夫餓，弓藏鳥盡終誰憐。別翁歸船枕舷臥，江雨瀟瀟壓篷墮。荆榛剗盡豺虎空，孰謂湖神賊能破。

晚步天都菴納涼

方矩

嘉木無烈日，習慣如夏蟲。入世無冰心，焦死如秋蓬。我欲乘紫烟，逍遙游太空。濁氣不可近，冷然吹天風。

天都菴看芙蓉

潘國祚

長隄雨過洗秋容
眼底繁華簇錦重
入寺漫勞歌竹葉
涉江今始採芙蓉

上巳醮集天都菴

潘國祚

修禊欣逢天氣清
招提臨水快相迎
峯巒歷歷窗間出
士女遙遙柳外行
絲竹遠過狂逸
少風流誰繼謝宣城
酒闌屋角花飛盡
却恠東君太薄情

同方酌圃范省堂天都庵步月

朱在鎮

柳下月初上行行恣幽討
偕我素心人
蹋徧湖邊草
鐘響靜幢幢
水明空浩浩
百年天地間
此意何能道

佳兒歌為九齡會珙作

吳邦治

東隣嬌兒白玉面
柔豪索匕鼉磯硯
雁蘆蛇草疾如箭
金刀莫剪吳淞練
嵌岳鑿石搜幽
奇劈窠大畫何淋漓
字高身小勢未宜
腕臂頭足皆為之
嘉名不脛馳南朔
琳瑯溫蘊荆
山璞好將萬卷敦
初學桃花浪暖看頭角

羸馬店詩

黃 鉞

羸馬店乃在漢口馬王廟富商大賈來暫憫卸羸轎
有屋數十楹幽暗失宦窻不知何許
人出入祇取鬧我來主試援而止風雨破窗久無紙
朝陽夕陽不可徙時方秋熱汗如洗
階下何所有糞穢堆庭隅樓上何所有窳窳惟羣狐
匕於樓上作人步似恠客來非所據

狐兮狐兮爾何怒明日天明渡江去

渡江

黃鉞

曙色遙分黃鶴樓西風重上漢陽舟兼天波浪千颿蠹照水雲霞萬里秋
稊穗那期今日事飄零爲愴昔年游甲辰與先兄來遊武昌仙人橫笛應相笑青鬢無端換白頭

大端陽行

吳德芝

口
小
志
午日龍舟開江水楚俗相傳弔屈子無端更有大端陽初五日至十八止剪紙爲舟逼宵
龍中座神像裝束工迎處妖嬈雜婦女扛來欵側集兒童金彩高張錦翠鋪極工窮巧盡
歡娛游民廢業事厥役半月以來爭追呼典衣賣器供尊饌肉山酒海腥風煽急管哀弦
恣牛飲長旗大鼓疑龍戰醉來怒罵老揮拳槃盞壺杯飛瓦片明日酒醒仍弟兄不催婁
公甘唾面虐及神明守市廊儼然面目與冠裳麥瓜不黃李子黑神前故故來相將皆言
一歲不如此瘟鬼入門何能當我看往年鍾邑侯曾經示禁城門頭蒞官七載人不犯闔
閭清潔薰風流當時此事竟衰止並無一家見瘟鬼可知挽俗在循良小人所視君子履
且也先王法制詳是月勿用火南方諠闐爆竹若如此微陽生意能無傷

春游口號

彭心錦

未能覓句手空叉飯罷閒行水一涯十里平湖紅似錦春光爭放燕兒花

雨中渡漢江作

文師汲

二月連江雨江寒色未開雲低天欲墮舟小霧將埋沙岸惟棲鷺春城不放梅有懷空擊楫悵望濟川才

計日家書可達漢上

文師汲

客久將流落思歸損舊顏一年秋又老昨日信初還已是飄零慣從他鬢髮斑殷勤語兒女無用淚潺湲

耐邨來漢上

汪穎

別去三年歸路遙故人重見話蕭條顛毛種種心在身世茫茫髀肉消畫裏山川悲往代雨中蓑笠夢前朝羨君已是完婚嫁五嶽惟存谷口樵

漢臬移花

吳邦治

籬門上翠華春早未移家空覺人實事多栽山裡花根株占土脈枝葉付煙霞向暮風濤起深情寄水涯

登漢口第一樓獨望四首之二

吳邦治

古市梁陳久於今百萬家炊烟凌曉霧野客住明霞地涌黃金貴人誰彩筆花閒七憑弔罷鶯燕語平沙

棲息傷幽獨臨高又散襟文章慙報國身世少同岑
虛棟靈風雨危途視井參一聲劃長嘯樓閣大江深

漢口

吳邦治

大別亭七鬱翠霞江深漢廣思無涯如何自古風流地賸有於今富庶家
秋熟一尊籬下酒春飛幾點樹頭花蕭然磬室烟波穩獨把漁竿弄歲華

書龍事

吳邦治

庚辰五月終神龍降大澤金鱗潛幽光土花蝕靈色道傍螳矚豚牛犬驅相逆詎知雲兩
姿不久泥蟠阨一夜霹靂聲虛空曉無跡

漢口水并序

范 鎔

丙辰五月孝感縣教匪滋事明將軍亮率兵勦賊退據胡家砦負嵎不下至六月二十九日始得殲除先是邑令捕獲賊目楊偉鄭自清等九名訊從襄陽人周義祥爲師相期糾衆下應約於午日同起也孝感距漢口不及百里半日可至居人皇七莫定羣爭先僱舟將挈家遠避每舟價數十百金不吝一夕江水驟發後湖漫汗波浪掀颯賊不敢渡賴是以安余謂此湖神默佑當立祠以祀迨寧居行樂無有念之者可慨也詩曰

漢

宵警莫聞早臬食胡家咎裏縱花賊倉皇競佩赤靈符欲上鷁舟少飛翼馮夷振怒輓鳴
鼉吹風蹈浪翻江波一夜湖田水盈丈倒橫天塹驚羣魔漢口人家百萬戶高檣大編集
商賈朝朝聽報捷書飛那有夢魂賊桴鼓維時襄樊煽妖氛連山嘯聚肆剽焚淨掃機槍
才匝月千里爭看飛將軍寧居行樂誰家子買醉青樓博盧雉可憶曩時湖神功一椽不
見供虔祀

漢口敬業堂集

查慎行

口

巨鎮水陸衝彈丸壓楚境南行控巴蜀西去連鄖郢人言雜五方商賈富兼并紛紛隸名
藩一一旗號整駢駢驢尾接得得馬嘒騁俦七人摩肩蹙七豚縮頸羣雞叫咿喔巨犬力
頑獷魚鰕鯉就岸藥料香過嶺黃蒲包官鹽青箬籠苦茗東西水關固上下樓閣迥市聲
朝誼誼烟色晝暝七一氣十萬家焉能辨廬井兩江合流處相峙足成鼎舟車此輻輳翻
覺城郭冷黃沙撲面來却扇小可屏稍喜漢江清浣紗人見影

志

漢口遂初堂集

潘耒

小

漢口通江水勢斜兵塵過後轉繁華朱甍十里山光掩畫鷁千檣水道遮北貨南珍藏作
窟吳商蜀客到如家笑余物外無營者也泊空灘宿浪花

漢口

吳淇

雄鎮曾聞夏口名，河山百戰未全更。
競流漢水趨江水，夾岸吳城對楚城。
十里飄檣依市立，萬家燈火徹宵明。
梁園思客偏多感，直北滄茫是汴京。

晚渡漢口

許錫齡

霧消才見日，風定恰移舟。
波影連三楚，人烟劃二舟。
亂山臨岸斷，灌木隔江稠。
回首陽邏地，蒼茫正拍浮。

漢口夜泊

饒守樸

蕭蕭孤櫂客，衰輕乘輿維舟漢水明。
地勝高樓留夜月，江空細浪作秋聲。
平鋪草色鬼瀝集，亂織烟光舴猛橫。
把酒總添鄉思切，春風回首灌嬰城。

春歸日得楚白姪漢口書

戴文柱

骨肉傷心後，天涯淚暗揮。
家貧歸不易，別久事全非。
買竹春燒筍，逢花晝典衣。
晴川高閣上，誰與對斜暉。

漢江秋望

王元勳

波光天影兩空明，雲外迢遙過雁聲。
颿帶夕陽歸夏口，山連秋色到樊城。
銅鞮誰唱當時曲，鐵鎖空餘弔古情。
欲訪滄浪漁父蹟，濯纓閒對漢江清。

漢上喜晤汪丈

江昱

他鄉執手感前盟
白髮垂肩閱變更
問舊可堪皆後輩
抱書猶記拜先生
漸成安土如秦
贅別後添丁
盡楚聲
客况中平誰復道
一尊寒雨故人情

漢口舟中和召邨作秋水閣詩抄

許兆椿

五湖汎宅計猶賒
擊楫同登漢上槎
世味漸諳知老大
鄉園欲近問桑麻
隔邨樹杪馳驅
影逼水堤根
動浪花
無限心情同着眼
可憐倚櫂聽慈雅

漢口

楊瑞

大別山前水倒流
令人惆悵憶孫劉
書生竟有吞吳計
天意何曾爲蜀謀
楊柳旌旗江上
酒仙人黃鶴水邊樓
也知興廢尋常事
獨有閒情狎水漚

小滿日漢口舟中對雨

姚士銘

今朝逢小滿
好雨及時傾
著水開圓影
飛空作碎聲
雲迷江夏樹
烟鎖漢陽城
待到昏黃
候天清月更明

漢皋

周喬齡

日午層陰散
春光麗漢皋
麥依欵岸上
松與遠峯高
解佩緣誠幻
題襟興尙豪
郢中多雅
調莊寫亦風騷

雨泊漢口有感

蔣炯

沔漢流通萬里潮孤蓬泊處雨瀟灑雲連赤壁波濤壯路出烏林虎豹驕百戰江山餘涕
淚三分事業付漁樵沈沙折戟何須問日倒東風濁酒瓢

喜李嘯郵重來漢口即次元韻

王文寧

相逢真意外猶作夢中猜不畏狂瀾險多因舊雨來別家臨老慣異地見花開莫擬山陰
權春江自溯洄

試茗後湖

范 鏞

夕陽初墮晚涼時萬頃烟波一舸移我本自來還自去姓名那許白漚知

漢口風雨因憶去年阻風於此風揪偶嘯

沈 宜

細雨冥々倍客愁波濤斜織漢江流春風只與詩人舊歲歲相逢欲戀舟

予往漢口龔右人過訪不值歸家用劉以介桃源詩韻寄之

前 人

偶逐江風看渚鷗到家頗怪破清幽只因處士猶耽字遂使漁翁得溯流湖上白雲朝餉
客山陰玉雪夜陪舟君歸倘作桃源記莫注茅堂第五丘

題漢口酒家張氏壁

沈 宜

年來頗結漢陽緣買醉旗亭不袖錢却笑長安風雪裡黃金偏得酒家憐

題漢江晚泛圖

石橋 贗稿

胡體晉

買得扁舟一葉輕，江頭正喜晚潮平。莫因兩槳飛如燕，便向風波險處行。

漢口別范白舫及張苧邨

孫枚

相見倍相憐，深情勝昔年。與君俱逆旅，此別轉悽然。落日明流水，長風送去船。登臨空有

約，孤負好晴川。

時約遊晴川閣未果

泊漢口望大別山作

孫枚

浪游幾度此經過，可奈留無十月何。獨倚篷窗看大別，定教添得別愁多。

時將至襄陽

後湖茶社遠眺

五痴山人稿

閔文哲

小步初離市，湖天望渺冥。雲來秋水白，雨過遠山青。道暑呼佳茗，尋詩倚曲櫺。幽情羨漁

者，歌槳度前汀。

漢皋夜市

陸飛

江頭夜市散，初更醉帽欹。斜白袷輕茉莉，芝蘭香滿路。一街燈火賣花聲。

夢醒猶聞隔院歌，香銷酒冷奈愁何。高樓夜半涼如水，颯煞簷前紡綫婆。

漢口冶遊

方如川

畫地爲牢也，占春桃花泥。宛逐流塵此間便，現泥犂相那得金剛不壞身。

漢上夜泊聞小伶歌聲

楊瑞

蘆荻蕭蕭湘水秋誰家新調按梁州客心不似桓司馬別作潯陽一段愁

瀟湘湖黃花地

劉遠英

天都菴畔雨初晴芳草叢生倍有情十里風光金共燦一湖烟景翠方盈酒香野店來飛蝶車滿芳郊好聽鶯試看鞦韆深院落夕陽掩映菜花明

十一月至漢口與彭棟塘陸筱歛吳樗原集葉松亭宅分韻得酒字

胡紹鼎

明月照庭除華筵列樽酒此景昔所歡相別何太久自我遠行役豈無篋貳缶寒沙雁落時斜月雞鳴後今夕匪夢思嘉會良不偶新知樂云多故人恩已厚聚散如轉環相期慎素守

漢皋洪樂集

徐韋

解珮漢江濱鳴絃玉戶人桃花三月浪楊柳萬家春膝上橫瑤瑟波間覓錦鱗應憐秦氏女日暮翠蛾顰

漢上

王宗璟

漢上遊經數十年詩名不藉俗流傳問來到處曾題壁興劇逢人亦寫箋任彼蒼黃忘本色與誰酬唱結良緣從今解識推敲意漫羨當初步月禪

哭彭棟塘所存

胡紹鼎

棟塘名湘懷詩文擅重名藹然道義篤於行事辛未在漢陽相知日深三年而別
 又五年過漢口棟塘來訪余雅集作歌且屬之圖明年棟塘年六十余客黃州十
 一月遇於漢口忽忽歸去逾月余復至則棟塘沒已十日弔於門門無應者或曰
 是日昇糶出之野未知其處或曰殯也噫

門開寂無人我哭向何處出見道旁兒謂言從此去日夜雪風多何以在中路
 箸書竟何如後世當師之平生守道義故人能知之傷哉千古名雖有復奚爲

抵漢口占二首

子固齋詩存

田維翰

我是當年丁令威而今化鶴又來歸逢人漫話滄桑事只覺城民到眼非
 漢口繁華壓九州題襟勝會紀前游可憐世里長街市也是阿房一炬休

寄題漢口紫陽書院

陳祖范

韋齋身居圖印記猶紫陽晦翁述先志更以顏其堂至今仰止者秦華相低昂書院衍道
 脈嘉名披吳闔近傳漢江口棟宇尤煒煌問誰集衆力徽國乃宗邦旁以憩賓旅中以肄
 文章來往必敬恭曾不異維桑美哉此建置名實誠相當

將到漢口有此作

永井久一郎

行盡河南長短亭去京三日夢中經吳頭楚尾天將近舊識遙山邀我青

題雙烈碑七古一章

徐咸正

女兒給賊賊頭割刃可奪兮志不奪賊縛女兒行路難行路難兮江水寒君不見井可投
臂可斷青史名姝競褒讚胡乃雙烈姓氏終佚散鐵血詩魂荒涼白草同枯爛墓門展拜
問蒼穹蒼穹無語鶻啼紅石碑矗立生英風

漢口癸丑俱樂部詩社徵詠代啟甲寅上巳

王運嘉

江漢滔滔流日夜枌榆萬樹劫灰餘晴川鸚鵡春何似洪水蛇龍禍未紓儘有門材任荒
落尙遺喬木漸凋疎扶輪大雅先河在青眼高歌渺愧予
東鱗西瓜忽相聚悟却隨緣卽是緣古調音沉廣陵散盛游人溯永和年莫拋做帶同珍
惜且拾殘薪待火傳呼起義輪敲白日玻璃聲徹九霄邊

卽席和韶庵詩社徵詠原韻

湘綺樓詩集

王闔蓮

扁舟昨夜過金口重訪婆羅是劫餘江漢有情人易老東南無事力難紓靈泉垂柳依然
綠玉笛催梅逐漸疎幸得分題寫長恨洞庭波遠渺愁予
暮春觴詠兼絃管老入花叢信有緣俱樂詩成癸丑部鑿兵猶記甲寅年曾編軍志書無
隱敢說名山史可傳明日驅車便千里思君回首五雲邊

志

小

口

漢

漢口小志

聽竹廬叢書之一

軼聞志

漢

口

小

志

漢上題襟集唐段成式温庭筠周繇韋蟾等合編世鈔傳本余過書肆輒問及之均答以未見此書及閱漁洋山人詩話亦謂漢上題襟集聞楚潛江莫進士與先有藏本數千里往借鈔則詭云頃遊鄱陽失之迄今以為憾事云云則是集之失傳也久矣徐煥章癩園雜俎

李道士正德時住武當山惟噉麥麩人呼麩子言凶吉多中嘉靖中荆永定郡王禮聘至蕪州問長生訣對曰殿下修身齊家長生訣也賜金帛不受辭歸至漢口臥舟中忽亡去

其後王以事干宗正條例幾廢國思道士言改悔前非卒稱賢王漢陽縣志

仙爹姓名不可攷順治初僑居漢口由義坊言未來事多奇驗一日忽言此處當火急持杯水周行十餘家數日後果火前後灰燼獨所行處得無恙孝廉解乾濬子以痘瘍瘞尼菴側尋復活里人陳姓收養之孝廉不知也每以無子為憂仙爹嘗慰之曰汝子已長成矣初以為誕康熙己酉乾濬遇小兒於途疑其貌類己子物色根究得其詳遂聞於官斷歸乾濬時人作絳紅袍傳奇紀其事於是仙爹之名益著人爭供給之卒葬大別山腰表

曰仙爹云同上

僧二白字東白本儒家龔氏子也七八歲時披剃於城西蘭若初不知書後忽頓悟凡五

鑑三乘之奧悉能洞徹駐錫江夏靈湖寺久之仍歸漢鎮圓叔晚歲善詩歌有栲栳前後集傳於世同上

傅文忠居漢鎮體魁梧長七尺餘乾隆五十五年安南國王阮方平入賀道經漢上傳佩

刀迎立阮凝視搖首咋舌而過同上

王文甯字欒門先世陝西蒲城以業鹺移家漢上孤介自許與人交坦白平易耽吟咏手

右丞集一卷嘗曰學右丞貴得其清矯淡遠之致又性嗜友朋文酒醺會無虛日家以此

落嘗有句云藥貴違兒願家貧仗婦支人以爲達好施予不稍吝有不能償者輒焚券蓋

其性然也有挹樓露軒詩集同上

尙錦堂字香雪居漢口性不苟同所訂交終身如一後進有小善誘掖獎勸有小不善即

加以聲色如訓子弟者然人以是多之屢試不售遊豫章以詩酒自娛有東遊草同上

黃承增字心盦歙人偉貌修髯交遊甚廣工作詩詞文思斐然好客遊所至公卿倒屣爭

相延致爲江湖上客三留漢口與江漢人士爲文酒會將有終焉之志著漢口漫志得二

十三卷未竣而卒同上

黃均字穀原吳縣人山水蒼秀得宋元人法尤長窠石淡遠軼塵詩詞書法亦饒雅潔薄

宦楚鄂性情疎散後贅於漢口周氏頗得隨寓而安之趣同上

漢 口 小 志

漢

口

小

志

范鍇字白舫烏程人性喜吟咏工詞曲廣交遊著有漢口叢談六卷上同

吳邦治字允康號鶴關歙縣人僑寓漢口與段寒香彭念堂稱漢陽三老好學多藝性頗

耿介居有鸞飛樓自作小記甚佳上同

王彭澤字五柳幼穎悟善丹青精於醫能已沉疴性豪放懸壺漢口不論貧富皆往其貧

人贖藥不責償嘗東走邗江西走溟渤故人所贈遺囊中累千金歸召朋舊酣飲竟月生

產不計也貲罄仍寓蕭寺中黃齏白粥與苦行頭陀同飲食其豪如故著有尺木詩集行

世同上

白敦信字誠齋工詩畫精六書之學志潔行方不求人知嘗於由義坊闢地為園隨其基

之高下為小樓曲榭位置楚楚襄河故道當其前春日芳草蒙茸黃花滿目夏秋之交烟

波浩渺釣艇魚帆可指而數也子玉世其家學亦工篆隸漢唐碑版皆手自磨勒分判台

度又善射能開六鈞弓上同

常道性字芝仙自蕪湖遷漢上已歷三世少英敏耽情文史長工書畫晉唐宋元諸大家

之法無不神領意造精賞鑑能歷指其瑕疵以定真偽作詩專寫性靈時謂詩書畫為三

絕云上同

葉廷芳派名成佺字客堯號松亭溧水庠生援例候選道以受分產業在漢口遂著籍漢

漢

陽性孝友書必觀孔孟學必守程朱不規規講說外自表襮而恒以躬修實踐刻勵於衾影雖燕居正衣冠無懈容有第三人析產後皆中落復與合爨同居每歲季冬念貧民無以卒歲懷碎金百數十封徧行閭巷俵散之不告姓名盡一月乃止歲以爲常喜吟咏著有花餘亭詩存孝感胡侍御紹鼎工詩及書與論交最篤每作書喜錄廷芳詩其傾倒若此則廷芳之詩夷猶恬曠風味可想矣卒年五十有四江漢間至今猶有藏侍御書爲兩

家韻事者同上

口

胡侍御牧亭先生名紹鼎孝感人詩古文制藝皆簡古淡泊人亦如之精書法聞諸父老先生館漢臯葉氏日書千字文數字縱橫竟尺積久始成葉氏寶之泐石祠壁非其人不與觀後燬於兵今傳者僅拓本半冊而已當先生臨池時朋輩多誚讓者先生曰子無然數十年後一縑不能易一字也其當時寶貴與自信如此

健齋叢說

志

胡聞若字雨薌侍御牧亭先生子性情文字俱有父風山陰史殿撰致光督楚時以金聘書高山仰止四字於漢口紹興賓館署用已名聞若怒曰胡侍御子弟豈數百金可瞰遂爲制軍作書傭者反其金致光憤甚徧覓書者無出聞若右不得已竟列聞若名焉洪楊逼楚漢鎮焚掠殆盡某將軍見此四字驚謂羣酋曰好護之後之人不能也故訖今巋然獨存每過其下輒低徊留之不忍去

同上

漢

煥斗按此條與孝感縣志所載略同惟縣志稱雨菴先生為侍御之姪此稱侍御子為稍異雨菴先生性傲岸不為勢利動盡人知之不贅惟高山仰止四字經民軍起義該館左右悉成焦土而此四字獨無恙毋抑在天之靈神鬼為之呵護邪余旅漢三載屢欲雇工摹拓留示來茲以案牘勞形未果適晤鄉友毛君玉泉其嗜古與余同極力贊助願出資斧付諸剞劂以公同好坵記于此

口

彭啟賢字敬菴漢口人性孝友好學少孤侍繼母得歡心從兄商賢官闕父衰老不任遠涉啟賢身任甘旨無缺塾師傅某以苦學失明啟賢終身奉之子幼無歸婚教如己出嘗日持籌於市夜則篝火伊唔凡天文地理錢法鹽筴之書罔不究覽邑中橋梁社倉普濟堂諸事經啟賢手悉公正無弊累至數千金入即散去或購買奇書雖罄貲不惜年六十一卒前郡守郭公朝祚志其墓曰高士

漢陽縣志

小

兩孝子坊在漢鎮花樓下為孝子黃金階黃儀立同治元年四月署知府周樂移建郭公堤鐘樓下因年久石爛易坊為碑並誌巔末於石

同上

附錄兩孝子事

黃金階事親至孝母病禱神求代遂獲痊及母歿手刻像奉事如生前廬墓六年有白鷗來巢麥穗兩歧靈芝五莖之異有司日饋薪米學使王瑄拔入膠庠康熙四十

四年旌

黃儀金階子父病泣跪醫前請救父歿貧不能葬守櫬哀號三年如一日既葬廬墓三年夜有巨蟒護其廬墓田所植瓜皆一帶二寶母何氏二十九守節至五十卒儀哀毀如居父喪觀者流涕因名其地曰孝子里雍正元年旌

康熙三十四年乙亥五月漢口天雨豆大如小赤豆紫色有一點黑處似帶

漢口後湖自乙酉迄今樵魚者每於地獲白鼠好事者捕以爲戲

漢口鎮小河內藏鉄索其長不可數計順治九年河涸居民日拽之疊成山莫能窮盡明年水漲索仍沒攷之博物者皆莫知其故

九龍八鳳山海雄鎮碑在漢口大智坊河街道光間燬於火

清官碑亭在漢口大智坊康熙五十六年闔邑爲學使李公周望建今毀

額公亭在漢口大智坊麻陽口康熙五十八年闔邑公建

惟叙亭在漢鎮堡垣內同治二年郡守鍾謙鈞建亭中刊江漢朝宗圖備載堡垣形勢堡

門礮台及漢口各街巷曲折焉以上漢陽縣志

惠民亭在勸工院後馬路旁清光緒三十二年爲南皮張文襄建今於亭下設輔德初等

小學校

錫山北門外治坊有名王仙人者愛畜珍禽奇獸羣呼之曰仙人乾隆己酉六月余與仙人遇於漢口見其廬中養一小鹿甚馴架上有白鸚鵡能言天子萬年吉祥如意等語自言嘗得一獼猴高不過六七寸與老母雞同宿猴索食雞啄庭中虫蟻哺之猴不願猴亦將所食果栗與雞久之竟成母子猴每夜宿雞必以兩翼覆護以爲常也錢泳履園叢話臆論

漢口泊船以襄河口爲之歸墟然兩淮鹽商行鹽雖在漢口而鹽船絕稠而高大則多泊於對岸之塘角曰下新河終清之世舉如此也余觀周自庵學士壽昌思益堂詩鈔有哀塘角行五古一章則紀道光二十九年火災也其詩敘述極詳備可稱詩史今輯其自註爲一篇俾攷漢口舊聞者摭入焉清道光二十九年己酉歲湖北武昌省城外之塘角俗曰新河者大火新河者因省城與漢口對岸江流經黃鵠磯水奔駛無泊船處因於塘角開一河水曲而回旋用以繫舟綿亘約十里尤以兩淮鹽船屯泊最廣是時適有大艚賊賊者四百二十艘互相牽繫餘外又係艘六百餘隻十九皆估客船間亦雜有官舫首尾聯絡勢若蛇蟠所以絕風濤避寇賊也歲十一月十九日入夜舟人醉飽者安役者皆安寢矣突有一大船中鹽丁攤一鎚吸鴉片膏一火倏騰漸延及什物船篷以至於焚檣竿俄而火燭長川船人競起理篙杙者竄逸者皆自夢魂中迷駭昏亂不知所之而又千船固結倉卒不可割分上流火勢劇烈炎炎若飛砲下流風逆即解纜亦不得出船塞江路

漢

舟中兄弟夫妻兒女皆忍死相覓聲呼噪漸至聽聞皆迷但見風聲火聲交互歛歛人皆驚投如羊豕自竄水火有上躍如猿躍起仍墮水火者有逃入水水沸致糜其肢體者有一婦新產未裹裳禪母子互跳擲相抱焚死者有一船逃對岸將停而輪迴風迫入火中十口無一存者是夜火發燒及次日辰未止浮脂羃江波腥臭不可聞災後無棺可殮骸只以一席裹一尸至數千百具誠浩劫也去汪容甫哀船之歲又數十年意者鹽商蠹國病民縱侈暴殄之惡所必至者歟

王葆心晦堂近世事箋

小

漢口鎮有劉氏女許嫁張氏子彼此往來嬉戲從不避忌亦其鄉俗然也有富家兒見而艷之謀於父將以千金買爲妾父漫應之女以爲實然是夜啟門潛出如張氏告之乃即夕成禮焉質明父失女奔告於張則女及壻雙雙而出拜矣夫六禮不備貞女不行此女所爲殊乖禮法然既聘則非奔也宋儒云權而得中乃禮也或可爲此女解嘲歟

俞樾右臺仙館筆記

志

漢口鎮袁家灣有老工年六十三矣二子未娶俱執父業而兄弟不相能偶因口角兄舉斧砍弟之頭弟即死鄰人欲縛其兄弟送官父泣曰老朽止生此不肖子二今幼子已死非命而長子復抵法則暮年何恃焉衆哀其言各散去其事竟已余按紀文達筆記中載有一事與此相類天下事竟有情與理相妨者律載重囚無子者許其妻妾入獄此或可以通其變乎

同上

漢

口

小

志

吾國揚子江沿岸繁盛之區漢口當首屈一指民軍抵漢盡力保護居民安甯詎自九月初九日後清軍進據華界即縱火焚燒慘無人理茲將被焚地址調查誌之一河街上至大通巷河下止一中街至安善巷止一後街至馬路止一下街至招商局止一黃陂街僅馬王廟四官殿兩處尚存餘盡被燒一大智門一帶至新馬路興業銀行旁止統計華界房屋燒去十成之九漢鎮精華至此殆盡金城湖漢百事

民國成立後海內羣頌武漢起義之壯偉自元季天完徐氏起義斬黃後五百年未有之盛也副總統黎元洪領湖北都督爰開革命實錄館於漢口之英界一馬路以隨州謝石欽等調查事實而以羅田王葆心等總修書事王氏固宿儒議先爲長編以經緯散殊之事項壬子八月啟館卅年而長編甫竣猝以江西變亂事遂中止論者惜之漢口本商場以修書之事點綴其間誠爲罕事恐久而湮沒特予志之

海甯女士王蓉珊自號海瀕居士寄籍黃安系出名家歸前清荊州旗防候補知府寶勳早喪所天操行貞苦嫻吟咏國變後家破流寓漢口法界以詩詞自遣有壬子漢上感秋詩云秋風吹我襟寒氣侵我心我心悲所遇意緒托鳴琴天上有明月皎潔自古今照見天下事不平多目深我亦堂堂軀銜石比冤禽我降無巢梁躑躅不能尋游蜉日徵逐傀儡匪所禁况復古祖國大勢日將沉何忍心無競何忍舌本瘖何可事遊宴何不鳴霜鏢

漢

口

小

志

人身莫辜負白日馳駸駸展轉沸中腸午夜起哀吟又有偶題云仍疑身作客徒倚且安之圖史供生活飄零付小詩思慳緣學苦韻劇人毫遲無限蒼茫意臨風寫楚詞著有好學為福齋詩草曾見漢壽易實甫觀察順鼎題其詩集云雲羅萬里索詩來劫後珠啼末化灰冷雁幽猿同苦調女龍雌鳳此驚才湘靈清怨聞瑤瑟老穆間愁滿玉臺更憶天涯老都講尊前曾為慧禽哀自注書生無力扶衰運托命尊前惜慧禽乃女士之師王晦堂二十年前在兩湖書院咏鸚鵡賦絕句中語長沙吳編修嘉瑞題云物是人非事事休李易安句雙溪無復汎輕舟才名身世同清照一例多情一例愁大冶朱編修國楨題云九疑竹管淚縱橫十丈凌霄綴玲瓏周室僅餘嫫媿緯秦台容築女懷清西山薇蕨都無命古井波瀾誓此生惟有名心鐫木得含秋抵死作虫鳴可以見女士之身世與其志尙矣此亦足點綴漢上山川也參好學為福齋詩存並題詞

雙烈碑舊在城門左側前清光緒三十三年丁未張南皮督鄂毀城垣為馬路倒置二碑于泥濘中沔陽陶君慶棠不忍見商之濟生堂友藍子芬君倩役移置于該堂之左一為烈女殺賊處咸豐五年七月十八日粵賊竄漢居民皆挈眷以逃烈女適遇賊于後湖第五泉側賊艷女貌逼之甚女皇然若有所思旋笑曰諾但畏爾刃盍去諸賊去刃復逼之女曰刃則去矣奈爾衣濺血何賊脫衣見胸女出賊不意拾賊刃刃賊胸賊死女亦自刎羣賊掉舌不敢進同難婦女數十人悉藉以免時郭君退山之妾與其母亦在遁中親見

漢

其狀遂與何君右田沈君海帆同樹碣于其地其一為烈女投江碑烈女江夏人遺其姓字咸豐乙卯舉逆復竄漢皋女適遇賊於後湖被掠入賊舟同舟女伴惟女姿首冠其羣賊欲載至江南充偽妃選女知乘不備投江死是時邑人有陷賊者悉其事且言死之前一日曾裂指血書被作長句惜詩不傳僅記篇首有生長朱門十九春之句蓋名門弱息多才而能取義者

徐煥章嫻園雜俎

口

小

同治丙寅揚子江濱有漁人舉網獲一女屍面貌如生年約二九附近男女集觀無一識者漁遂同募微資具棺為掩殮之計時老嫗為女解去濕衣見血帛自襟中墮下蓋血書自盡詩云（妾長朱門十九春如何竟作亂離人殺身無濟君王事盡節聊酬夫壻恩波冷自憐沉弱骨月明誰與弔孤魂哀哀父母恩難報但願來生作子孫）孝義節烈發於至性至情令人讀之酸心聞之淚下

同上

志

漢口節孝坊不多觀除忠義節烈祠外惟蘇湖公所左側有石坊一座殘缺不堪姓氏亦無可考惟橫額上有前漢陽府學教授李文靖所題三十二字尙完善可讀姑存之以備參考其字云琅琊望族蘭陵世系茶蘖清操冰霜孤詣桓孟可方郝鍾堪欒勒石標貞綿於勿替

同上

吾鄉胡侍御牧亭先生曾授讀於土濳紫竹菴紫竹禪林四字出其手筆惜兵燹後焚燬

失實先生手澤遂不得而見聞之先君子云胡侍御書學白鹿洞其氣魄雄厚實駕白鹿洞而上之吾家所藏（滿座山光搖劍戟遠門波色動樓臺）一聯殆墨寶也同上

漢

口

小

志

漢口鎮商賈居民湊雜戶以十萬計嘉慶十五年庚午春大火延熾殆數萬家街市中截彌望盡成焦土然以貨物所集之區不難重構一月之內室堵齊興凡百販鬻俱復其常其時遍地皆小鼠長不盈咫或白晝游行見人亦不甚畏避雖以計取殺之究多而不能除顧未嘗見一壯大之鼠兩三旬外則小者盡長而大矣此客於漢鎮者所親見而詳述如此當烈焰焚燎之時卽穴土數尺不免灼爛鼠之種類宜無復遺奚自而蕃于產育縱或由他處走來亦必其大者何以皆爲雛稚又何以較平時而反增多豈天之生物既有此一類卽不欲殄滅之而故爲布種之歟是則佛氏所謂四生中之化生也初不必有種也其事似怪而要不足爲怪試觀大旱涸澤枯燥無殊於陸地水族之生氣盡矣乃經雨而魚蝦更繁不同此一理乎金谿李元復常談叢錄

清道光間漢口有涂孝女者其人黑面微麻言笑端謹立志養母不肯字人葉調元有詩云涂家孝女養孀親剪紙成花巧奪春手執驚閨沿戶賣貨郎誰識木蘭身

葉調元云米廠大馬頭之外父老相傳尙有街道兩條今皆崩圯漢口竹枝詞注

堤口爲漢水出口之處舊有捲棚石橋一道上書漢口二字峭拔可愛今已淤塞不可得

漢

口

小

志

而見矣僑口地方亦有僑口二字不知何人秉筆有某客夜泊僑口詩云渡頭春水碧僑口夕陽紅云云姑錄之以質諸多聞之君子櫛齒雜俎

漢口於二十一日匪徒最恣肆花樓錢店之被搶者數家官錢銀元等票遂失効力市面大恐慌加以自武昌逃來之滿人狙伏各處縱火圖財人心惶惶一刻數驚花樓南城各處皆有火起至若後城馬路一帶亦有多數匪徒三五成羣結黨要結文弱者多遭其害輪船碼頭下男女老幼坐地而哭者甚夥皆因衣物被劫而輪船買辦惟利是圖力索重價致欲行不得欲歸不能苦楚之狀不堪入目迨二十三日始漸恢復秩序此亦改革時期所必經之階級也金城湖漢百事

鄭交甫常游漢江見二女皆麗服華裝佩兩明珠大如荆雞之卵交甫見而悅之不知其神也下請其佩二女手解佩以與交甫受而懷之行數十步視懷空無珠二女忽不見

漢女解佩未及于亂而後世以為風流話柄何耶史情

江油然字元白諸生貌魁岸多膂力喜談方略諳兵制崇正中寇氛日熾油然結鄉勇勵以大義為捍禦計值左帥部校惠登相有潰卒由豫入境焚掠縱橫油然率數百人相持于後襄河凡六七日卒莫能進從他道去事平撫按褒其功授以職辭不就漢陽縣志

大安寺鐘銘宋嘉熙四年孟琪鑄今移江夏鐵佛寺中鐘上層琪結銜後布捨姓名大半

漢

口

小

志

剝落按嘉熙四年琪于漢口置屯二十以養新兵其鐘之鑄於李家洲正屬管內今洲已
湮沒鐘之移置未審何時銘序脫落不可句讀其末云波心潮出箇家風般般無欠欠金
鐘淨心竭力功圓滿喝得金烏離海東嘉熙庚子七月中浣漢東孟琪撰

同上

歛吳美堂業齏漢口富而好奇得一硯寶甚嘗持之溺水比得救仍持以起有關東安阿
三者亦以富俠名聞吳硯遺賓客厚餽欲得之吳不應因托借觀復以重價酬亦不可乃
張盛筵出六美姬指一姝色善琴者求換吳佯曰君明當出研俟余賦詩與別可也安大
悅吳歸覓一健者從及研出故爲歛獻撫摩間遽授健者持走安追之不及因大笑掉臂
去黃岡吳德芝爲賦研不換妾行云莫笑鵠眼石不換蛾眉人我石患難曾同身蛾眉雖
好來方新得新捐故何辜恩九賓設次險一擲誰知趙璧竟不失君仍巫山尋雨雲我自
南宮拜袍笏高人嗜好各癖痴一事風流兩得之

漢口叢談

外舅吳曾庾公歛豐南人言其族兄屨晉公者奇士也富而任俠武藝絕羣尤精劍術嘗
客漢口一日有老人携少女造門請較藝公接之視其女年十四五鬢髮垂肩神清若靈
異焉問姓名不告曰第比劍耳因約郎官湖上尅期去及期公往女已先在捧劍立繡裳
文衣非劍裝也公語易服曰不必語次白光一閃已及公頂急出劍敵之一劍又起但聞
颯颯有聲白光圍繞女隱躍光中不可見而鋒芒駭疾公愈退劍愈逼時觀者千人咸木

漢

立神悚無敢喧公大懼奮躍出八九步外曰神伎也止母過迫女乃止視公微笑曰君能敵我亦大不易無怪師云爲及門高足也公異其言詳詰來蹤則授女術者卽公師也嘗道公能故來一校耳然終不通姓氏公留之不可驢以金不受竟去後公他伎悉以傳人惟不言劍

江紹蓮聞見開言

口

李拗枝不知何許人康熙間乞食漢口一飽外盡飯飢者賈翁某覺其異頻呼而餉之割門外舍與棲止李日游都市夕歸宿有年矣隣有孝子母病篤醫藥無效或謂李非常人盍求之孝子晨潔衣冠跪請李所李臥不顧孝子請益力李笑曰君真痴矣哉我乞人奚能爲顧君念良摯宜爲計越三日岳陽樓有烹牛脯者取以啖母可也孝子以岳州隔千里難三日至再請焉李怒曰事急求吾而不用吾命曾有爲人子而憚勞若是哉擊以杖而逐之孝子迫母疾姑買舟挂颿風迅如矢三日竟抵岳陽樓下登岸物色適二丐踞地共食窺之牛脯也喜極乞其餘吝不與奪而走丐追焉孝子以母疾思肉告丐曰爾其詭我哉旣爾且將去但屬李拗枝母多饒舌也孝子聞而驚問拗枝何如人丐忽不見比歸出肉療母頓瘥往謝李李已病越數日死矣賈翁憐而瘞之後十餘年有客從蜀來以書達謝兼致雙履啟緘乃拗枝名而履則翁子婦向施爲拗枝殮物始識爲仙其死也恐爲

志

小

人所覺故幻走云

江紹蓮聞見開言

漢

漢上徐校書蘭芷秀曼善都雅筆札手作小箋皆有思致所居翦雲樓植觀音柳數株高出簷牙每凭欄凝望瀟然作出塵想予與游數載贈詩有云柳眉不是尋常樣分得慈雲一段春後棄家入道年才二十也丁巳予北上路旁見觀音柳感作云暗記昔年游冶處

一樓斜拂翦雲樓爲之唏噓累日吳格齋閒情麗品

黃默谷燁照罷廣東佛山同知歸旅居漢口工詩畫甲辰吟社常與主盟曩爲夏芳原寫唐王建中庭地白樹棲雅一絕詩意于聽秋閣歲已巳曾與汪均之正盞過烟鬢閣芳原出示此幀畫法于蒼渾中得清潤之致題跋于後而返漢口叢談

口

小

漢上一諸生素著才名屢試不第友有爲請乩者叩之判云此生應得科名以少時館于某家與一婢私狎業已削籍尙欲叩問功名邪生悚然警懼因輯戒淫功過格廣採法案募資刊施修身力學至康熙丙子科仍中式人以爲改過之報云因果錄

志

僧戒顯曰漢口僧號宏戒專化人放生一日遇屠者肩擐一犬僧苦勸買放啞執不允乃云子與此犬殆夙世冤業吾不能救解也合掌作禮而退是夜屠人宰犬手舉下鍋忽沸水濺心肉爛七日洞穿而死漢口人皆感動遂釀金建放生庵焉余往來漢上時寓于此

按庵址相傳爲今同知署同上

范蓮賓至渥歛之獅塘人家素封援例授州司馬職後中落不屑依人生活常隻身往來

漢

耶孺之間販鮮鬻果以自給詩文書畫琴棋而外音樂演劇刺繡雕塑無不能之膂力近千斤手技能却五六十人客漢口時曾脫某相國小阮某公子于平康之厄羣不逞拳棒交舉蓮寶負某公子揭樓瓦飛身直下冲突重圍而出無少傷洵異士也嘉慶初卒于沙

漢口
叢談

巴蓮舫慰祖好學多藝工隸書兼善技勇業鱗漢上愛才好客四方著名之士道經漢口者無不相推僑札之好一時題襟雅集仿之天津查氏邗江馬氏蓮舫逝世風流歇絕已

數十載宜心庵漫志思緬幽深感慨係之也

漢口
叢談

小口

錢塘胡戟門晉以軍功補新灘巡檢調蒞仁義司時淮之南北頻歲水滌逃荒者以什百計乞食武漢間內有無賴子恃飢民之名率婦女橫逆漢口市塵不勝其擾大府慮成羣滋事檄飭盡驅出境戟門陰念驅此仇離又以隣國爲壑聞江南春稔莫若計其人口給資俾歸就食因出俸餘室人徐氏亦脫釵珥付質庫好義者咸捐助乃爲買舟船具糗糧悉諭登舟歡呼東下程浩亭有詩紀之云有丹起死不爲難難在貧醫肉肯剜百四十人齊得活一時謳頌徧江干

同上

吳芍圃勺一字灌雲倜儻好義邗江有貧女年十四五隨其父母來漢投所親不遇斷炊鬻女誤入狹邪灌雲聞之急告戟門斷贖身券其價項已半付旅債灌雲慨然資助免墮

煙花且復給費使歸真盛舉也同上

曹問林侍墀字曙階歛貢生性純和好學嗜詩爲岳夫外舅嘗館于鮑筠莊漢上寓齋賓

主倡酬殆無虛日新雨聯吟落枝倡和之集兩翁皆與詩會興不少衰同上

洪旃林檀字少弓業鱣漢上閱世矣遂著邑籍近移家居仁坊新築亭館軒窗窈窕樓閣

深沈頗饒花木之趣主人名之曰誰園善寓達觀意也辛巳春初積雪初霽折柬相邀同

程浩亭常芝仙登問青閣賞雪瑤霏霰紛飛于梅香竹影間釀玉弦絲歌郎一曲迨夜

分始散芝仙賦詩余與旃林和之詩云訪戴誰園路同雲望杳漫雪深迷徑曲梅瘦傲春

寒燈影明高閣歌聲繞畫欄勝游良不易莫却酒杯寬同上

丹徒包雲舫遐裕以業鱣客漢性慷慨能急人難故手致數萬金亦時得時失營別業於

漢陽東門外水閣風亭芰荷香溢頗占納涼之趣包山司馬祥高其胞姪也磊落好交嘗

得朱氏舊圃壘湖石構亭臺爲觴咏地名曰怡園題贈成卷同上

洪旃林誰園蓄孔雀雌雄各一伏卵成雛年得數羣如禽譜所云三年後金翠遍體翎長

三四尺春日對客開屏宛轉就人而舞此禽本羅江野生之物今養於家園中伏雛成隊

馴擾如家雞亦異事也年來更闢荷池寬盈十丈築方墩建亭其上榜曰得月界以柳堤

渡以正橋較前更增軒廠旃林園居雜咏有神游太古羲皇上人在蒼茫雲水間希有堪

漢

口

小

志

誇雙孔雀伏雛成隊伴幽棲之句蓋紀實也

同上

漢

閱秋舫文哲初名大綸舊爲吳興著族其先世宦游山左明季遷徙漢上秋舫長身修髯貌頗偉性傲岸不拘嗜作韻語不事鉤深抉幽嘗錄古今人詩數十册操觚染翰兀兀穹年雖炊煙欲斷悉置不問復愛書畫時過骨董家詢視遇有佳者典衣購之不吝更好觀人弈嘗備酒菓以招弈者弈者殫思苦心以爭劫殺而秋舫則起伏相忘勝敗不關局罷掀髯大笑漢上春時燈市甚盛好事者乃製燈謎懸於戶外設文房各物以酬中者秋舫尤酷嗜之聞有燈謎處無不到更闌人散猶獨立褰衷若不忍去者歸必紙筆携滿袖恆欣欣然有喜色人笑其痴因自號五痴居士曩倩人寫小影作荒山古木一人孤行狀

小

題曰古道獨行圖乞人題咏甚多其風趣如此著有五痴山人藁

同上

志

嘉善徐岳季方見聞錄飛瓊廣陵何氏女隨母長於蜀中入王府習梨園色既殊人音復出衆王甚嬖之國初爲大帥所得仍隸樂籍一都閩狎之千金買去大帥持其短復索千金諸當事又挾之更重費都閩旋以缺庫帑下獄無所償飛瓊日以妾之故至此若惜小節而守此將終陷主于獄底也徑辭去至漢口密處一室至中秋月朗游人雜沓飛瓊擦鬢凭欄喉嚨一聲響傳九陌觀者雲集明晨巨商貴客車馬闐門大聲高價數月間遂以所得纏頭清缺額都閩出遣人來迎飛瓊曰妾本煙花賤質主以私妮動虧國課致陷縲

純故蒙垢忍恥復以聲色事人免主幽繫既潔之復陷穢濁尙何面目偷生以重主君之

辱邪遂自經

漢口叢談

明梁憶遵閒錄云太祖征陳友諒王師至瀟湘賦詩曰馬渡沙頭苜蓿香片雲片雨渡瀟

湘東風吹醒英雄夢不是咸陽是洛陽天葩睿藻豪宕英邁有如此縣志按太祖殪友諒

于鄱陽追至武昌而返後一年又躬討陳理駐兵漢陽修其城郭理降振旅凱旋足迹未

嘗越江漢以南不當遠涉瀟湘也惟漢口之後湖當時爲襄河故道一名瀟湘湖勒馬賦

詩或卽此耳

同上

迴龍寺縣志明永樂二年建初名塞口寺世宗臨幸勅賜迴龍寺國朝黃閣詩云地僻門

無徑松間榻有陰秋山分野闊寒水入雲深荒草高僧意斜陽過客心漫從星月下枕石

作長吟寺初建時乃在荒洲之上迨國初黃閣題詩地猶僻野今已闌闌誼闡無復秋山

寒水之狀矣按漫志明世宗自安陸入繼大統御蹕曾過漢口今有接駕嘴馬頭俗譌呼

薛家嘴又有報駕巷譌呼鮑家送駕墩訛呼宋家

同上

天都庵爲齋問公所黃心齋云舊有巴蓮舫隸書蜡臘醯飲處五大字榜額筆勢古勁不

知何人易去

同上

隨園詩話嚴公瑞龍任湖北布政使招諸詩人倡和有續漢上題襟集傅辰三感春句但

誇雙孔雀伏雛成隊伴幽棲之句蓋紀實也

同上

閔秋舫文哲初名大綸舊為吳興著族其先世宦游山左明季遷徙漢上秋舫長身修髯貌頗偉性傲岸不拘嗜作韻語不事鈎深抉幽嘗錄古今人詩數十册操觚染翰兀兀穹年雖炊煙欲斷悉置不問復愛書畫時過骨董家詢視遇有佳者典衣購之不吝更好觀人弈嘗備酒菓以招弈者弈者殫思苦心以爭劫殺而秋舫則起伏相忘勝敗不關局罷掀髯大笑漢上春時燈市甚盛好事者乃製燈謎懸於戶外設文房各物以酬中者秋舫尤酷嗜之聞有燈謎處無不到更闌人散猶獨立褰裳若不忍去者歸必紙筆携滿袖恆欣欣然有喜色人笑其痴因自號五痴居士曩倩人寫小影作荒山古木一人孤行狀

題曰古道獨行圖乞人題咏甚多其風趣如此著有五痴山人藁

同上

嘉善徐岳季方見聞錄飛瓊廣陵何氏女隨母長於蜀中入王府習梨園色既殊人音復出衆于甚嬖之國初為大帥所得仍隸樂籍一都閩狎之千金買去大帥持其短復索千金諸當事又挾之更重費都閩旋以缺庫帑下獄無所償飛瓊曰以妾之故至此若惜小節而守此將終陷主于獄底也徑辭去至漢口密處一室至中秋月朗游人雜沓飛瓊撥鬢凭欄喉嚨一聲響傳九陌觀者雲集明晨巨商貴客車馬闐門大聲高價數月間遂以所得纏頭清缺額都閩出遣人來迎飛瓊曰妾本煙花賤質主以私妮動虧國課致陷縲

純故蒙垢忍恥復以聲色事人免主幽繫既潔之復陷穢濁尙何面目偷生以重主君之辱邪遂自經漢口叢談

明梁憶遵閒錄云太祖征陳友諒王師至瀟湘賦詩曰馬渡沙頭苜蓿香片雲片雨渡瀟湘東風吹醒英雄夢不是咸陽是洛陽天葩睿藻豪宕英邁有如此縣志按太祖殪友諒

于鄱陽追至武昌而返後一年又躬討陳理駐兵漢陽修其城郭理降振旅凱旋足迹未嘗越江漢以南不當遠涉瀟湘也惟漢口之後湖當時爲襄河故道一名瀟湘湖勒馬賦

詩或卽此耳同上

廻龍寺縣志明永樂二年建初名塞口寺世宗臨幸勅賜廻龍寺國朝黃閣詩云地僻門

無徑松間榻有陰秋山分野闊寒水入雲深荒草高僧意斜陽過客心漫從星月下枕石

作長吟寺初建時乃在荒洲之上迨國初黃閣題詩地猶僻野今已墾闢諠闐無復秋山

寒水之狀矣按漫志明世宗自安陸入繼大統御蹕曾過漢口今有接駕嘴馬頭俗謔呼

薛家嘴又有報駕巷謔呼鮑家送駕墩訛呼宋家同上

天都庵爲巖間公所黃心齋云舊有巴蓮舫隸書蜡臘醺飲處五大字榜額筆勢古勁不

知何人易去同上

隨園詩話嚴公瑞龍任湖北布政使招諸詩人倡和有續漢上題襟集傅辰三感春句但

漢

口

小

志

愁過却花朝後一日春容減一分沈樹德落花句飛燕蹴歸簾影裏游魚吹起浪花中葉
聲木送人句吹酒涼風穿樹過破煙水月隔樓生續題襟集今不得見而當日公卿下士
虛懷忘其榮利若徐嚴二公者能無景仰

漢口叢談

大觀音閣門榜覺悟羣生四大字瘦勁有力爲雍正乙卯九齡童子曾珮書按珮字一峯
漢口人幼聰慧異常兒逾冠而夭以諸生終有爲劉明府題畫詩云幾點胭脂染作霞游
蜂誤認夕陽斜放衙罷後渾無事好看栽來滿縣花閣奉觀音大士像金身丈六妙相莊
嚴每于二月十九日大士誕辰士女禱祝寶馬香輿寺門填溢香火甚盛相傳昔有木賈
從蜀中運像送普陀山道出漢江因事暫供後湖初創竹屋蓋覆後屢著靈異木賈亦久
不至鎮人遂募建高閣崇奉焉

同上

縣志却月城在城北七里寔宇記以形如却月故名又馬騎城在却月城西二里荊州記
城周五里高一丈長棚岡卽其舊址岡今無攷又漢陰城在城西四十五里漢陰山下皆
不詳所築于何時也又蕭公廢城舊志云在城北五里梁武帝初起兵常築城于漢口時
未卽位故稱蕭公城明趙弼馬騎城詩落日荒林宿靄收馬騎城下碧波流水光山色無
穹盡釀作詩人浩蕩愁朱衣蕭公城詩渺々長江水崑崙別山臺日月夏禹遠時運蕭梁
來鞭驅十萬人版築飛塵埃遺禍起大業屠戮良可哀古城今荒蕪久立但褻裒按此二

詩明季城址猶可追尋也余疑蕭公馬騎却月三城皆在今漢口左近惜無從攷耳

縣志漢口會流處上有石銘云下至水府三十一里相傳李斯刻石如此天下水府十八

處漢口

漢獻帝建安二年九月漢水溢

同上

漢後帝建興七年即吳大帝黃龍元年夏口言黃龍見夏四月夏口言鳳皇見

同上

晉懷帝永嘉三年大旱江漢可涉

同上

元至正十二年漢口天雨粉鏝民家居戶柱壁有粉痕如鏝者無數明年三月月食太白

徐壽輝倡亂于漢沔十五年冬漢口雨黑雪

同上

明宏治二年春漢口雨小豆種之蔓生不實

同上

康熙三十四年五月湖廣漢口天雨豆好事者携至余得二顆大如小赤豆紫色有一點

黑處如帶然絕不類豆聞尙有大者余未之見也

述異記

勞必達字磊卿號尊三康熙辛丑進士官昭文知縣家居唐家巷正街母朱氏年二十九

而寡必達甫周晬會吳逆煽亂抱孤四匿紡績撫育備嘗艱苦迨必達出仕氏已先逝雍

正三年請旌

漢口叢談

汪遯漁原名穎字鈍予數歲解吟詩有孔李之譽而雅好韜略講求經濟思以功名自見

漢

口

小

志

時滇黔用兵短衣負劍慷慨赴軍佐謀畫有聲戎幕至京師鬱鬱不得志遂謝去究討四始六義寢食唐宋大家掇其精髓詩學益進因縱游山水所至與諸名宿倡和晚年歸隱漢上之蕪陽口老屋數椽蠟屐幾兩悠然以之終身友人顯仕者競以書招皆不赴石城徐公惺爲楚方伯雅重遜漁數數減從過其東漪草堂倡酬談笑車笠忘形遜漁善篆刻徐嘗以佳石屬偶促迫之遽曰公以某爲石工耶徐笑謝不遑云上同

漢上寫真名手以曾穉田爲第一繼其後者當首推閔貞貞字正齋其祖自廣濟遷漢幼孤思親不置因刻苦習傳神之藝數年遂妙絕一時敬繪父母像懸于所居之畫藏朝夕焚香率婦並拜每飯必祭數十年如一日人呼爲閔孝子又呼爲閔狀子以其悠悠忽忽非狂非痴故也晚工粗筆山水點墨成趣嗜牛脯大啖兼人求畫者不得恒潛煮牛肉倍加品料邀至家坐談間聞牛脯香則垂涎以問因留飯故遲遲言未熟且出素紙硯墨乞畫必欣然揮豪洒洒數幅若至得意處並忘牛肉之熟與否矣交游甚廣乾隆丁卯薄游京師時後藏班禪額爾得尼來朝如意館供奉詔圖其形無得其仿佛者金大司空舉貞赴嵩祝寺貌之甫一點睛其隨行之第巴班第等皆驚歎爲神畫畢荷白金文綺之賜名益著聞所居在大通巷後歸築小樓題曰看山讀畫樓晝則賓朋滿座徵逐嬉游夜則命僕磨墨樓中高燒銀燭四壁皆燈果盒茗壺畢具倚胡床假寐俟醒卽起振筆以畫精

神覺勃然盈紙矣同上

朱在鎮字定山號蘭田漢口名布衣也善書工詩嘗游金陵與諸名士賦鳥夢限四支韻

援筆先成衆爲擱筆一時傳賞詩云何處尋幽境空林借一枝喜無風夜穩將有月時宜

草滿黃陵廟春深白帝祠物情渾類此造化可憐兒同上

常芝仙云王五柳不知何許人爲漢上寓公少時曾見尺木堂詩刻數十番市隱漢臯縱

情詩酒破書百卷矮屋三間身外無長物一老僕執炊染惡厲疾蹣跚瘋穢五柳不以爲

嫌也偶于除夕大書聯句懸戶外云不改其樂大有可觀有無名子竊增寫六字于上云

王先生不改其樂老麻風大有可觀相傳爲笑同上

戴喻讓字思任號景舉家漢口乾隆辛酉舉人素有文名由房縣教諭補惠民知縣有聽

鸚堂春草吟春聲堂諸集同上

乾隆初年有龍墮于漢口居仁坊中路污水蕩中鱗甲閃爍蟠屈不得伸者旬日虫聚蠅

集腥聞滿野居民恐懼張蘆蓬以衛之並設醮壇焚香禱祝一夕雷雨大作不知所往吳

秋水別駕紹濬言其尊人方由先生所目覩者同上

彭念堂作漢口攷一篇吳鶴關書其後云地輿中山石難遷平蕪易改勢使然與夏沔漢

三口入江故道幾無可攷正坐此耳倘非有巍然之大別雖千舉舌何益噫今之漢口非

漢 口 小 志

漢

口

小

志

古之漢口吾不慮夫千百年後今之漢口又莫可知邪嘗思擬一私誌就正大方老嫻而輟觀此文輕若列眉夏口明則河口漢口亦明矣豈非快事上同

彭湘懷字念堂號棟塘漢口人喜藏書性孤介落落不苟交南游吳越北至都門出居庸

歷俺答舊部關塞山川供其吟眺著有三山游草西湖紀游獨特皋廡諸集上同

吳仕潮字韓若漢口人原籍歙縣工詩尤長于五言性好客吟朋常滿座也懷人詩數十

首以紀交游其自序云秋夜長輾轉不寐加以虫聲幽咽檐霽淒清撫景茫茫百端交集

因憶生平由師及友凡以文字締結者各綴小詩用紀交情如親色笑兼以破我岑寂倘

曾經贈答而未通心志詎敢妄引以博廣交之名至于曩極綢繆近或疎闊者在彼未著

絕交之書遽云割席未忍也計詩三十八章約以相識之後先為次歿與存爵與齒均弗

論焉乾隆丙申十月鳳浦吳仕潮識上同

夏永字石壟號松期老人我友芳原之勳之大父也喜歌咏愛交游晚目江右來楚愛晴

川山水之勝因家漢上買田終老遂入籍焉築煙鬟閣與四方往來諸名士酬倡其中著

煙鬟閣詩草上同

魯星邨家皖城中之盛唐山客游漢口多主洪氏寓齋嘗為友人作鏡銘云無我有我有

我無我以形鑿心無不可吳梅巔熊曰十六字可抵一部心經注星邨書法大米筆力

磊落如其為人作詩專寫性情不尙免園册子專宗唐律不拾宋後塵氛著盛唐山人集

漢

口

小

志

項大德字立上又字容亭少敏慧八歲能誦五經與兄大復字來一同時入泮其先歙人祖璘買遷漢口因家焉父誠出守四川順慶成都兩郡以卓異著名卒于京邸大德生有至性孝事其母甚謹侍疾半載寢食俱廢以刃割股和藥進母病少瘥時天寒肉裂自冬徂夏膿血腥臭人始知之迨母卒益復哀號痕潰大如掌形神銷亡身羸而歿年僅二十有六見者爲之流涕聞者爲之傷心焉著梯青集大復爲之選梓其題易徵君廬墓圖詩句云春樹淒清猶有淚秋風孤影尙聞嘯同上

一千八百六十五年七月之杪漢口漫溢而出其勢浩大輪船皆鼓輪以避其冲有許多華船及木排等泊於漢江口者以大纜繫之竟爲冲出至租界之前橫陳于洋船停泊處此亦有碍于洋船也其流勢五訥至八訥惟至對岸淺灘處則差殺中國江海險要圖志

鎖穴在大別山陰漢口按漢董夔傳云孫權征黃祖橫兩蒙衝挾守沔口以楫闔大纜繫石爲礮又晉王濬傳云晉伐吳吳人于磯險要害處皆以鐵鎖橫截之故名鎖穴今山陰

二處有石穴俱存即其繫鎖處也

明一唐胡曾鎖穴詩于濬戈船登上流武昌鴻業
統志 土崩秋思景鐵鎖眞兒戲誰興吳于畫此謀

後湖茶肆上路以白樓爲最著白樓者白氏之故址也在大觀音閣後百弓地關畚土擊

漢

口

小

志

壇編槿爲籬積石成徑中構小樓作東西兩箱軒窗豁違檻曲廊回之內皆設小座以供
 茗坐外復四植楊柳綠陰垂幌翠溫襟帶閒又築隄以高之大水不沒可通游人往來樓
 外遠山幾抹隱隱青露朝雲莫霞眩人眼目若于盛夏湖水平隄夕陽初落煙波淼渺燈
 影上下映射水間漁榔遠近響應沙渚道暑接踵而至絺衣桂樹涼風襲人七盃香生適
 然歌咏憑眺之勝以斯樓爲第一余嘗有句云楊柳四圍遮不住看山都上白家樓黃心
 盃承增句云指點夕陽紅墜處夢雲湘雨一齊收林琴庵棲鳳句云晚煙斂盡銀蟾出獨
 照幽人論茗時張苧邨諷句云小園曾與人消夏多種垂楊覆影來多紀實也漢口叢談
 後湖之有茶肆相傳自湖心亭始近若湧金泉第五泉翠薊蕙芳習習亭麗春軒之名爲
 著皆在下路雷祖殿三元殿後其餘尙有數十處弦歌喧耳士女雜坐較上湖游人更盛
 湖心亭地頗疎廠蓺花疊石位置亦宜余昔有詩題壁云曲曲欄干短短籬湖心亭外柳
 絲絲風翻芍藥徐熙畫雨釀黃梅賀鑄詞人影散隨弦鼓寂茶香會看月燈遲笑余羸得
 吟詩興偏在文園病渴時同上
 涌金泉更爲爽塏復積年畚土築石以高之更造小樓重閣白石紅欄掩映于綠楊陰裏
 殊有幽致登樓四眺北則黃陂之風火木蘭二山相距或數十里或百餘里而遙霽色雲
 開翠微遙露西南則漢陽之三山黛影參差常列窗外三山者舊志謂其山三峯並峙一

漢

口

小

志

仙女二樓子三馬足故又名三山景也南則大別當前花宮琳宇暈彩耀丹靜坐試茶似
 聞鐘梵東則大江橫繞檣立帆飛時與煙雲起滅而湖中遠近又有土阜布列數十處鄉
 人築室聚族而居以菰湖地菜麥者故諸墩皆以姓氏名如吳家墩朱家墩之類傍多植
 以雜樹遠望若山林然常芝仙道性有句云幾抹遠山輕染黛千條新柳嫩含煙淺春芳
 景宛可入畫

同上

韓詩外傳第一卷云處子佩璵而浣處子何人据漢書文選注引韓詩並云漢有遊女謂
 漢神也又云鄭交甫遇二女漢皋臺下解佩明珠與之許氏說文魑字下云鄭交甫遇二
 女魑服蓋用韓詩說也然則處子即神女乎將佩璵即明珠歟外傳又云抽觴以女抽觴
 是何語通考洪氏引此有孔子使子貢問焉一句為今本所無亦不可曉

曉書堂筆錄

木華海賦陽冰不洽陰火潛然李善選句不得其解乃云言其陽則有不洽之冰其陰則
 有潛然之火此皆非也余聞航海者言溟渤深處夜中嘗見螢螢有如燈燭之光明滅不
 常余謂此正陰火之說劉正夫言江漢水中亦多有之又言漢口涯岸之旁瀕水之鄉火
 光爛然互然不斷其言如此證以海中所見皆是物耳坎水本為陰中之陽豈其積陰蘊

蓄者厚溢為陽之光耀而如火之燃歟

棲霞社發行
曉書堂筆錄

癸巳郡試與先師丁展儀孝廉諱鳳來同渡漢江舟中語余曰某歲大水漢口一片汪洋

漢 口 小 志

吾支祁浮水面躍入舟中水溢舟人恐面赤失措適同舟某名宿知其為吾支祁也即

曰禹王來曷去諸應曰禹王何在某指禹王閣大喝曰在此吾支祁忽躍入水中不見漢

水遂安流無恙相傳禹王曾繫吾支祁于大別山之足意者其殆有是事歟徐煥章園鄰俎

沔左有却月城亦曰偃月壘戴監軍築故曲陵縣也後乃沙羨縣治黃魏時黃祖所守吳

遣董襲凌統攻而擒之櫛衡亦遇害于此水經注

馬騎城在却月城西二里周廻五里今長棚岡即其故基明一統志

梁城在府城東北南史梁武自襄陽趣建鄴鄧元起會大軍于夏口築漢口城以守魯山

今大別山橫頂城即其舊基方輿紀要

蕭公城輿地紀勝在漢陽軍城西五里梁武所屯處洪齒孫補梁疆城志

鎖穴在大別山陰漢口按吳志董襲傳云孫權征黃祖祖橫兩蒙衝挾守沔口以楫闔大

紲繫石為碇晉書王濬傳云晉伐吳吳人于磧險要害處皆以鉄鎖橫截之故名鎖穴今

山陰二處有石穴俱存即其繫鎖處也三才圖會

魚容湖南人談者忘其郡邑家貧下第歸資斧斷絕羞於行乞餓甚暫憩吳王廟中因

以憤懣之詞拜禱神座出臥廊下忽一人引去見吳王跪曰黑衣隊尙缺一卒可使補缺

吳王可即授黑衣既着身化爲烏振翼而出見烏有羣集相將俱去分集帆檣舟上客旅

漢

口

小

志

爭以肉餌拋擲羣於空中接食之因亦尤效須臾果腹翔棲樹杪意亦甚得踰二三日吳王憐其無偶配以雌呼之竹青雅相愛樂魚每餐輒馴無機竹青恒勸諫之卒不能聽一日有兵過彈之中胸幸竹青銜去之得不被擒羣烏怒鼓翼煽波波湧起舟盡覆竹青乃攝餌哺魚魚傷甚終日而弊忽如夢醒則身臥廟中先是居人見魚死不知誰何撫之未冰故不時以人邏察之至是訊知其由歛貨送歸後三年復過故所參謁吳王設食喚烏下集嚼乃祝曰竹青如在當止食已並飛去後領薦歸復謁吳王廟薦以少牢已乃大設以饗烏友又祝之是夜宿於湖村秉燭方坐忽几前如飛鳥飄落視之則二十許麗人颯然曰別來無恙乎魚驚問之曰君不識竹青耶魚喜詰所來曰妾今爲漢江神女返故鄉時常少前烏使兩道君情故來一相聚也魚益欣感宛如夫妻之久別不勝懽戀生將偕與俱南女欲與俱西兩謀不決寢初興則女已起開目見高堂中巨燭熒煌竟非舟中驚起問此何所女笑曰此漢陽也妾家卽君家何必南天漸曉婢媪紛集酒炙已設就廣牀上陳矮几夫婦對酌魚問僕之所在答在舟上生慮舟人不能久待女言不妨妾當助君報之於是日夜談讌樂而忘歸舟人夢醒忽見漢陽駭絕僕訪主人杳無信兆舟人欲他適而纜結不解遂共守之積兩月餘生忽憶歸謂女曰僕在此親戚斷絕且卿與僕名爲琴瑟而不一認家門奈何女曰無論妾不能往縱能之君家自有婦將何以處妾也不如

漢

口

小

志

置妾於此爲君別院可耳生恨道遠不能時至女出黑衣曰君舊衣尙在如念妾時衣此可至至時爲君解之乃大設肴珍爲生祖餞既醉而寢醒則身在舟中視之洞庭舊泊處也舟人及僕俱在相視大駭詰其所往生故悵然自驚枕邊一襖檢視則女贈新衣襪履黑衣亦摺置其中又有繡縗維繫腰際探之則金貲充牣焉於是南發達岸厚酬舟人而去歸家數月苦憶漢水因潛出黑衣着之兩脇生翼翕然凌空經兩時許已達漢水回翔下視見孤嶼中有樓舍一簇遂飛墜有婢子已望見之呼曰官人至矣無何竹青出命衆手爲之緩結覺羽毛劃然盡脫握手入告曰郎來恰好妾旦夕臨蓐矣生戲問曰胎生乎卵生乎女曰妾今爲神則皮骨已更應與曩異至數日果產胎衣厚裹如巨卵然破之男也生喜名之漢產三日後漢水神女皆登堂以服飾珍物相賀並皆佳妙無三十以上人俱入室就榻以拇指按兒鼻名曰增壽既去生問皆誰何女曰此皆妾輩其未後著藕白者所謂漢皋解佩卽其人也居數月女以舟送之不用帆楫飄然自行抵陸已有人繫馬道左遂歸由此往來不絕積數年漢產益秀美生珍愛之妻和氏苦不育每想一見漢產生以情告女女乃治裝送兒從父歸約以三月旣歸和愛之過於已出逾十餘月不忍令返一日暴病而殤和氏悼痛欲死生乃詣漢告女人門則漢產赤足臥床上喜以問女女曰君久負約妾思兒故招之也生因述和氏愛兒之故女曰待妾再育放漢產歸又年餘

女雙生男女各一男名漢生女名玉佩生遂携漢產歸然歲恒三四往不以爲便因移家漢陽漢產十二歲入郡庠女以人間無美質招去爲之娶婦始遣歸婦名扈娘亦神女產也後和氏卒漢生及妹皆來躋踊葬畢漢產遂留生携玉佩去自此不返

蒲松齡聊齋志異

漢口小志

聽竹廬叢書之一

附外國人居留地

漢 外國人居留地者外國人之勢力範圍也自前清咸豐八年英國天津條約訂開長江三口後英法俄德日先後來漢租地通商謂之租界其餘比西瑞荷義無租界各國亦各駐有領事遇有地方民刑訴訟外國領事得與中國官吏在公堂會審因中國法律向不完備使外人有所藉口種種失敗有強權而無公理統觀前後交涉案件明眼人當自知之無待贅述將來改良法律編纂法典以謀司法之獨立或者有收回領事裁判權之一日亦未可知既非我國主權所能及姑付缺如以俟異日茲僅將各國租界條約抄錄於左

英國漢口租地原約咸豐十一年

大清欽命湖北武昌等處承宣布政使司奇齊葉勒特依巴圖魯唐 大英欽差大臣參贊兼管領事官事務巴爲立約永租地基事現在英國遵照和約來漢通商應定地段以便英國商民蓋造房棧居住今大學士湖廣總督官 派委本司會同本參贊查勘定准漢口鎮市以下街尾地方自江邊花樓巷往東八丈起至甘露寺江邊卡東角止量得共長二百五十丈進深一帶一百一十丈並無參差不齊經本月初十日本參贊會同委員

漢

口

小

志

蕭守漢陽縣黎令立明四至用石塊上刻大英國地基字樣按至釘明共合地基四百五十八畝零八十弓每畝地丁銀一錢一分七厘共銀五十三兩六錢二分五厘漕米每畝二升八合四勺共米十三石零一升五合七勺每石折銀共銀三十九兩零四分七厘一毫兩共銀九十二兩六錢七分二厘一毫將此地永租與英國官憲分爲英國商民建造房棧居住之所應如何分段並造公路管辦此地一切事宜全歸英國駐紮湖北省領事官專管隨時定章辦理每年四月內由英國領事官將以上地丁漕米價共銀九十二兩六錢七分二厘一毫清交漢陽縣如數查收方可永租無異查此地民房舖戶地基係論塊算目下不能逐一計畝其中所有瓦房草房棚寮應早日計明開冊自定此約之後卽不准民人在租界內再造房屋棚寮等間俟領事官到楚用地之日卽會同漢陽府縣隨時傳集本房屋地主呈驗地契當面合算其中所有官房廟宇及民間瓦屋草房棚寮菜園麥地分別大小粗細等次由官按照地勢定銀若干不准百姓高抬價值亦不許英商任意發價勒買總以兩不吃虧而昭平允一面折房交地永爲英國之業立約之日本參贊當面言明所定此地界址不能越花樓巷之西一帶再租免碍鎮市舖屋嗣後各國來漢租地自必一律辦理此議之後兩無異詞現立租約兩紙各執一紙存照爲憑此約本參贊畫押爲憑俟本國欽差大臣批准再蓋湖北省領事官印此照

德國漢口租界條款

大清欽命二品頂戴湖北漢黃德道監督江漢關稅務兼辦通商事宜
 大德欽命外部卿銜駐紮上海管理通商事務總領事官
 務日盛請在漢口新開租界奉兼護湖廣督部堂譚
 派委本監督會同本總領事查勘
 定界所議條款開列於左

計開

一 德國租界定准漢口鎮英租界以下地方自通濟門城外沿江官地界外起至李家墩前面為止量得共寬三百丈其江岸尚有水淹議定深處一百二十丈前經本年七月二十四日由本總領事協丁副領事會同漢陽縣薛令委員董令立定寬處地址用石塊釘界其深處界址俟江岸水退再釘

一 德國租界共合六百畝每畝地丁銀一錢一分七厘共銀七十兩零二錢每畝糶米二升八合四勺共米十七石零四升每米一石折銀三兩共銀五十一兩一錢二分二厘共銀一百二十一兩三錢二分此項係應納租價即華民以前所交地丁糶米銀兩於每年四月由德國領事官送交漢陽縣查收彙解此地永租與德國應由領事官設法俾華民地基迅速全行租與洋商其有德國未經租定地畝仍由華民自行交納地租嗣後德國領事官造冊將租界之內租戶註明如有以地抵押註明押

與何人並所押款數若干其租界一切事宜歸德國領事官按照此約及後定章程辦理至租界內華民不得同住

一 德國租界內向華民業戶租地應償地價須照三個月以內相等地基價值公平酌定江漢關監督不准華民高抬時價德商亦不致有強抑之事租界之地如須分別大小優劣等次定價以後會議其有民間家廟祠堂及各幫會館公衆庵廟租價自應另議以順輿情方免阻撓永租地基之上蓋有房屋葬有墳墓者應分別瓦房棚屋照估價值並酌給搬家遷葬之費至交清價值即當讓地若地基上蓋有房屋者應再訂期遷讓如未讓之先華民業戶用地祇可本人並其家屬居住種田不許作別項用亦不准再造

一 租界內華民應讓地基須由德國領事照請地方官飭遵於契內均寫永租字樣由漢陽府縣查勘明確稅契蓋印以昭信守自立此約之後如有各國人願在德國租界內向華民租地惟其地既經永遠租與德國應由德領事官允准并照請稅契

一 租界內向有官地應由中國量爲酌留以爲將來建造會審公所等項之用

一 德國租界舊有官街公路將來蓋造洋房時如有侵越應即另行留出街路基地如法修建無論華洋商民及驛遞公文餉鞘夫馬人等均准一律任便行走又租界內

如中國開辦鐵路須用地基仍准讓還其價值倘與租戶隨時相商未能妥洽應由監督會同領事官持平議定均不得藉詞不允讓還也

一德國租界距英租界中有通濟門一城之隔往來殊形不便現由漢陽縣會同勘定在於通濟門城角江岸建一馬道車路與江岸上游公路相通則英租界便可聯絡一氣惟通濟門外附近官地係爲保護堡垣之用不得列入租界以內其附近官地上之棚屋應由地方官飭令拆去不准再蓋及埋葬墳墓以肅觀瞻

一德國租界以內如遇無駐華領事官管束之洋人前華人涉訟應歸中國官辦理派員在租界審讞若無領事官管束之洋人並德國人或各國人因被華民欺凌稟控以及華民在租界內違犯章程由中國官會同德國領事官或領事所派之員會審如讞員定案不合可由德領事官照請江漢關監督再行復訊如有重大事件仍由地方官辦理如係兩國交涉事件仍照約章辦理

一德國所開租界即在漢口通商口岸之內如建碼頭須先與監督商量察看地勢與華洋商船往來無礙方可修建

一德國租界未開之前已經各國人向華民租定地基并無違碍至其地歸入德冊倘未允洽應由德國領事官照會各國領事官妥商辦理

以上條款立爲租約兩紙簽押一俟兩國 上憲批准再行蓋印爲憑此照 光
緒二十一年八月十五日 在漢口立

俄國漢口租界條款

爲立約永租地基事現因俄國商務日盛在漢口新開租界奉

駐京欽差大臣喀 飭令本領事本署領事會同本監督奉

湖廣總督部堂張 派委查勘地界所議條款開列如左

計開

- 一 俄國租界現議在長江西岸漢口鎮英租界以下沿江至通濟門爲止計長二百八十八丈以三分之一由俄界下至通濟門城內官地爲止設爲法界以三分之二由英租界下至法界爲止設爲俄界此指大路之外至沿岸而言是前爲界計長一百九十二丈由大路至江岸南首深一百零六丈北首深三十七丈其大路之內南至北抵法界爲止計前長九十四丈後長一百十六丈由大路至城垣官地爲止南首深八十三丈北首深一百零六丈五尺均已勘定豎立界石
- 二 俄國租界共合地四百一十四畝六分五釐應納租價卽係地丁糴米銀兩照畝科算每畝地丁銀一錢一分七釐共銀四十八兩五錢一分四釐每畝糴米二升八合

四勺共米十一石七斗七升六合六勺每米一石折銀三兩共銀三十五兩三錢二分八釐二共銀八十三兩八錢四分二釐於每年四月由俄國領事官送交漢陽縣查收彙解此地永租與俄國其租界一切事宜歸俄領事官按照此約及後訂章程辦理惟租界內遇有華洋商民稟控欺凌等項事故應由租界委員同領事官所派之員審訊辦理如係兩國交涉重大事件非委員所能定讞者可由領事照會監督按照約章由地方官辦

三俄國永租地基所有華民地段從立據畫押之後不准出售暫租他人祇可永租俄國政府此地之價值由中國地方與俄國領事官商量公平議價以一年之期全行永租俄國政府期內准民間在於俄國租界地上建造房屋其地基上房屋並會館庵廟暨葬有墳墓者應分別等第照時估價並酌給搬家遷葬之費至俄國租界未開以前已經各國人向華民租定地基并無違礙其地應歸入俄冊應由俄領事辦理

四俄國開辦租界按照外國永租地基章程於契內均寫永租字樣由漢陽縣查勘明確稅契蓋印以昭信守并照別國章程不准華民在於租界之內建造房屋并同住五俄國租界內有武昌船關爲中國辦公緊要之所本難遷讓現因俄國開設租界亦

屬創辦之事是以允准惟讓遷移租界之外照議估價另行改建以敦睦誼至俄國租界毗連城垣官地應須留出計寬五丈不在租界之內此地祇可開築一大路該處應宜潔靜不能建造房屋及居住華民

六俄國租界舊有官街公路將來蓋造洋房時如有侵越應即另行留出街路基地如法修建無論華洋商民及驛遞公文餉鞘夫馬人等均准一律任便行走又租界內如中國開辦鐵路須用地基仍准讓還其價值倘與租戶隨時相商未能妥洽應由監督會同領事官持平議定均不得藉詞不允讓還也

七俄國所開租界如建碼頭須先與監督商量察看地勢與華洋商船往來無礙方可修建

以上條款立爲租約兩紙簽押一俟兩國 上憲批准再行蓋印爲憑

大俄欽命駐劄天津領事官辦理通商事宜德 押

大清欽命二品頂戴湖北漢黃德道監督江漢關稅務兼辦通商事宜瞿 押

大俄欽命署理漢口領事官辦理通商事宜羅 押

光緒二十二年四月二十一日 西歷一千八百九十六年五月二十日在漢口立

法國漢口租界條款

爲立約永租地基事現因法國請在漢口開辦租界奉

駐京欽差大臣施 飭令本總領事并本領事會同本監督奉

湖廣總督部堂張 派委查勘定界所議條款開列於左

計聞

一 法國租界現議在長江西岸漢口鎮英租界以下沿江至通濟門爲止計長二百八十八丈以三分之二由英租界下設爲俄界以三分之一由俄界此指大路之外至江岸而言是爲前界計長九十六丈由大路至江岸南首計深三十七丈北首計深十七丈其大路之內西南自俄界起東北抵城垣官地爲止計叙長一百十七丈由大路至城垣官地爲止南首深一百零六丈五尺北首計深四十三丈五尺均已勘定豎立界石惟領事署與跑馬場毗連之處係屬中國民地及各國洋人之地居多除中國民地由地方官同洋務委員與法國領事商量定價外其各國洋人之地自然歸於租界惟各國西洋人在法國租界內之地均應更換契據赴法國公署蓋印投稅日後各國客人在租界內租地或租房屋應至法國公署稅約應由法領事辦理

一 法國租界共合地一百八十七畝每年應納租價卽係地丁漕米銀兩照畝科算每

畝地丁銀一錢一分七厘共銀二十一兩八錢七分九厘每畝漕米二升八合四勺共米五石三斗一升八勺米一石折銀三兩共銀十五兩九錢三分二厘二共銀三十七兩八錢一分一厘於每年四月由法國領事官送交漢陽縣查收彙解

一 永租地價及地基上房屋並會館庵廟暨葬有墳墓者應分別等第照時估價並酌給搬家遷葬之費訂期遷讓本監督當飭地方官諭令民間公平議價不准高抬法領事官亦飭洋商毋得抑勒以昭公允

一 法國開辦租界應照別國永租地基章程於契內均寫永租字樣由漢陽府縣查勘明確稅契蓋印以昭信守並照別國租界章程不准華民在租界內同住

一 租界之外由通濟門內城牆迤車至江邊留出官地十一丈其城牆迤西一帶留出官地五丈作爲大路之用除應修建公所之外不准民人搭蓋棚屋等項其大路亦宜時常修好以上留出官地不入租界之內

一 法國租界之內舊有官街大路應免科算地價將來蓋造洋房時如有侵越卽另行留出街路基地如法修建無論華洋商民及驛遞公文餉鞘夫馬人等均准一律任便行走又租界內如中國開辦鐵路須用地基仍准照原價讓還應用不得藉詞不允

一法國所開租界如建碼頭須先與監督商量察看地勢與華洋商船往來無碍方可
修建

以上條款立爲租約兩紙簽押一俟兩國 上憲批准再行蓋印爲憑

大清欽命二品頂戴湖北漢黃德道監督江漢關稅務兼辦通商事宜瞿 押

大法欽命補授駐札漢口九江管理本國通商事務領事府德 押

光緒二十二年四月二十一日

一千八百九十六年六月初二日

在漢口立

英國漢口新增租界條款光緒二十四年

爲立約永租地基事現因英國漢口租界之後新增地基歸入英界即應開辦奉
湖廣總督部堂張 派委本監會同本領事查勘定界所議條款開列於左

計開

一英租界後至城垣留出官地五丈止南至一馬路向城垣直線起北至俄界止所有
四址以內全行租與英國政府歸入租界

二英租界後四址以內凡有各國商人已租之地若須歸入英界應由英領事與各國
領事商安照會監督有案再議歸入英界照英租老界章程辦理并不准華民在租

界內同住

三英租界後四址以內共合地三百三十七畝五釐每年應納租價即係地丁漕米銀兩照畝料算每畝地丁銀一錢一分七厘共銀三十九兩四錢三分每畝漕米二升八合四勺共米九石五斗七升二合二勺米每石折銀三兩共銀二十八兩一分七厘二共六十七兩四錢五分二釐於每年四月由英領事官送交漢陽縣查收彙解四永租地價及地基上房屋並會館庵廟暨葬有墳墓者如現在此段地基仍屬華人之地自應由地方官查明稟請監督會同領事官公平議價并酌給搬家遷葬之費訂期遷讓不准高抬價值英領事官亦飭洋商勿得抑勒以昭公允倘有地基早經洋商價買地上仍有房屋庵廟墳墓者應詢問該洋商及各地戶從前買地之時有無將房屋價值搬家遷葬等費議明在內如經議明價值給清當由地方官諭令遷讓其洋商雖經買地而未將房屋價值及搬家遷葬等費議明在內或議而未給者應由領事官自行辦理

五英租界後四址以內舊有官街公路應免科算地價將來蓋造洋房時如有侵越應即另行留出街路基地如法修建無論華洋商民均准一律任便行走又如中國開辦鐵路須用地基仍准讓還其價值倘與租戶隨時相商未能妥洽應由監督會同

領事官持平議定均不得藉詞不允讓還也

六舊有公路華洋人均准任便行走如有華人佔僭種菜蓋屋者均由地方官查明飭令讓出以備租界工程局修造其有洋商已經購買而間有侵佔公路蓋屋者由領事官自行辦理至設有更改抵換之處必須商議明白兩無異言以昭公允

七大智門內官街及城垣一帶留出官地即舊有公路無論華洋商民及驛遞公文餉鞘夫馬人等均一律任便行走至於路燈巡捕議由租界工程局安設此項大路亦由工程局修造但此路雖由工程局修造仍屬官路與現在老租界三道洋街相同以歸一律

八現在城垣之上大小房棚屋甚多臭惡已極理應驅逐界租開辦之後不准再有蓋屋居住

九新增租界以內華洋交涉事務仍按老界章程辦理

以上條款立爲租約兩紙簽押一俟兩國 上憲批准再行蓋印爲憑

大清頭品頂戴新授湖北按察使漢黃德道江漢關監督 押

大英欽命駐紮漢口管理通商事務領事官霍 押

俄國漢口永租江岸地基條約

大清欽命二品頂戴湖北漢黃德道江漢關監督瞿

爲

大俄欽命駐紮漢口正領事官辦理通商事宜王

會同訂立辦理中國將漢口俄國租界江岸地基四段永租與俄國之條約三條開列於後

第一條中國永租與俄國政府坐落江邊地基

第一段地先係厚生祥業戶基地東至江邊南至順豐洋行基地西至新泰洋行磚茶棧北至公巷丈得三萬一千六百四十英方尺核計二百二十九方零一分七厘一毫六絲每方計銀十兩共核銀二千二百九十一兩七錢二分地基上所有房屋估銀九十兩總共核銀一萬一千二百九十一兩七錢二分議定二十四年二月底交屋

第二段地先係武昌船關基地東至江邊南至公巷西至新泰洋行基地北至泰新洋行基地丈得六千五百三十一英方尺核計四十七方零三分查關屋係屬公產現因俄國開辦租界

督憲體念中國輯睦邦交之意諭飭格外通融不必計算價值今俄國政府願獻銀一

千兩請中國作善舉之用或作爲貼補移關之費其地上房屋由中國自行遷移

第三段地先係唐瑞芝基地東至江邊南至寶順洋行基地西至大路北至無主之地丈得三十九萬七千一百三十二英方尺核計二千八百七十六方零四分六厘五毫三絲每方計銀十兩核銀二萬八千七百六十四兩六錢五分所有在地上未成棧房應於立約後限一月搬移他處所有蓋造花費貼還銀三千一百四十兩零五錢總共核銀三萬一千九百零五兩一錢五分

第四段係無主之地東至江邊南至唐瑞芝基地西界大路北界公巷丈得七萬六千四百四十五英方尺核計五百五十三方零六分九厘八毫五絲每方計銀十兩核銀五千五百三十六兩九錢八分飭查現無地主出頭承認所有地價銀兩由中國收受存於銀行俟將來有真正地主執契出認提銀發給

第二條中將以上所開地基四段以及房屋現在永租與俄國政府所有地價暨房屋估價等項共核銀四萬九千七百三十三兩八錢五分當時中國收清由中國就承與各業戶自行辦理

第三條現在俄租界內公巷二條仍照前留出無論華洋商民均准一律行走如將公巷收入添蓋房屋俄國政府仍照章每方補還中國地價十兩其餘未盡事宜均照二十二年四月所定條章辦理合併聲明

大清欽命二品頂戴湖北漢黃德道江漢關監督瞿

爲

大俄欽命駐漢口正領事辦理通商事宜王

大清光緒二十三年十一月十六日

大俄一千八百九十七年十一月二十七日

日本漢口租界章程

大清欽命二品頂戴升任湖北按察使湖北漢黃德道江漢關監督稅務兼辦通商事宜瞿

爲

大日本欽命駐滬總領事特派辦理漢口租界事宜小田切

立約永租地基事現因日本商務日盛請在漢口新開租界奉

湖廣總督部堂張 派委本監督會同本署總領事查勘定界所議條款開列於左

計開

- 一 日本租界定准漢口鎮德國租界北首起量得東界沿江長一百丈南界緊靠德界東起江口西至鐵路地界爲止西界沿鐵路地界北界自東界之北端江口起至西界之北端鐵路地界爲止畫成直線此爲日本專管界租立定此約之後派員會同樹立界石

一 界內所有道路堤塘溝渠碼頭以及稽查地面之權由日本領事官管理其道路堤

塘溝渠碼頭由日本領事官設法修造道路堤塘溝渠公共所需之地如有官街官地免納租價錢糧如係民地除付租價外免納錢糧

一界內租戶應完錢糧定於每畝地丁銀一錢一分七厘每畝漕米二升八合四勺每米一石折銀三兩每年四月由日本領事官送交漢陽縣查收彙解其有日商未經租定地畝華民自行交納錢糧

一界內凡日本商業工業均可在此照章租地建造屋宇棧房日本商工人等向華民業戶租地應償租價須照三年以內相等地基價值公平酌定漢關監督不准華民高抬時價日商亦不准強抑之事日商願租之地如有官地白應另議租價格外從廉以示惠恤租之時必須稟明日本領事官照會地方官履勘印發契租三紙由日本領事官會印一給租戶一存日本領事衙門一存中國地方官衙門一經承認之地照章永歸租戶租用不准何國何人強行退讓所有租契式樣既有成案無須另議

一中國無身家之人不得私在租界內住家開設店舖行棧違者分別懲辦如實係殷實體面品行端正之人方准在此界內居住營業然商民等只准居住不准租地如有行跡可疑不安本分不奉章程之人中國地方官可知照日本領事官亦可知照

中國地方官會同查確由中國地方官罰辦不得從容包庇以安商旅而昭公允

一一經租給之地祇准出名承租之人居住倘租戶有事不能親身在此居住須託親戚友人夥計同行等有身家之人代理管辦如有不得已事故非轉租不可之時仍於轉租之前由日本領事官照會中國地方官方能換給租契

一租界內如有民間家廟祠堂及各幫會館公衆廟庵租價自應另議以順輿情永租地基之上蓋有房屋葬有墳墓者亦應分別瓦房棚房照估價值並酌給搬家遷葬之費交清價值即當讓地若地基上蓋有房屋者應再訂期遷若未讓之先華民業戶用地祇可本人并其家屬居住種田不許作別項用亦不准再造又由地方官出示禁止界內所造墳墓安放靈柩以便經營將來如欲另擇地區以設日本人坟域屆時由日本領事官照會中國地方官商辦

一日本租界未開之前已經外國人向華民租定地基并無違碍應照他國租界之例辦理惟界內地地址過於窄狹自立此約之後只歸日本商民永租地基不准華民業戶向外國商民以地抵押或行租讓違者由中國地方官從嚴懲辦如有外國體面殷寔商人願在界內居住者祇能居住不得租地

一日本所開之租界即在漢口通商口岸之內如建碼頭須先與江漢關監督商量查

看地勢與華商船往來無碍方可建修

一日本租界內如遇無駐華領事官管束之洋人并華人涉訟應歸中國官辦理派員在租界審讞若無領事官管束之洋人並日本人或各國人因被華民欺凌稟控以及華民在租界內濫犯章程由中國官會同日本領事官或領事所派之員會審如讞員定案不合可由日本領事官照請江漢關監督再行復訊如有重大事件仍由地方官辦理如係兩國交涉事件仍照約章辦理

一所有外國租界及將來設有開拓之外國租界施設事宜如別優處日本租界亦當一體均沾

一此次所定日本租界以界址過於窄狹將來商戶盈滿則當臨時酌妥情形仍在丹水池迤下之地由日本領事官隨時與江漢關監督商酌購買妥宜地基以便日後設立工廠倫或丹水池迤下地方有已歸洋人租界之處即應在於丹水池以至沙口等各處地方擇江岸水深與船泊相宜之地代之總以附近鐵路爲主所有租地章程務依現議章程辦理

以上條款立爲租約兩紙簽押一俟兩國 上憲批准再行蓋印爲憑

光緒二十四年五月二十八日

附外國人居留地

明治三十一年七月十六日

在漢口立

二十

大法欽命補授駐劄漢口管理本國通商事務領事府瑪
大清欽命二品頂戴湖北漢黃德兵備道監督江漢關稅務兼辦通商事宜岑

爲

立租約展拓租界地基事前此法國商人居漢無幾商賈盡由水道故當時只要沿江
一面之地設立租界茲法國商人之數日增內地已有鐵路法界之上設有鐵道車棧
英國界後築有新路直抵該車棧因此數事不能不將法界展拓使近鐵路以便由車
棧彼此築路通達江濱現奉

本任 湖廣總督部堂 張端 派委本監督會同

駐華法國欽差大臣派委本領事查勘定界所議條款開列於左

計開

一 法國舊租界前至俄界下設至通濟門城內地爲止茲續展新界自官地西距鐵路
六十丈爲止合一百八十五邁當北一面與德租界毗連之線直引至距鐵路六十
丈之官地爲止南由俄法之界直引一線至垣牆之外距鐵路六十丈之官地爲止
設爲新法國租界

一 現議法國新界之地所有租地章程均照舊界章程辦理若有各國商人之地在內
應由法領事與各國領事自行妥商後再照會監督立案倘各國商人糾葛之地或

其地全段在新界之內又或有一地一段既分在新界之內一段分在新界之外該商人若不就範圍亦應由法領事按章與該商人調理一切概與中國地方官無涉

一堡垣地基寬三丈垣內地寬五丈垣外官地寬五丈城濠之地寬六丈均展與法國新界

湖廣總督部堂爲敦兩國睦誼起見免繳地價

一堡垣展入新界所有磚石料件應歸還中國地方官其拆卸堡垣之費應歸法界給發

一法國新展租界每年應納租價卽係地丁漕米銀兩照數科算每畝地丁銀一錢一分七釐每畝漕米二升四合四勺新界畝數若干應由中國地方官派熟悉之員會同法領事計定地畝應納若干價應與舊界之租價同時輸入中國地方官照舊案辦理

一中國地方官應與鐵路車棧距法西界之中央速築馬路一道法人亦應於其界內營築街衢使車棧有通道直達江濱兩國應築道路常行妥修各限其權力於界內之路不得逾越其權力於界外之路以嚴界限 無論華洋商民及驛遞公文餉鞘夫馬人等均仍准一律任便行走

一該租約應繕華文法文各兩份各分執一份為據照公法之例倘有文字不明之處應以法文為據

大法欽命補授駐劄漢口管理本國通商事務領事官

大清欽命二品頂戴湖北漢黃德兵備道監督江漢關兼辦通商事務岑

一千九百零二年十一月十二日

光緒二十八年十月十三日

在漢口立

日本展拓漢口租界條約計三款

大清欽命湖北漢黃德兵備道監督江漢關稅務兼辦通商事宜桑大日本欽命駐劄漢口兼管九江辦理通商事務領事水野

為

立約永租地基展拓漢鎮日本租界事現因彼此議訂所有條款列左

第一款議定大日本國展拓租界從原定界址起向北接展一百五十丈為止東西界

線照原界劃齊

第二款議定畫拓日本租界內華商設有之燮昌公司火柴廠可在界內照常開設不

致勒令遷移燮昌公司亦應遵守大日本國租界章程完納稅捐與大日本國商民

一律無異大日本國國家看待燮昌公司保護照料亦與大日本國商民一律無異

至該火柴廠將來如何處置辦法大日本國家隨時總准界內現有美孚大油棧一律看待辦理但此項議定原係保護華商利益起見是以將來倘或燮昌公司火柴廠明暗不在華商之手大清國官憲一概不能干與保護

第三款議定此次展拓租界應由湖廣總督部堂札飭江漢關道會同大日本領事官派員勘丈四址界線樹立界碑其餘條約均照原訂合同施行辦理以上條款立爲展拓租約修就漢文日文各兩份彼此簽押一俟兩國上憲批准再行蓋印爲據

大清欽命湖北漢黃德兵備道監督江漢關稅務兼辦通商事宜桑

大日本欽命駐劄漢口兼管九江辦理通商事務領事水野

大清國光緒三十二年十二月二十七日

大日本國明治四十年二月九日 在漢口立

鄂督張附奏漢口比國租界議價收回情形片

再漢口濱江地方招商局碼頭以下係英國租界以下接展俄界法界德界至日本租界止日界以下爲華業公司地界迤下直至劉家廟京漢鐵路碼頭火車棧廠皆爲中國地界乃比國乘鐵路購地之際在該處私購民地三萬六千餘方以豫備鐵路比國工人賃住爲辭於光緒二十四年堅向總署索訂比國租界經臣竭力拒絕駁以比國

工人祇可由鐵路公司造屋借與居住不能准於立界自光緒二十四年議起相持至八年該使復迭向外務部函催咨行臣統籌兼顧再四籌思比國原購地段緊靠京漢鐵路南端江邊碼頭之劉家廟火車棧包過鐵路寔扼南北鐵路咽喉於中國管理鐵路主權及京漢粵漢兩路交接之碼頭大有妨礙堅不允許僅容濱江一邊劃地一萬六千餘方擬作比界東北兩面皆與鐵路相離數十丈該使復商由外務部咨請通融加寬駁以查明窒碍咨覆外務部酌覆自是又相持數年該國駐漢領事將所買地契送交關道稅印迭經照催要挾甚力臣思該地跨越鐵路橫當要衝雖一再駁令減讓究於附近鐵路地權地利有損不如議價收回留作擴充華商貿易之用可以永保利權惟自鐵路告成以後地價數十倍於從前經臣派員與該領事磋商經年始將全數基地議定價銀八十一萬八千餘兩又以鉅款咄嗟難辦暫行息借華洋商欸墊付以杜翻悔此係上年之事現因地甫收清息借之欸已另行籌欸歸還從此京漢粵漢路臨江碼頭不爲外人租界扼阻於路政商務均有裨益自應將此案原委情形奏咨立案除咨外務部立案外所有收回比國租界緣由理合附片具陳伏乞

聖鑒謹奏

光緒三十三年

月

日具奏

夏口夫分治以前舊有漢陽縣志一編都二十四卷後人目之雖徵不信蓋體例不嚴而考據老陋費辭衍義刺刺如茨當時品無著者管蒔以徐宜平紉矣余生也晚同學如密具屢蓄元吉吳無欺萬宗陵田文烈諸子悉飭經史根柢之學每慮邑乘不足傳信擬例武功志以重輯之乃以西燕東勞議不克舉私心疚焉間嘗讀夏口考詳於沿革裘行想之言也再讀漢口叢譚悉於風土人情陳士元之言也又如阮漢聞紀游馮氏題襟記施堂日明錄附竹枝詞讀之可見市政之得失文物之盛衰布貨之良窳習俗之奢靡過來火端軒問俗何其深切而著明也是書也余故藏之。亥秋燬佚殆盡殊為可惜日月幾何風氣再變即令尙存覽是書者今昔滄桑之感又何如耶故分治以後前清廳同知今縣知事每集邑人謀修夏口縣志旋議旋止曲於費猶易也秉筆者為難耳方今漢口歐美屬處輪軌交通商埠遷變時事易移如曇亂絲至為繁縟率爾操觚猶漢陽縣志也勿聞徐君星槎撰成漢口小志一書索稿瀏覽分門別類一十有五其體簡而要其考據約而精其採錄賅而細苦心孤詣至矣盡矣夫徐君孝昌人也公餘之暇而亦留心斯十見見聞聞必紀必載以傳吾邑而餉來者於此纂修縣志俾為成本豈不甚幸然亦夏口士大夫之大愧矣乙卯五月六日漢上逸人朱昌祚跋

友人徐星槎孝廉與夏子揚生黃子冠儒皆好學深思之士曩見鄉先輩著述半委蓬蒿

潛德弗彰，懔然自懼，亟謀所以表襮者。足槎搜文冠，儒搜詩，余與惕牛探討其間，竟夕無倦意，以證夙昔所得而期相與有成也。乙卯歲暮，余役鄂，足槎役漢，聞所著漢口小志將脫稿，郵索觀之。累日而卒業，搜羅宏富，扶擇精審，言有可徵，文能行遠。夏口縣志，其必以此爲權輿，而異日國家從事一統之書，亦將用以資別擇。鴻文鉅製，宜與金匱石室之藏同不朽矣。已而歎曰：著書立說，易俗移風，非學士大夫之責乎？乃科舉之廢，以前皆視文字爲干祿之餌，泊乎歐化東漸，後生小子靡然從風，學步未成，先亡故我。至於驚詞章者，祇怡情於花月事，考據者徒疲精於魚蟲，而於世道人心不相屬焉。老成念舊之士，蒿目頽風，不禁悲從中來，而不能自己也。星槎分緝，警符職司，刑賞謂布化宣猷，日近而遠，故文王之化先及於江漢之間，况漢口居全國之中，爲舟車之所出入，交通既繁，御感自易，於是就其政治風俗實業教育諸大端，若者宜因，若者宜革，若者宜捐，與益窮源竟委，臚列於編，用以爲易俗移風之一助。世有賢哲，按籍披圖，發揮光大，被其化者，又豈僅一時一地已哉？特恐有視作等閑記事之書，行李問途之用，遺其遠大，據取皮毛，作者苦心，無以表著，因揭其旨，以爲讀者告。歲首乙卯嘉平月，同里愚弟胡天演小坡識於武昌巡按官廨。

作志難，作漢口志尤難。其他遠者大者，姑置勿論。近如黃鵠大別，均有爲之志者，獨漢口

無之母亦謂地輿中山石難遷平蕪易改勢使然歟曩有漢口小志之日而書罕見雲集
山人言之詳矣黃心菴漫志之作未竣而沒鶴關吳氏亦私擬一私誌老嫻而輟宜乎讀
彭念堂漢口考一篇而贊賞於靡既也張宗緒與毛大可書云僕嘗三登黃鶴樓訪神仙
吹鐵遂處唯見荒煙蔓草而已叢木數枝纖細如指大萬難結實何從竊暇獨江心鸚鵡
洲一區水漲不沒澗亦不浮青草茸茸猶帶生氣噫嘻宗緒蒞鄂既登黃鶴望鸚鵡而漢
口形如臥帶獨非水漲不沒澗亦不浮也乎胡未聞屈指及之誠哉地以人傳非其人則
則地亦湮沒而不彰藉使當日者漁陽三搥梅花數弄咸於漢臬蘆葦叢中留留跡於數
千年上吾知咏古述懷之士將舍武昌漢陽而咸取道於漢口流風遺俗刊載不磨後有
作人覽無遺憾漢口傳矣復何待耶同懷兄星槎先生旅漢有年以其地不可無傳獨發
憤著書援古證今門分類別成爲漢口小志爲逆旅過客嚮導爲問津遊士示指南苦
心孤詣竟昔賢未竟之志起心菴鶴關念堂諸先生而告之未必不首肯於九京下也復
得淹博多聞如羅田王晦堂師爲之商榷體例芟訂繁蕪校讀一過而已往與現在之漢
口胥能了了其未來之漢口數士百年以後又不知爲何也如嗟乎後之視今亦猶今之
視昔賡續撰著是所望於學士大夫之蒞茲土者汪澹漪有言柳州山水幽奇得子厚而
始顯須江岩壑迥異得許士而始彰然則山水之待人而傳者由人自不能忘情於山水

徐跋

故耳吾兄固不得以柳州許士自儷而此版一出紙貴洛陽又豈僅長子孫綿世澤於勿替耶於戲遠矣同懷弟煥章校訖謹跋

四

補錄引用書目

列仙傳

漢口新安書院志略

聊齋志異

三才圖會

隨州集

隨園詩話

空同集

經義齋文集

秋水閣詩抄

挹懷露軒詩集

五痴山人藁

子固齋詩存

網綺樓詩集

石橋賸稿

夏之爲言大也志夏口者志其小而遺其大無乃僨諸然而主人也問其巷而不知也此亦士著者之恥也有人焉爲我勤搜而詳籍之以便覽省而爲異日治國聞者之導師是又士著者之一快也且吾聞之牛溲馬勃木屑竹頭克勤小物游澣且候使置五石之甕於此而實不足當一勺之用也吾又何以爲吾夏口謀哉蓋吾夏口之在今日其大者固不足志也可志者獨此小小者耳昔者己亥夏五余朝京師行常人對時承戊戌之後姦人構衅帝在瀛臺宮府岌岌僞焉不可終日而又有術焉以箝制天下之口使噤不得發聲余欲以鱗蟲臣勃起爭之非特發言卽恐伏誅又恐激之已甚或反厚其衅而速之禍則余罪滋大意躊躇未有以決也會鄂督張文襄奏割漢陽之北鄉爲夏口廳得旨報可余讀報驚喜拍案叫曰夏口者大口也天其或者以是啓余乎因乞籤於關帝帝壯余意有欲誅逆黨信非難論可回天力拔山之句意遂決然終慮兩宮並坐進說甚難一言忤旨則辭不得盡而事且敗逢比之心計非濟以儀秦之舌不可獨居深思至月餘意忽有悟然後敢入人則見太后如舊識膽益壯言剛練則雪魯紳臧景傳太史之獄言墾荒則伸晉撫胡蘄帥之議任舉一端皆卽垂詢之所及觸類引伸擴而大之以入吾說蓋幾如石投水莫之拒己而曰未也臣請憂大局己而曰未也臣請擇樞臣己而曰未也臣請以十六字進太后言至此仰窺慈顏甚莊則又迂迴其說曰臣先有十六字進皇上蓋規諫

皇上之語卽借以感悟太后也始先帝未諭吾意頗愠繼乃豁然大感動稱是不絕口太后雖神采英毅意近雄猜比聞入骨之言遽隕沾巾之淚不覺絮絮滔滔若老嫗然且撫先帝之背反覆譬曉蓋甚太息痛恨於鴟鴞之不良而恩斯勤斯之心不見諒於天下也厥後余稍持之急太后色忽變夷然作問函語以自壯余時不語以爲如此則帝益危情急舌快遂觸逆鱗太后慚於先帝在坐勃然震怒以扇柄擊案厲聲連叱者三余時箭已離弦勢不得遏抗辯益譁聲震殿壁太后日光睽睽戶外履聲橐橐而余意不少懾卒伸吾說而後已蓋言雖過戇爲先帝地實兼爲太后地也久之太后色定搖扇數四仍溫顏諭出故余有固關題壁詩云四大天門萬疊山孤臣手繫日輪還驚霆一震重霄霹吾戴吾頭入固關蓋紀實也卒空言無補彼狡負乘禍變相尋瓜蔓同盡武俠方嘯聚於水滸貪庸猶醉夢於紅樓澤狐一鳴軒鶴不舞使巨姦得乘之以爲資兩利而俱用之清社屋矣而所謂夏口廳者又未幾而易爲縣矣嗚呼自有夏口以來其收效若此足志乎抑不足志乎抑不獨此也往嘗赴安陸陳君之約與某元勳會飲於酒樓其人走迎執鄉後輩禮甚恭余逆謂之曰吾北鄉區區彈丸地耳胡乃慣出怪物如此其人應聲曰然公老怪物某則小怪物耳余亦無以難之一笑而罷嗚呼漢北之建夏口廳也在己亥之夏廳之忽易爲縣也實基於辛亥之秋十年之間滄桑數變大言無實之兆歟抑夥涉發難

之力歟自古鼎革之際入主出奴是丹非素而在今日歐風東漸民權說興議論又加異焉而吾與某元勳者又不幸而產於茲土且近在十里之內然則志夏口者將頌爲麟鳳之郊歟抑訾爲龍蛇之窟宅歟嗚呼三韭之讖天實爲之（兒時聞先叔鐵卿公言世祖燕京定鼎之夕夢殿下生三韭其長竟天次日以語廷臣一人賀曰此天長地久之兆也一人曰不然韭者九也蓋三九二百七十年耳）吾老且死尙復何言故曰其大者不足志可志者獨此小小者耳志者四區區長徐星槎煥斗序者魁結老道漢北密子公昌墀

丹皆先生文章豪邁如其人國變後久焚筆硯不作此稿經年催促昨始由王晦堂先生交來書已成冊不能弁之卷首特仿易敍卦史漢敍傳例附之卷後六朝以前古書序文大都如此也丙辰八月八日煥斗附識

吾郡星槎徐署長之爲是書也口詢筆書搜求良苦又得羅田王君訪書長沙以蒐補未盡是邦文獻雖未云極備要可十得七八成書後以付印屬之鄙人自維年來分作市民從事鉛槧資生之外思盡得吾鄉文獻之放佚者而傳布之茲書其首事也不虞兵興市警作業艱窘荏苒歲時今始告畢吾知此書一出邦人旅客必人手一編爲訪古證今之先導而有助於採風問俗者不少也星槎以鄙人曾與經營屬題其後惟是編之經要丹

上海图书馆藏书



A541 212 0014 4634B



宗跋

皆密先生與王晦堂同年序之詳矣無取重贅獨生當多故地處衝繁卽小小一印書事必幾經波折而始就然則吾民今日亦何事不如是也哉於是書之成也不禁感慨係之丙辰秋八月黃陂宗季同

四

中華民國四年五月出版

漢口小志
全書二冊定價大洋一元

鑑定者 羅田王葆心

著者 孝感徐煥斗

補葺者 羅田王夔清

校訂者 黃陂彭天覺
孝感徐煥章
羅田王夔古

印刷所 漢口後花樓
盤銘印務局



發行所

漢口英租界湖北路
愛國公公司
武昌城內巡道嶺
官書局

一、...
二、...
三、...
四、...
五、...

...
...
...
...
...

